

# ჩვენებური საქმის ბოლო

ანტონ ფურცელაძისა

გამოცემული

ზ. კიკინაძისაგან

თბილისი

სტამბა მ. შარაძისა, ნიკოლოზის ქუჩა. № 21.

Типог. М. Шарадзе, Никол. ул., № 21.

1893 წ.

---

Дозволено Цензурою 22 Мая 1893 г. Тифлисъ.

---

# ჩვენებური საქმის ბოლო.

ნაამბობა ბესარიონ გაბგასშაღისა.

## I.

— ახლა დამიგდე ყური, — დაიწყო ბესარიონ ვარგისა-  
შვილმა, რომელსაც კვლავაც ბევრი რამ უამბნია ჩემთვისა. —

— დიდ-მარხვა იყო. რა-კი ვიცოდე, არ ამცდებოდა, მე მარტვის პირველს კვირასავე დავიწყე მზადება საზიარებლათ, რომ მინამ აზოკლე დღეები იყო, უფრო მოვითმენდი მარხულობას. ბედნიერია ის კაცი, ვინც ასცდენია იმგვარს მარხულობას, რომელიც მე გაამივილია ჩემს სიყმაწვილეში. მთელი ორე კვირის განმავლობაში მოხარულს ყმაწვილს მარტო დღეში ერთხელ მაძლევდნენ პურის ჭამის ნებას, ისიც, რაკი თითქმის ყოველთვის გიორგობის თვემდის ძლიერს მიგვდევდა ხოლმე პური, პურის მაგივრათ უნდა დავსჯერებოდათ მჭადსა და ხშირათ ნაცარკვერსაც, რა-კი გამომცხოვრებელი ყოველთვის არა გვყვანდა. ლობიო და სხვა სამარხო დიდ-მარხვამდის ძველად თუ მიგვდევდა. მაშასადამე მთელი დიდმარხვა უნდა გაგვეტარებინი ცარიელს მხალზედ, თუ-კი ან იმის გაკეთებას არავინ დაიზარებდა ან თუ-კი იყო ის ხოლმე ყოველთვის შემოსული. ამას დაუმატეთ ახლა ისა, რომ დღეში სამჯერ უნდა მდგარიყავ სასტიკი ხუცესის წირვა-ლოცვაზედ, რომელიც საკითხავი წიგნებიდამ არც ერას სიტყვას არ გამოაკლდება, რადგან დიდ ცოდლოთა რაცხდა, და ამასთან არც ერთს სიტყვას არ გაგა-

გებინებდა, რადგან იმასაც და დიაკვნსაც ნიადაგ ერთისა და  
იმავე სიტყვების გამეორებით, მოჰბეზრებოდათ ამათი კითხვა-  
რისგამოც ჩქარობდნენ ამათს გავლას და მხოლოდ გესმოჯ  
ცხვირში დუღღუნით დაუსრულებელი „ამ ნუ, ნუ, ნუ, ნუ“  
და შიგა და შიგ გაქიანურებით, ისიც გადაფურცვლის კარს  
„და ჰეე უფალო!“ ან „და არარაპიდგან იქმნეს რა“ ან „  
ღალადჰყო ხმითა დიდითა... ჰხ! ხმითა დიდითა“ და შემდეგ  
ისევ „ამ ნუ, ნუ, ნუ“. ამდენ სიკეთესთან ჩვენი ხუცესი ცუ-  
კარსა რეკამდა თითქმის მამლის ყვილისას. ყოველივე ესე ჩვე-  
თვის იყო ძალიან ძნელი საქმე. უამისოთაც ნახევარზედ მში-  
ერი, ახლა მთელი ორი კვირა საზიარებლათ და ზიარების უკან  
მარხულობა დღეში ერთხელ ცალიერი მჭადის ჭამით და მთე-  
ლი დიდმარხვა მხოლოდ დღეში ორჯერ კიდევ ცალიერი მჭა-  
ზედვე ყოფნა! ამ შემთხვევაში ან მეცნიერება სტყუის, ან ქა-  
რთველი კაცის სტომაქი! დღეს რომ შემომხედოს ვინა, ვინ  
დაიჯერებს, რომ ამას, იოანე მრისხანეს სასჯელი? ან, ამდენი  
შიშნოილიც გამოუვლიაო. მთელი თვეობით. თვეობით ცა-  
ლიერი მჭადი და ათასში ერთხელ ცალიერი მხალი! დიას!  
რომ უთხრა ფიზიოლოგებს, არ აგრიჯერებენ...  
მოვიდა ზიარების აგვიმზადდება რამე მეთქი შინ სადი-  
ლათ, ან მუვილის ფიქრებით მე წავედი ზიარების ლოცვის მო-  
ზამუნელათ, რომელიც უნდა ვახშობის დროს დაწყობილიყო  
და შემდეგ განახლებულიყო კიდევ შუალამის ლოცვით. ყვე-  
ლა მაზიარებლები ვიყავით ერთს დიდს დარბაზში შეყრილნი  
ლამის სათევლათ, სადაც მღვდელს უნდა ეკითხნა ზიარების  
ლოცვები. დარბაზი იყო სავსე მაზიარებლებით, ასე რომ თი-  
თქმის ტევა აღარ იყო. მე, როგორც ბატონიშვილს, დამით-  
მეს ცეცხლაპირას ალაგი. ცეცხლზედ, რომელიც ენთო შუა-  
გულ დარბაზში, ედო ერთი უზარ-მაზარი კაკლის კუნძი, წყალ-

მი გაყვინთული, და ქვეშ ამ კუნძს ეყარა რამდენიმე ნედლი  
ჭერი წითლის ხისა, ასე რომ, ანთების მაგივრათა, ეს კუნძი  
აბოლავდა და გვთხრიდა თავისის ბოლით თვალებსა. აქა იქა  
ხარბებზედ ენთო მკვრები, რომელთაც წამდაუწუმ უყინვლი-  
ღებდნენ მაზიარებლები, რომ არ ჩამქრალიყვნენ, და ამ მკვრე-  
ბოლი შავი ღრუბელივით ედებოდა შავთ შექვარტლულს  
ქარბაზსა, რომელსაც კუნწულ-კუნწულათ ჰქონდი ყოველს  
შხარებზედ ჩამოკიდებული მქვარტლის ჯაგები. ქანდარებზედ  
მხადომი ქათმები და ინდოურები გაოცებული ამ უცნაურის  
შმათვის ამბისაგან, ფთხრილებდნენ ჰერქვეშ და კრუტუნბდ-  
ნენ. პაწაწინა ხბო, რომელიც იყო ხელით შეგდებული თაროს  
ქვეშ, რომ არავის გაეჭყლიტა, შიგა და შიგ გამოიზმუოდა და  
თხზაულობდა თავის დედის ძუძუსა, რადგან არ ერია ის ჩვენს  
მარხულობაში, თუმცვ ლოცვების მოსმენა და ღამის თევზ  
ამასაც ჩვენი თან მოუხდა. კუთხეში მოყუყული ბატები საშუმ-  
ხაშუმ ასტეხდნენ სინათლისაგან შეწუხებულნი, ფრთების  
ფრთხილსა და ალაღის ხმით ყიყინსა, თითქო კიდევ რომი  
უნდა გადაარჩინონო ბჭრის შემოსევასა. მღვდელი, კისერზედ  
ერთი ძველის ოლარით, რომელიც უნდა ყოფილიყო ასის  
წლის ნახმარი მაინცა, და ერთი აჭაწაწა ჩალის სამთლით ხელ-  
ში, ჩაპყურებდა ლოცვანში და დუდლუ-ნებდა ცხვირში ხრინ  
წიანის ხმით ლოცვებსა. ჩემს მახლობლათ ისტანდინ ბევრი ყმაწ-  
ვილი და გასათხოვარი ქალებიცა. თითქმის ჩემზედ ბოლოკრული  
იჯდა ერთი ახალი პატარძალი. რომელიც თუმცა თითქო ცბე-  
ლობდა ჩემს დაშორებას, მაგრამ ვითომც ვიწროობისათვის თა-  
ვი ველარ დაედწია. სანახაობა ამ ქალისა სრულიად არავითარს  
სასოებას არ წარმოსთქმინდა. იმისი შავი, ცოცხალი მარბენა-  
ლი თვალები, იმისი უკმაყოფილოთ აფხეკილი ცხვირი და პა-  
ტარა აღისფერი მალლად აკრული ტუჩები ცხადათ გამოსთქვამ-  
დნენ, რომ ამისი გული და სული სრულიად ერთმანერთზედ  
შორი-შორს იყვნენ. იმისი მაღალი ტანი, მსხვილი კავის ნაწ-

ნავეები, კიტრით გაკეცილი სახე აგებულება, თეთრ ყირ-  
მიხათ აყვავებული ღოყები, სწორედ გითხრა, მეცა და სხვა  
ჩემს ტოლს ბიჭებსაც სრულიად გვაფიწყებდნენ, რისთვისაც  
ვიყავით აქ მოსულნი, მერე რაკი ისიც ვიცოდით, რომ ამის-  
თანა მშვენიერს გოგოს ჰყვანდა ერთი უხეირო ბაჯაჯღანა ქმა-  
რი. პატარძალი ჰგრძნობდა ამასა და ხამუშ-ხამუშ მორცხობით  
ცოტა არ იყო უკვერდებოდნენ ღოყები, რომლებიც კიდევ  
უფრო ამშვენებდნენ იმასა; მაგრამ, როგორც სჩანდა, თუმცა  
მორცხობდა ჩენს ვჩუმს გულს თქმათ, მაინც შიგა და შიგ ქიშა  
ქვეშ ისე გამოგვყურებდა თავისი მაცდური თვალებით, თითქმის  
ქო გვეუბნებოდა: ვაი თქვენი ბრალიცა, რა უხეიროები ხართო.

როდის-როდის მღვდელმა დაასრულა ღამის პირის ღოყა-  
ვა. ღამის მთველებმა, რომ ძილი არ მოსვლოდათ, დაიწყეს,  
ერთმანეთში მასლაათი, ზღაპრების თქმა და სხვა ამბების მო-  
გონება. ერთი ახალგაზდა ბიჭი უამბობდა თავის ტოლგაყვას თა-  
ვის ქიდაობასა.

— მოვიკიდე, ძმავ, და მე შენ გითხრა, ინაღამ ნაპოქუნე-  
ბი გამაღინა. დაუსხლტი კიდევ ხელიღაშმა. დაუტრიალდი ერ-  
თიც კიდევ, დავიწოქე და ევჰჰეიქე... სწორედ საროზგე რუსი  
საღდათივით-კი გადავმოტიქე. ამიტაცა, ბიჭო ბატონი სიძემა  
და როგორც თავი რომ შევრთს ისე მკოცნიდა... ღმერთმა აღღე-  
ვრძელა, ერთი-კვირა ქრელი მანათიც ჩამიღო ხელშია.

მეტი-არეღვან ერთი შუა ხანს გადასული გლეხი ელაპარა-  
კობდა თავის ტოლსავე გლეხსა.

— ამითანა გასავერანებელი წელიწადი არა ყოფილა. მუქა-  
ზედ დაყრა რა არი, მუქაზედ დაყრა არ მომივიდა. ამოდენა  
ქულფათობა რითი უნდა გამოგვებო არ ვიცი. აქამდინაც რა-  
ღაც ღვთის მადლი ტრიალებდა, თორემ ეპეი!.. ძან გაჭირე-  
ბული ვიყავით... თესლი თესლათ დავლუბეთ... საქონელი გა-  
დასახადებში წაიყვანეს... მე შენ გითხრა, დიდი საცოდაობაა.

ჩვენ თავსა რო დავეფიქრდეთ... ზოგჯერა, ძმავ, მთელი დღე გავა ნაცარკვერი არ გაჩნდეს ჩვენ სახლში:

მესამედგან ისმოდა:

— აზნაური ჩვენოდენას ვერ აიტანს. აი, ძმავ, ზაალი. რაც მაგას ჯაფა გამოუვლია მარტო შევიღების დაზრდაზედ (ის ლაპარაკობდა მამაჩემზედ) იმას ვერც ერთი აზნაური ვერ შესძლებს. სად შეუძლიან ზაალსა, რომ ჩვენოდენა ღამე გარეთ გდება გამოიაროს. თავი არ მამიკვდება ისეთ ავდარსა და ყინვაში ვვდებულვარ გარეთა, რომ ცა ინგრეოდა. ჯერ მარტო შენ ისა თქვი, რაც გლეს-კაცი ღამე მეხრეობაში ჯაფაშია... ზოგჯერ თითო კვირაობით ცარიელი მქადის ამარა ტყეში გდიხარ. ერთხელ, ტივების საქრელათ რო ვიყავით, მთელი კვირე ისეთი ტეხრა აგვიტყდა, რომ ჩვენი ძვალი და რბილი კვლარათი ვერ გვათბეთ. ერთი უზარ-მაზარი ხე მოტეხა ქარიშხალმა, სამ-სამი კაცი კინალამ ქვეშენეთს ჩავვიტანა, უღელი კამბეჩი როგორც კვერცხი, ისე ჩასრისა. სად შეუძლიან აზნაურ გსეები.

მეოთხეთგან ორი პატარძალი მისხდომოდნენ ერთმანეთს, ჩურჩულობდნენ და ხშირათ იყურებოდნენ ჩუმად ჩვენსა და ჩემს გვერდით მჯდომს პატარძალზედ დაცინვითა.

მკვრები ზოგან ჩაჰქრენ და ზოგან ძლივს-ღა ჰბეუტავდნენ. მე ველარ შევიმაგრე თავი და ჩამძინებოდა. კაკლის კუნძი, რომელიც ჩვენ ცეცხლობას გვიწევდა, ახლა აღარც-კი ჰყრჩოდა და მხოლოდ იჟლინთებოდა. დარბაზში არ იყო სიცივე, რადგან ამოდენა ხალხილის ოშხივარი სრულიად საკმაო იყო, რომ გამთბარიყო ისა. ამისგამო მეძინა ტკბილათა და მელანდებოდა სიზმარში სულ კარგი ნაზუქები, ქადები, რომელიც ყველიერში მეჭამა, კარგი ღორის სუკები. მაგრამ სიზმარშიაც მქონდა ჩანარჩუმებული, რომ თუ ამათა ვკამდი უნდა მომცდარიყავი...

ძილში უცებ შემომესმა ღვდლის ჯავრობა.

— თქვე ცოდვილებო, თქვენა! ერთი ღამე ვერ მოგიხმე-  
ნიათ და სხვა რა კეთილი უნდა გამოვიდეს თქვეგან! აკი ხეი-  
რიც იმიტომ გაყრიათ, რომ ღმერთზედაც და ხატზედაც ხელ  
აღებულები ხართ!

ამ ხმაურობაზედ, დაიწყეს შიგა და შიგ ადგომა და თვა-  
ლების ფშვნეტა. გარდა ორიოდ ბებერი დედაკაცისა, რო-  
მელნიც საცალას კუნჭულში მიმსხდარიყვნენ, ყველას ეძანათ  
მაგარის ძილითა.

მე წამოვიწიე ასადგომათა. ჩემს მახლობლათ ჩემს მეზობელს  
პატარძალს ეძინა მაგრა ზე ხელები ჰქონდა ჩემს მუხლებზედ გად-  
მოყრილი. გავსინჯე კარგათ, სწორეთ პატარძალის ხელები იყო,  
მსუქანი ფაქიზი... ვიღამაც წააყინჟილა ცეცხლი. მე ავიმარ-  
თე უცება. ღვდელმა აანთო ჩალის სამთელი. გაჩაღდნენ მკვრე-  
ბი. წამოიშალნენ ყველანი. გაჩაღდა შუალამის ლოცვა. დე-  
დამთილმა შენიშნა პატარძალს ამგვარი მოურიღებლობა და  
ლანძღვით გადაათრია იქითა. ნამძინარევი პატარძალი, წით-  
ლათ ლოყებ დაკვერებული, კიდევ უფრო ჰშვენოდა...

გათავდა შუალამის ლოცვაცა, რომ მე სრულიად არ გამი-  
გონია ის ღვდლის ლულულულიცა, რომელიც წინათ მესმოდა  
ხოლმე. ღამის მთევლებმა დაიწყეს ისევ ღაღანი და ლაპარაკი,  
რომ ძილი არ დარეოდათ, მე პატარძლის ფიქრში ვიყავე . . .  
. . . ამაში დამძლია ისევ ძილმა და ამოუშვი ფშინვა. მძინავს  
და ვხედავ ჩემს თავს ერთ რაღაცა უდაბურს ყრუ ადგილას,  
ტყეში, რაღაცა წყლის პირას. ნაცნობი პატარძალი გამოდის  
ტყიდან დედიშობილა, შვენიერი, სპეტაკი, სრული, გაშლი-  
ლის კავებით, ათვილიერებას მორცხვით აქეთ-იქით, ხომ არა-  
ვინ მიყურებსო და დამშვიდებული ამ მხრივ, შედის მუხლამ-  
დინ წყალში და ბანაობს. მე ვგრძნობ, რომ ვარ სიზმარში,  
რომ ცხადლივ ამას მე ვერა ვნახავდი. . . . .

როდესაც გამაღვიძეს, ცისკარზედ წასასვლელათ, ვგრძობ  
რომ ამ სიზმარმა მამაცდინა ზიარებასა. გულ-ჩათუთქული.

დავბრუნდი შინა და უთხარ დედაჩემსა, რომ სიზმარმა მამაც-  
დინა მეთქი წმინდა საიდუმლოსა. დედაჩემის ღვთის მოყვარე  
გული ააშფოთა ამ ჩემმა უწმინდურებამ.

— როგორც შენა ხარ ღმერთზედ ხელ აღებული, აკი  
ღმერთიც ისრე გიმართამს ყველაფერში ხელსა! რომ ჩემს  
წასაწყმენდათ არ გამჩენოდი და გამწყალებოდი მუცელში, ის  
არ მერჩივნა, შენ ჩემო სულთამხუთაო! თათარმაც-კი იცის  
თავისი რჯული და ლეკმაც, — შენ ხომ ქრისტიანი ხარ, შე  
ქრისტესაგან არ გასაშვებო! — გაათავა ამითი ჩემი ზიარების  
მოცდენა დედაჩემმა.

გამიხდა ხელმეორეთ მოსამზადებლათ საქმე. მე მეორე  
კვირასვე დავისწყე ისევ მზადება. გულში თანა ვჯავრობდი პა-  
ტარძალზედ და თან-კი სიზმრათაც მენატრებოდა იმისი შეხვედ-  
რა. ზიარების ღამეს, რომ კიდევ რამე ამგვარი საქმე არ დამ-  
მართოდა, ისე გავიჭირე საქმე, რომ მთელი ღამე არ დამიძი-  
ნია. ვეზიარე და, თითქო რაღაც საპალნე ჩამომეშვა მხრები-  
დამა. თუმცა მთელი ღამის უძილო ვიყავ, მაგრამ ვგრძნობდი  
როგორღაც თავს მსუბუქათა. ამ დღეს ჩვენები ყველანი ეზიარ-  
ნენ და ამის გამო გვქონდა კარგი სადილი: ლობიო შექამა-  
დათ და სირსვლათ, ბაკლა, ქინძარი ნიგვზითა, და ასე გასინ-  
ჯე ხიზილალაცა, რომელსაც თუმცა ცოტა ხავსიცა ჰქონდა  
მოკიდებული და სიმძაღეც შესული სიძველისაგამო, მაგრამ  
მანც ხიზილალა ერქვა და აღვიძებდა ჩვენს მადას ახირებუ-  
ლათა. გვქონდა ღვინოცა, რომელიც ერთი ნახევარ თუნგი  
გამოერთმიათ საცალას გლეხ-კაცებში. მქადის მაგივრად გვქონ-  
და პური და ისიც გამტკიცული. ერთის სიტყვით, შემდეგ ამ-  
დენის შემშლისა, მე ამ სადილს ვრაცხდი შეუღარებელ სა-  
დილათ და ამ დროს თვით ია ბუჭყიაშვილთანაც რომ დავე-  
პატიჟნე ვისმე სადილათ, არ წავიდოდი, რადგან დარწმუნებუ-  
ლი ვიყავ, რომ ამაზედ უკეთესი სადილი ძნელათ თუ ვისმე

ექნებოდა. ამასთან ტკბილიც არის შენს სახლში მაძღრისათ გემრიელი ჰურის ჭამა, როდესაც ამგვარი სადილები იშვიათია შენს შინაობაში.

მეორე დღეს კიდევ მქონდა თავისუფლათ ჰურის ჭამის ნება და მასუკან ისევ მარხულობა მთელი კვირა. მერე, თუმცა ზიარების მარხულობა არ მედო წინა, მაგრამ მაინც ისევ იმგვარი მარხულობა, რომ დღეში ორჯერ შეგეძლო ჰურის ჭამა. ყოველივე ეს იყო ჩემთვის მეტად სამძიმო და ვგრძნობდი რომ ამ გვარის დამშევით უფრო ბევრს ვცოდავდი ღმერთსა.

მე იქნება კიდევ არ დამძიმებოდა ეს ცხოვრება, რომ პატარაობითვე არ გადავჩვეულიყავ ამასა. პატარაობითვე მე ჩავარდი ერთს სასწავლებელში მოშორებით ჩემის ქვეყნისა, სადაც, თუმცა არ იყო ბედნიერი ცხოვრება, მაგრამ მუცელი-კი ამაზედ მაძლარი მქონდა. ამასთან მე დაყავდით ყოველს თავისუფალს დროს ერთი დიდიკაცის სახლში, რადგან იმათ ქალებს მოსწონდათ ჩემი უცხო ტომის სახე და გცევა. ამ ცხოვრებაში მე დაყავ რამდენიმე წელი და თითქმის დაშავიწყდა ჩემი ძველი გარემოებანი. მაგრამ, როგორც ქართველები იტყვიან: საწყალს კაცს არც გასთენებია და არც გაუთენდებაო, — სწორედ ისე მომივიდა მეცა და ჩემს ქმობლებსაც. განებივრებული უცხო მხარეს დიდკაცების სახლებში, უცებ დავბრუნდი შინა და მივადევ ჩემ საცოდავ ღარიბ დედამამს კარსა, რომელნიც მოელოდნენ ჩემსგანთ დიდ საბოლოოსა და სიღარიბიდამ ერთხელაც არის თავის დაღწევას. ამ უცნაურის ამბით ელდა იმათი იყო გამოუთქმელი. რამდენი წვალება, თრევა, უკანასკნელი სარჩოს გაყიდვა დასჭირდათ ჩემი ალაგას მიცემისთვის, და ახლა, ასე უცებ, ყოველი ამაგი, ყოველი იმედი ერთბაშად მოესპოთ. იმათთვის იყო ელდა ჩემი დაბრუნება, მაგრამ ჩემთვის იყო ეს წმინდა წამება. როდესაც დავინახე ჩვენი ისევ ძველებური, თავიდან ბოლომდინ შა-

ვით გაქვართლული დარბაზი, სადაც თავზედ გვეყარა პურის გოგროხები, პურის კიდობნები, ცომის ვარცლები თავისი ცხვრის ტყავებითა, სარეცხის ვარცლები, თაბხები, ხონჩები, გულდები, ტომრები, ქილობები, მთელი და დანტვრეულ დაღწეული ქილები, ქოხნები, კოკები და სხვა ათასი ჩიხო-მახო; როდესაც დავინახე წიწილ-კრუხი, რომელიც ზედ თავზედ გვასხდებოდნენ, ძაღლები, ღორები, თხები, რომელთათვისაც ყოველთვის ღია იყო ჩვენი სახლი და რომელნიც ჩვენ არც-კი გვეკუთნოდნენ,—მე ამეშალა სევდა და წარმამიღდა დაკარგული ნეტარება. მე ჩემს თავს ვგრძნობდი უცხოობაში, მე ვერ წარმამედგინა, რომ ეს იყო ჩემი სამშობლო სახლი, სადაც პირველათ დავინახე მზის ნათელი, სადაც პირველათ შევისუნთქე ჰაერი, სადაც პირველათ გავიგონე ტკბილი ალერსი და მწარე წყევლა ერთმანეთში არეული. მე მიდულდა და მიჩუყდა გული, მე ვექებდი მარტოობას, რომ არც-კი მინდოდა გამეზიარებინა არავისთვის ჩემი სევდანი, რადგან ვიცოდი, რომ ამ სევდას ვერავინ მიმიხვდებოდა, რადგან იმათ ამაზედ უკეთესი ცხოვრება არ ენახათ. დავიხელებდი მარტო თუ არა თავსა, ვიქარვებდი სევდას ცხარის ცრემლებით. მე შემძაგდნენ ყველანი ჩემს გარშემო, რადგან ისინი არ ჰგრძნობდნენ და ცივათ უყურებდნენ ჩემს მწუხარებას. მე უყურებდი იმათ, როგორც არა ღირსთა და ამ სიღარიბეში ვხედავდი იმათ დამნაშავეთა. ისინი ჰგრძნობდნენ ყველას ამასა და მიყურებდნენ, როგორც მოკვეთილს ასოს.

ყველა ჩვენი სახლიკაცები, გარდა ერთისა, იყვნენ თითქმის ისეთივე ღარიბები, როგორც ჩვენა. გარჩევა ჰქონდათ ერთმანეთში ძალიან მცირე, მამაჩემი გააღარიბა კიდევ იმან უფრო, რომ მოუწინა შეიღების სასწავლებელში მიცემას. სხვებს არც შეიღები დაეზარდნათ. «მამა პაპათ თუ არ უსწავლიათ, გაიძახოდნენ ისინი, მე თქვენ მოგახსენოთ ვერ უცხოვრიათ!» მამა პაპანი, მარცალია, სცხოვრობდნენ, პურს და ღვინოს მო-

ქარბებულები, მაგრამ ეს იმიტომ ჯერ რომა იყვნენ ცოტა და მამულები ჰქონდათ საკმაო, რომელნიც წელიწად გამოშვებით მაინც ისვენებდნენ ხვნა თესვისაგან; მეორეც იმიტომ, რომ თავის ბატონობას არაფრად აფასებდნენ და მუშაობას არა თაკილობდნენ. ახლა-კი სულ სხვა იყო. სადაც აქამდინ ერთი პატრონი იყო, ეხლა გახდა ხუთი და ექვსი; მიწა, რომელსაც აღარ ჰქონდა დასვენება, თან და თან იღლებოდა და მოსავალს იძლეოდა ნაკლებათ. ამასთან, ახლანდელი ბატონები თავის თავს უყურებდნენ ნანდილ ბატონათა და შრომა მიჩნდათ სათაკილოთ. ამისგამო ცხოვრებაც იმათი ჰხდებოდა უკანასკნელი და ყოველად გონებისა და გრძობის დამშობი იმათთვის, ვინც ვარეშე ამ ცხოვრებისა არა ჰხედავდა სხვა უკეთესსა.

რაკი ამ ნაკლებულებაში ჩავვარდი, როგორც ზემოთაც იყო ნათქვამი, მე ახირებულად მიღრინავდა გული. ჩემი სახლში მოთმენა შეიქმნა შეუძლებელი. რაკი ერთი და ერთი დამატყეს, რომ ჩემი გული არ ურიგდებოდა ამ ცხოვრებას და სახსარი-კი არა ჰქონდათ, რომ აქედამ ვეხსენით, რადგან მამა ჩემს აღარ მოსდევდა აღარც მუხლები და აღარც შეძლება ჩემს საქმებზედ სათრეველათ, შინაურებმა თან და თან შემაჩვიეს პირი. რამდენიც ისინი ჰკარგავდნენ ჩემს ხათრს და თავაზას, იმდენი მე უფრო ვლელდებოდი და ვაგრძობინებდი ჩემს უკმაყოფილებას. რამდენიც მე ვაცხადებდი ჩემს უკმაყოფილებას, იმდენი ისინი მიდგებოდნენ ჯიბრში, და ბოლოს მექცეოდნენ სრულიად უკანასკნელად. ეს კიდევ უფრო მიწყლავდა გულსა და ხშირათ მომდიოდა ფიქრი, რომ მოვრჩენოდი ამ ცხოვრებას, ერთხელ და ერთხელ ამელო თავზედ ხელი და გამოვსალმებოდი წუთისოფელს. მაგრამ ამ დროს საიდამდაც გამომიტყვრებოდნენ ტკბილი იმედები და მიფანტავდნენ ამ სულ მოკლე, ან, ვინ იცის, იქნება სულ გრძელ აზრსაცა.

ერთად ერთი ნუგეში იყო ხოლმე ჩემი ამ ჩემს მდგომარ-

საქმეში დედაჩემის ეფემიას სახლი, რომელიც იდგა ჩვენი სოფლიდამ ერთი ოცდაათს ვერსზედ.

დედაჩემი არ იყო ჩვენსავით ღარიბათ, თუმცა ოჯახში მარტო ეს იყო გამგებელი, რადგან ქმარი, იოთამ ნაწრეტი-შვილი იყო უფრო ფილოსოფოსი, ვიდრემ მშრომელი კაცი. ის, მუდამ ამოგანგლული ბუნებულებსა და ბურტყულებში ტანისამოსით ლოგინში გდებისგან თავის ერთ ჯურღუმელო ოთახში, რომელიც აქამდინ საკუქნაოთ ჰქონდათ ამათ, კარგა გძელის თმით, რომელიც გარშემო კინკრისისა ქოჩრის ქვეშ ჰქონდა გამოპარსული, იმერულის გძელის გაწკვილის ინით შეღებილის უღვაშებით,—ეძებდა ყოველს მარჯვე შენტხვევას ვისთანმე გაბაასებისას და ემუსაიფებოდა ყოველს გამვლელს-გამომვლელს. იმას მეტადრე უყვარდა ბაასი მოსწავლე ახალგაზღებთან. ის თავის თავს ჰრაცხავდა მართლაცა-და სწავლულათ, თუმცა თავისი დღეში წიგნი ხელში არ აელო და არ იცოდა არც კითხვა, არც წერა და არც გაურახს იქით სადმე წასულიყო, სადაც თავის ყმაწვილობაში ჰხლებოდა ერთს რომელდასაც სარდალს თუ სარდლის შვილს ორბელიანსა. ქალაქიც, თავის სიზარმაცის გამო, არ ენახა ერთხლის მეტად, ისიც თავის ყმაწვილობაში, უცოლობის დროს, სადაც ერხელ დიდის სარდლისა თუ სარდლის შვილისთვის ეყიდნა ერთი მანეთისა მთელი ჯორის საპალნე მწვანილი, რადგან მანეთის ხურდა არა ჰქონოდათ და მიეცათ მთელი მანეთი, იმ ფიქრით, რომ თითონ მიხვდებოდა და იყიდდა ხუთი გროშის ან შაურის მწვანილსა. მეცნიერებაზედ-კი თავს უფრო იმისთვის სდებდა, რომ, როგორც თითონ ამბობდა, იყო დიდებულს სასახლეში გაზდილი.

მამულები ჰქონდათ ამათ საკმაო. ესენი იყვნენ მონახვერენი რამოდენისამე ბიძაშვილისა, რომელთაგანაც ბევრნი რამდენსამე წილად იყვნენ გაყრილნი, და რომელნიც მომეტებული ნაწილი იყვნენ ძალზედ ღარიბები. ესენი ყველანი სახ-

ლობდნენ ერთს ალაგას და გაჰყურებდნენ ერთმანერთის ჯამსა და კოვზსა.

ამ ყველა სახლიკაცებს ჰყვანდათ ერთი მონახევრე, ბაადურ ნაწრეტიშვილი, რომელიც მართლაცა და კარგი შეძლების პატრონი იყო. იმას ეყოლებოდა ორმოც კომლამდის კაცი, მრავალი ჰქონდა სახნავ-სათესი სამკვიდრო და ნასყიდობა, უზარ-მაზარი დიდი ზვარი, დიდი გაშლილი კარმიჯამო, კარგს პლანზედ აშენებული დიდი სასახლე ზედ ციხეზედ მიდგმული, ფული მრავალი გაცემული, რომელიც ყაზახ-ბორჩალოში დიამბეგად მყოფობის დროს ეშოვნა; თითონ სუფთა ცხოვრება. შვილი ჰყვანდათ მარტო ერთი, რომელმაც ამ ორი წლის წინათ დაასრულა გიმნაზია და იყო წასული უნივერსიტეტში. ამათ მოსდევდათ მრავალი დიდკაცობა და მოსამართლენი. სახლიკაცებს სრულიად არ მოსდევდა და უყურებდათ თაკილითა. სახლიკაცობა და მეზობლობა უყურებდა ამის ცხოვრებას შურიითა და ინადითა და ყოველს შემთხვევაში ცდილობდნენ, რაშიაც-კი მოასწრებდნენ, ჩუმჩუმით ამის ზარალსა და წყენასა. ცოლათ ამასა ჰყვანდა ერთი თავადიშვილის ქალი, სახელათ სიღანია, რომელსაც ეგრეთვე მოჰყვა საკმაო ყმა და მამული მზითევში...

ამ ბაადურს გარდა ნაწრეტიანთში ყველაზედ კარგათ იყო ქმარა დედაჩემისა, იოთამ. სხვები იყვნენ სულ წისქვილზედ დასაფქვავები.

მაშინ, როდესაც იოთამი უნდებოდა მარტო ფილოსოფოსობას, დედაჩემი იდგა მთელი დღე ფეხზედ, აკეთებდა თითონ საქმეს, ადგა მუშებს თავსა, აძლევდა თავდარიგსა, ჰგზავნიდა ტყეში, აბარკინებდა, ასწვლეფინებდა, ალობინებდა, ალექს ვინებდა. ერთის სიტყვით ის იყო დაუცხრომელი და სასტრუქი ჯანიანი მუშა დედაკაცი. პატარას ხანს ცოტა არ იყო ქმარძალას ატანდა, მუშას თავს დასდგომოდა და ეკეთებინა საქმე, მაგრამ, რა-კი დაატყო ეს თავის ფილოსოფიით

მხოლოდ აცდენდა მუშებსა, საქმის გაკეთების მაგიერათ, მაშინ ამან შესცვალა თავისი აზრი და მიანება ქმარს სადავებო საფილოსოფოთ, მხოლოდ შიგა და შიგ კილევ ვალათა რაცხ-და დაეტუქსა უსაქმოზისათვის და ძალა იყო თუ ნება ანდობ-და წყრილმან საქმეებს, სადაც ვისთანამე ვერ იფოლოსოფო-სებდა ესა.

ამათ, ერთის ქალის მეტი, სხვა შვილი არ მისცემიათ და ესეც შიეცათ სიბერის დროს. ეს იყო ეხლა ჩვიდმეტ-თვრამე-ტის წლისა და სიმხვევით სახიერი დედა. ეს ერთი ორიოდ-სამი წელიწადი ებარა კიდეც ზავედენიაში თუ ინსტიტუტში; მაგრამ შემდეგ, რაკი ფული ვერ შეჰქონდა იოთამს, ანუ უკე-თა ვსთქვათ, დეიდაჩემს, დაითხოვეს სასწავლებლიდამ და და-ბრუნდა შინა. კატოს—ეს იყო იმის სახელი—გარდა თავის სიმხნევისა, უყვარდა საშინლათ წიგნები. ძვირათ იპოვებოდა ქართული წიგნი, რომ კატოს არა ჰქონოდეს წაკითხული და თითქმის გაზეპირებული: «ვეფხვის ტყაოსანი» იცოდა რო-გორც თავის ხელისგული. ყოველს მოცლილს დროს მოისვამ-და ამას თავის მამა და აკოთხებდა «ვეფხვის ტყაოსანს», „მი-რიანს“, „დავრიშინს“, „ამირან-დარეჯანის“, „ბეჟანინს“ „ვისრამიანს“, „სირინოზიანს“ და მეტადრე უყვარდა „გიორ-გი მილორდის“ ამბავი, რომელიც არ მეგულებოდა, რომ ქა-რთულს ენაზედაც ყოფილიყო გარდმოღებული. ამათ გარდა საიდამლაც ჩავარდნოდათ ბაუმეისტერის ფილოსოფია, ალექ-სანდრე მაკედონელის ცხოვრება, სომხურიდამ თარგმნილი, ღვთის მშობლის ცხოვრება, ეგრეთვე სომხურიდამ; ფრან-გების «სამოთხის კარი» და სხვა და სხვა. გარდა ამ ქართუ-ლის წიგნებისა ამათ სახლში იპოვიდით რუსულს წიგნებსაც, რო-მელიც დარჩა უშვილოთ ამოწყვეტილის იოთამის ძმის, იოკი-მე ღვდლის სიკვდილის შემდეგ, რომელიც იყო სემენარიაში გაზდილი. თქვენ ჰნახავდით აქ *«Кадмъ и гармонія»* ხერასკო-ვისა, *«Странствование Телемака»* „Путешествіе Гули-

вера“ სვიცტისა, „Разсужденіе о превосходствѣ Провославноѣ Каѳолической вѣры“, „Гомилетика“, „Герменевтика“, „Догматика“ და კიდევ სხვანი. ესენი ყველანი გადაკითხული ჰქონდა კითხვის მოსიყვარულე კატოსა, თუმცა, თქმა არ უნდა გომილეტიკიდან, გერმენევტიკიდან და სხვა ამგვარებიდან თავბრუს დახვევის მეტი არ გამოჰქონდა-რა. ამასთან კატო იყო საშინელი მოსიყვარულე გულისა და ღმობიერის ხასიათისა. იმისი სილამაზე იყო წმინდა ქართული სილამაზე: შავი კუნაპეტივით, კილოიანი ცოცხალი და ცოტა ჩაფიქრებული თვალები, გრძელი და ყორნის ბოლოსავით შავი თმა, შავი თვალ წარბი, სწორე, ცოტა მოგრძო სუბრთა, ოდნე ნესტოებ უკან გახეული სოთი ცხვირი, შაქრის ფერი პირის სახე, მაღალი და სრული ტანი, ალისფერი, მუდამ კმაყოფით მომღიმარე ტუჩები, გახსნილი და გადაშლილი შუბლი, რომელიც ძვირათ თუ შეიკმუხნებოდა. აუჩქარებელი სახის გამოთქმულებასა, ყოველს იმის მოძრაობას და მოქმედებაში გამოსქვირდა იმედი თავის თავისა და დაბრკოლებისა მოურიდებლობა... თვალები ამისი დღესაც ცოცხლათ მიდგია თვალწინა: ისინი პირველსავე შეხვედრაზედ თითქო ჰგრძნობდნენ შენს მწუხარებას და იღებდნენ მონაწილეობასა შენს სევდასა და გულის დარდებში და ამასთან თითქო გეუბნებოდნენ, რომ სამწუხაროა შენი სევდები, მაგრამ რამდენიც უფრო აპყვები, უფრო დაგიმორჩილებენო. ლაპარაკიც ისეთი ჰქონდა, რომ მაშინათვე შეეკვეთებოდა კაცი, თითქო ამისთვის დაფარული არა არის-რა არავითარი შენი გულის პასუხი, და ამათი განკურნება მხოლოდ ამას შეუძლიანო.

როდესაც ასე უწყალოთ მეჩაგრებოდა გული იმ საშინელი თავ-დაულწეველი სიღარიბით, რომელიც გაიხსნა ჩემ წინ შემდეგ ჩემის სასწავლებლიდან შინ დაბრუნებისა; როდესაც მე ყველა და ყველას მე შევძაგდი, მაშინ მხოლოდ ამაში ვნახე ჩემი გულის შემატკივარი; მე მხოლოდ ამას დაუახლოვდი და

მიყვარდა ამასთან ყოფნა. ჩვენ ვიყავით ტოლები და თითქმის ერთათ შეზღილები. იმასაც მართლაცა და უყვარდი, არა ჰყვანდა ძმა და ჩემში ჰპოვებდა ძმის მაგიერსა. იმას უყვარდა ჩემი ლაპარაკი, ამბები იმ უცხო ქვეყნებისა, სადაც მე მევლო და მესწავლა, რომელთაც, თუმცა მეც ცოტას ვიცნობდი, მაგრამ იმაზედ მეტი ცნობა იმათი მაინც მქონდა. ერთის სიტყვით, იმას ჰქონდა სურვილი გაეგო რამე ქვეყნისა, შეეტყო რომ არის კიდევ სხვა ქვეყანაცა, სხვა ცხოვრებაცა გარეშე იმისა, რომელსაც ისა ჰხედავდა; და მხოლოდ ჩემის ტიკტიკით იკლავდა ამ წყურვილის ძალასა.

— მე მიყვარდა კატო, მე მიყვარდა დეიდაჩემის სახლიცა, სადაც არ ვხედავდი არც ისეთს სიღარიბეს, არც ისეთს ვიწროობას, არც იმ კაცთა, რომელნიც ნიადაგ ჯობრში მიღგნენ და მიწყლავდნენ ცხოვრებას. ამისგამო მე ვიყავ ხოლმე ამ სახლისა ხშირი სტუმარი, სადაც ჩემი ყოფნა ჰქონდათ ყოველთვის სასიამოვნოდ.

სწორედ ეს დიდ-მარხვა იყო, რომ მე აღარ დამიღვა გული შინა ამდენის უსიამოვნობისა და მოთმინებისაგან. მე გავეცალე ჩემს სახლს დეიდაჩემთან პატარას ხანს გულის დასამშვიდებლათ და, სწორედ უნდა სთქვას კაცმა, მუცლის ამოსაყორათაც.

როდესაც შევედი შინა, კატო უჯდა ქორგასა და ჰკერავდა ოქრომკედლის თავსაკრავს. ჩემს დანახვაზედ კატომ აგდო ქარგა და გამოექანა ჩემსკენ.

— ძლივს! — შესძახა იმან და გადამეხვია ყელზედ.

იმისი ასე სიხარულითა და წრფელის გულით მოგებებაზედ, მე თითქო რაღაცა მომეშვა გუნებაზედ.

— კარგი არის შენგან ესე ჩვენი დავიწყება! ვილა გვყავს შენს მეტი, რომ შენც ეგრე გვივიწყებ. როცა შენ აქა არა ხარ, ისე მგონია გულზედ რაღაც მომწყდა მეთქი. დეიდაჩემი

ხომ სულ კბილებს იღესამს შენზედ, რომ ამდენს ხანს აღარა გენახაო.

მე, პასუხის მაგიერათ, გავჩუმდი, რადგან არც-კი ვიცოდი, რა უნდა მეთქვა, რაკი ჩემი წასვლა და აქ მოსვლის დავიანება წარმოსდგებოდა მხოლოდ ისევე ჩემი ამპარტავანის გულისაგან, რომ არ შემემჩნევინა ამათვის მიზეზი ჩემი აქ ხშირად ყოფნისა და მასთან არ მიმედწევენა იქამდინ, რომ ჩემი სტუმრობა გახდომოდათ სამძიმოთ.

ღეიღაჩემი და იოთამ არ იყვნენ შინა. ერთი იყო ვენახში და აკეთებინებდა მწვანილების კვლებსა, და მეორე იყო შუადღის ლოცვაზედ.

დამსვა თუ არა კატომ, ის მაშინვე გაექანა საკუქნაოსკენ.

— შენ ხომ გიყვარს ჩემი გაკეთებული ჩურჩხლები! ასეთი ჩურჩხლები გაქამო, რომ კიდევ უფრო მოგეწონოს. ახლანახვ ყურძენი, როგორ ლამაზათ შევინახე ხის ნახერხში. შენი წილი ყველაფერი ცალკე მაქვს შენახული. შენ-კი აღარც-კი გახსოვართ, რაკი ერთი თვალს მოგვაშორებ.

პატარას ხანს უკან კატომ შემომიტანა მშვენიერი თეთრი და რბილი ჩურჩხლები, სუფთათ შემწვარი ჩამიჩი, მშვენიერათ შენახული ჩირი და ტყლაპი, და ისეთი მშვენიერი ყურძენი, თითქო ეს არის ეხლა ჩამოუკრეფიათ ვაზიღამაო. მე სიამოვნებით დავუწყე ყველა ამას ჰამა.

— მინამ შენ მაგას შეექცევი, მე საჩქაროზედ კარგ სადილს მოგიზადებინებ, რომ მალე არ აიყარო შენებურათ ჩვენზედ გული და კვლავინდებურად ერთი კვირის უკან არ გაგვექცე. ასეთი წნილები მაქვს შენახული, რომ მართლაცა და მოგეწონოს.

კატო დატრიალდა სათონეში, რომელიც აგრეთვე იყო საწმინდოლოცა, მოახდევინა მარანში წნილები და დაბრუნდა ისევე საჩქაროზედ.

— რო იცოდე, რა მშვენიერი ამბავი მრმივიდა ჩხლა ცის-

კარში დაბეჭდილი. ჩვენს მღვდელს უშოვნია სადღაცა და მე გამოვართვი ეხლა, „მარიინ დელორმის“ ამბავი. ვაი ჩვენი ბრალიცა! ქვეყანაზედ ვინ იცის რა არა ხდება. ბევრი ვიცინე ძალიანა.

აქ კატო ავიდა ტახტზედა და ჩამოიღო განჯინიღამ «ცისკრები», სადაც ეს რომანი იყო დაბეჭდილი.

— ღმერთმა უშველოს ჩვენს მღვდელსა, ის, სადაც არა მგონია შოულობს ამისთანა წიგნებსა და გვაძლევს ხოლმე. მამაჩემს უყვარდა წიგნები, უნდა ჩვენც დაგვებარებინა, სადაც ეს წიგნები გამოდიან და ვერაფერი გავიგეთ—რა, როგორ უნდა დავიბაროთ.

მე ჩამოვართვი წიგნები და ვსინჯავდი, რომ ამ დროს გაეღო კარები და შამოვიდა ერთი ესე ოცდა ორის ოცდა სამის წლის ყმაწვილი კაცი, საშინელი გამხდარი; მაგრამ ამ სიგამხდრეშიაც სჩანდა კიდევ ამ ყმაწვილის სილამაზე და შთაბეჭდილებიანი სახე. ის იყო ევროპიელათ, სუფთათ ჩაცმული, ოდნავ წელში მოხრილი, სათვალეებითა და ახლად ამწვანებულის წვერულვაშით. ეს იყო ერთად ერთი შვილი ამათის მდიდარის სახლი კაცის ბაბურისა, ვასილ, რომელიც დაბრუნებულიყო უნივერსიტეტიღამ ავადმყოფობისა გამო.

იმან ჩამოგვართვა ორთავეს ხელი.

— თქვენ მაინც არა გვანახეთ,—დაიწყო ვასილმა,—და ისევ, რაკი ცოტა უკეთ შევიქენ მე, ავადმყოფი კაცი, წამოველ თქვენ სანახავათ. საკვირველია, ისე გვერიდებით ყველანი, თითქო მგლები ვიყენეთ. თქვენგან მაინც ეს კარგი არ არის, ეკატერინა იათამოვნა, რომ თქვენი ყმაწვილობა აღარ მოიგონეთ და ერთხელ მაინც არის არ დამხედეთ. გახსოვთ ჩვენ როგორ გვიყვარდა ერთმანეთი ყმაწვილობისას? აიქ, ვარდის ძირებში რომ მივიყუებოდით და ვჭამდით ხოლმე მოპარულს ხილსა! თქვენ ისევ ის ცოცხალი და მარილიანი კატო

ხართ, რაც მინახავხართ. თქვენი სახე ისევ ხატივითა მაქვს. დანახსოვრებული გულიში. რამდენჯერმე, ავადმყოფმა, ბალკონიდან მოგკარით თვალი. მამაგონდა ჩვენი უდარდელი ბავშვობა, მინდოდა დამეძახნა თქვენთვისა, მაგრამ, ვიფიქრე, ვაი თუ ისევ თავისებური გული აღარა ჰქონდეს, გაავპარტავენებულ იყვეს და უზრდელობაში ჩამომართვას ეს ჩემი გაკადნიერება, მეთქი, და ველარ გავბედე შეწუხება... მამაბეზრა თავი დედაჩემის ფარისევლობამ და მამაჩემის ნიადაგ ბრძანების კილოთი ლაპარაკმა, რომელიც ავადმყოფობასაც-კი უწყება.— სულ მენატრებოდა, ნეტა ერთი ისეთი სულიერი მიანიც ვინმე მიჩვენა, რომ პატარა ჩემიც ეყურებოდეს მეთქი.... ჰა, კატო!.. ახლა კიდევ უფრო გალამაზებულხართ, დამშვენებულხართ და, ვინ იცის, კიდევ გაავპარტავენებულხართ?!

— მერე აგრე უნდოდა, რომ პატარაობისას ისე გვიყვარდა ერთმანეთი, და, მასუკან-კი, რაც თათრებიდან დაბრუნდით და სახლები დაიდგით, თვეობით მოსულხარ და ერთხელ აღარც-კი მოგავიწყდით!

— ეგ ისე ჩემი დანაშაული არ იყო, როგორც ჩემი დედამისა. მაშინ მე ბავშვი ვიყავ და უჯერებელი იმათა. რაკი პატარა ფულები შეიძინეს და სახლები დადგეს, უცებ ამალდნენ თავის თვალში და არ უნდოდათ, რომ ჩვენ სხვა რიგი ცხოვრება გვენახა. ეხლა სულ სხვა არის. ეხლა შეეჩვივნენ და აღარც თვითონ უკვირთ თავისი მდგომარეობა. მერე ამ ჩემმა ავადმყოფობამ ბევრში ჩემი ნება გახადა ეგენი.

ამ დროს შემოვიდა კატოს მამა, იოთამიცა, რომელიც ის იყო მოდიოდა შუადღის ლოცვიდან.

— შეგეწიოთ ლოცვის მადლი! ოჰ, ბესარიონ! ოჰ, ვასილ! ეგ როგორ მომხდარა რომ გვიკადრე. მამაჩემი არ წამიწყდეს, რომ ეგ ჩემი ბიძაშვილი, ბაადურ, ისე არათ გვაგდებს, როგორც ერთს უკანასკნელსა. როდი უნდა, შვილო, აგრე გადიდკაცება, „რომელმან აიმაღლოს თავი თვისი, დამდაბლდეს, და რომელმან

დაიშინებოდა—ამაღლებს“. რაც უნდა დიდკაცობა მიიღოთ, მინც ერთი სისხლი და ერთი ხორცი ვართ.

— რა გაეწყობა, ბიძაჩემო, —წამოდგა და მივიდა ვასო ხელის ჩამოსართმევათ, —რაკი ეგრეთის ხასიათისანი არიან, მაგათი გამოცვლა ეხლა ძნელია. ისინი თქვენ გენდურაან, რომ ამისთანა გაქირვებაში ერთმა არავინ გარდმოგვხედა და არ დაგვხედეს, რა მოგვდისო.

— რა შეილო, ღმერთს ერწმუნე, ისე დაჩაგრულები ვართ მაგისგანა, რომ ხმაც ველარ გაგვიცია... დიამბეგები მაგისკენ არიან და ნაჩალიკები... ამოსვლა რო გვინდოდეს, ვერ გაგვიბედნია: ქოშებით ნუ შამოხვალთ, რომ ნალებიანია და პოლს წაგვიხდენსო, წადებით ნუ შამოხვალთო—პოლს გასვრითო, და, რაღა დროს ჩემ დროული კაცის ფეხშიშველა სიარულია! როდი უნდა კაცმა გაიკვიროს სარჩო, ყველა ღეთის მოცემულია. ღმერთი ზოგს ართმევს და ზოგს აძლევს: ყველა იმისი ნებაა, იმისმა მადლმა.

ამ დროს შემოისმა გარედამ ერთი საშინელი ძაღლის წკაწკავე და წკმუტუნი.

— ახა ღმერთო, შენ დამიფარე! შეიტია იოთამმა და გადიწერა პირჯვარი.—გაგონილა! მაგის შიშით ძაღლს ველარ გაუვლია კარმიდამოზედ.

იოთამ რომ ამ ჯავრობაში იყო, შემოისმა საშინელი გაცხარებული ჯავრობა და ძაღლის დევნა.

—ნძა, ნძა! შე რჯულ ძაღლო და შე გასავერანებელო, შენა! მე აგაწკმუტუნებ შენა! აააჰაი!!

ამ ხმაზედ, ერთი ძაღლი, რომელიც იწვა ოთახში, მაშინვე შეძვრა ღრმათ ტახტქვეშ და მიიყუჟა. რამდენიმე ძაღლი, რომელნიც იყვნენ კარებზედ, დაიკუმშნენ და, რაც შეეძლოთ, გადაევიდნენ ბაღის ღობეზედ. მხოლოდ ერთი მომცრო ტანის მწყემსის ძაღლი იქვე მიიყუჟა კარებთან და, რამწამს ჩამოიარა საშინელის კეტით ამ ძაღლების მდევნელმა, ის გაძვრა უცებ

კარიდამ, ეცა კანკში, გამოაფლითა ზორცი და ერთის თვალის დახამხამებზედ გაჰქრა. დაგლეჯილი ძაღლების მღვეწელი იყო. ბიძაშვილი იოთამისა, სოფრონ, ერთი ორმოც და ათი წლის კაცი. ამ ძაღლის კბენაზედ, სოფრონმა მოიხედა უფრო გაშმაგებულმა, მაგრამ ველარ დაინახა ძაღლი.

— ერთი უყურე ამ ტიალასა, რაქნა, ეე! სულ არ გამოაფლითა შარვალი. ამი მეტი შარვალი აღარც-კი მაქვს. დაგლეჯას ვინ ინაღვლიდა! ნეტა, ე შარვალი!.. ვაი დედჩემის ღმერთსა!.. ის უცებ დატრიალდა კარებთან და დაიწყო ყვირილი.

— გამოდი, გამოდი, იოთამ, თუ კაი დედიშენი შვილი ხარ! გამოდი, მეთქი და, მე გიჩვენებ, რაღაც ძაღლები არიან ე შენი ძაღლები! გამოდი, თორემ, ღმერთთა შენი თავდები, სულ მუსრს გავადენ აქაურობას!..

იოთამ მიიყუყა ბუხრის პირასა.

— რა, ღმერთს ერწმუნე, რომ ერთს სისხლს შეგვათხევს,—დაიწყო იმან დაბალის ხმით, თითქო ეშინიან, არ გაუგონოს ლაპარაკიო.

ამ ყვირილზედ შეგროვდა კარებზედ ხალხი და დაუწყეს სოფრონს შოშმინი.

— გამიშვით!—იძახოდა სოფრონ, თან-და-თან უფრო გაცხარებული,—გამიშვით ერთი ზედ თავზედ დავანგრიო მაგათ ე სახლი, რომ ამოვბუგო დედაბუდიანათა!.. გამოდი, იოთამ, თუ შენი ცოლის ღეჩაქი არა გხურავს, გამოდი!

— უი ჩემს სიცოცხლესა!—მოისმა ქალის ხმა გარედამ,—ეგ რა დაგმართვია.—და შამოიკრა ამ ქალმა თავში. ქალი იყო ცოლი სოფრონისა, თუთალა.

— არა, შენი ძაღლებისგან ეს უნდა მომივიდეს, შე გოგოჩუა, შე ქაჩუა, შე ნაცარქექია ფილოსოფელო, შენა, ჰა?! ერთი გამოდი ე შენი ძარის ბოძებზედ გიხალო თავი.—გაიძახოდა ისევ სოფრონ.

— უი შენს თუთალასა!— იცემდა სოფრონის ცოლი თავ-  
ში, — თქვენი ჭირიმეთ, ახალი შეკერილი შარვალი! უი, შე-  
ნამც დაგბრმავებია ე თვალები! არა, შე ბეხეკო, რას აპყო-  
ლიხარ ძაღლებსა და, სადაც არა მგონია, დასდევ? რა შენი  
ტოლები არიან ძაღლები, რომ პატარა აღუცასავით შენი ში-  
შით ძაღლები ვეღარ გამოჩენილან! აბა ახლა დაგდგომია შენ  
თვალი, აი! შენმა სიცოცხლემა ხვალ კიდევ ახალს შეგიკერამ!  
ექმდინ არ იყო კანკ გადახვეწილი დაეთრეოდი მთელი წე-  
ლოწადი! წამოდი დაეგდე შენს ქოხში, რომ სამარცხვინოთ არ  
დაეთრეოდე! მაინც ღმერთს არ უქნხარ და მაინცა, ისევ შენს  
ქოხში ევდო, ტანისამოსს მაინც არ დაიფხრეწ. ხო ჰხედამ, რომ  
ყველას ჩვენზედ უბრმავდება თვალები.

თუთალამ წაავლო ხელი და წაათრია სოფრონი, რომელ-  
საც სისხლის კვალი რჩებოდა უკანა, ქოში და პაჭიჭი სულ  
გაემსო სისხლითა.

— არა, ერთი გამოვიდეს და, უჩვენო მაგას თავის უნა-  
რი!— გაიძახოდა ცოლისგან წათრეული სოფრონი, — ერთი, ერ-  
თი ძალიან გავზურგო... ჰა! მაგისგან უნდა ეს დამემართოს!..  
შარვალი და მერე რა შარვალი!..

სოფრონის ხმა კარგა გაშორდა კარმიდამოსა. იოთამმა  
გაიხედა ფანჯრიდამ. კარებზედ კიდევ ტრიალებდა დარჩენილი  
ხალხი. სოფრონი აღარა სჩანდა.

— უუ! ერთი უყურე, რა ყოფა აქვს მაგ ცოდვიანსა!—  
აქ იოთამი უცებ წამოხტა, ჩამოიღო კედლიდამ ხმალი, იძრო  
და გავარდა. — გამიშვით ერთი მაგ ცოდვიანსა და ცოდვიანის  
შვილსა! გამიშვით ერთი გავძლე მაგის ხისხლითა, რომ მაგის-  
გნით მოსვენება აღარა გვაქვს და მაგის შიშით ძაღლები ვე-  
ღარ შეგვინახავს!.. — გამიშვით!!

დამკერი ღიდხანს არავინა სჩანდა, მაგრამ ბოლოს რო-  
გორღაც შეებრაღათ ამისი გამიშვის ძახილი და განგებ წაავ-  
ლეს რამდენიმე ყმაწვილმა მოძაღლებულმა ბიჭმა ხელი.

— რათ გეკადრება, ბატონო, შენი ქირიმე! თქვენც ხომ ჩვენსავით ბრიყვი გლექკაცი არა ბრძანდებით! რათ აკადრებთ მაგისტანებს თქვენს დიდკაცობასა!— ეუბნებოდნენ დამჭერი გლექები იოთამსა.

იოთამ, რამდენსაც იჭერდნენ, იმდენი უფრო ცხარობდა და იწევდა.

— გამიშვით, მეთქი, თორემ ღმერთთა თქვენი თავდები, თქვენ დაგკუწავით და ერთ სისხლს შემამთხვეთ.

საფლის დედაკაცებმა, რომელნიც იყურებდნენ ბაკებ-ქვეშ ამოყუჩულები, შეჰქნეს ამ ხმლის დანახვასა და ქნევაზედ საშინელი წივილ-კივილი და თმის გლეჯა.

— უი!— გაიძახოდნენ შიგა და შიგ გულ დახეთქილები— უშველეთ! უშველეთ!.. ვაი ცოდის ბრუნვასა!— ცოდო დააბრუნეს... ცოდოი!— და იწეწდნენ, რაც შეეძლოთ კავებსა.

— კაი სიამოვნებაში-კი უნდა იყვნეთ აი, ამისთანა ამბებისაგან.— უთხრა ვასიკომ კატოსა.

— ასე შეჩვეული ვარ, შენმა გაზდამა, რომ... ეგ ამბავი ხშირათა არის ჩვენში. ეგრე გაუხტებიან ერთმანერთს, იფაფხურებენ და, თუ არავინ გეერია, თითონვე შეირცხვენენ და დაანებებენ ერთმანერთს თავსა. მაგრამ დღეს ძიელ გაცხარდა ბიძაჩემი, ი შარვლის დახევაზედ. საწყალმა ძალუაჩემმა თავის ხელფასით ძლივს გამოუერთვა ოსის დედაკაცებს მაგისტანა მშვენიერი შალის საშარვლე, და ეხლა-კი ასე უცებ და უბრალოთ დაეგლიჯა.

აქ ვასილი წამოდგა და გამოესალმა.

— მშვილობით, კატო, იმედი მაქვს ახლა თქვენცა მნახავთ. ჩვენებს ეხლა ჩემი უსიამოვნო არა შეუძლიანთ-რა. მეც გასართობი არა მაქვს-რა: წიგნების კითხვა ჯერობით ბევრი არ შეიძლება, და თუ შენ ჩვენ სიყმაწვილეს მოიგონებ და ჩვენს მეგობრობასა, მარტოკა არ გამიშვებ... რო გიყურებ,

ისევ ის კატო ხარ, ისევ ის ცოცხალი თვალები, აუჩქარებელი გული, ტკბილათ მოლიმარი ტუჩები.

ვასილმა მაგრა მოუჭირა ხელი და გასწია.

იოთამ არა მშვიდდებოდა.

— ერთი უყურე ამ ქაჩუასა!— დაიძახა უცებ სოფრონმა, და გამოვარდა კეტით, შარვალ გახდილი!— ნახე როგორი ენა წაიგძელა!

— ახა! წაიგძელა რომელია!— დაიწყო დაშოშმინებით იოთამმა და აპირებდა ისევ შინ შეძრომას, რომ ამ ღროს სტაცეს სოფრონს რაჰდენმამე კაცმა ხელი და მაგრა დაბოქეს. ამაზედ იოთამ ისევ ისე გაცხარდა და დაიწყო ფაფხური. ხმალი ტრიალებდა და ელამდა შუადღის გაყუჩებულს მზეში. დედაკაცები იბღღვინდნენ თმებსა და იმით წივილ-კივილი აღიოლა ზეცასა.

ამ ღროს გაჩნდა ეფემია, რომელიც მოდიოდა ვენახიდან.

— აი, შენი პატრონის ბრალიცა! ვითომ ამასაც შეუძლიან რამე! რაო, რა ყოფა გაქვს კრუ ფილოსოფოსო?! მოიტა ე ხმალი აქა, ნუ აქუჭყიანებ! ვითომ ესეც ვაჟკაცია და ხმლის მოხმარება იცის!

— უ! ახა, ღმერთო! იცის რომელია!— ლაპარაკობდა იოთამ ამ მოულოდნელს ამბავზედ, რომელიც გულში ძალიან სასიამოვნოდ დარჩა.

აქ ეფემიამ სტაცა ხელი, წაართვა ხმალი და შამოაგდო შინა. მასუკან წაავლო თითონ იოთამსაც საყელოში ხელი, მოატრიალა კურტუკულმა და შეაგდო ისიც შინა.

— არა, რო შეგეძლოს რამე, შე საცოდავო, კიდევ შეგშვენოდა ეგ ფაფხური და ხმლის ტრიალი, რო არა შეგიძლიან-რა, რატომ არა დგები შენს ქერქში? აცლი და გაუბტები, რო ერთი დაგარტყას რამე და სული გაგამთხვეინოს.

— გამანთხვეინოს რომელია! ახა დიდება შენდა ღმერთო! გაგონილა!— არ იტეხდა კიდევ იოთამ ეხტიბარსა.

სოფრონიც შეათრის შინა.

## II.

დეიდაჩემისა და იმათი სახლიკაცების შენობაებს შუა იყო პატარა მეიდანით ადგილი, რომელსაც გარშემო ყველა იმათგანს ედგა სასიმიწდე ძარი. ამ მეიდანზედ, რომელიც იყო საზოგადო კარმიდამო, ალაგ-ალაგ ეყარა ქვეები, კაკლისა ან მუხის ხეები, თავხეები, ჯირკები და სხვ. აქ უყვარდათ ამ სახლის-კაცობას შეყრა და მუსაიფი ყოველ მყუდრო დღესა და თბილ საღამოსა. ერთი კარგი ზნე სჭირდათ ქმართა თუ რძალთა ამ გვარში: გუშინ რომ ერთმინეთი ცემით ამოეელიტათ, მეორე დღეს ეს მეიდანი ისევ შეარიგებდა: ყველანი აქ მშვიდობიანათ შეიყრებოდნენ და დაიწყებდნენ მუსაიფს.

ერთს ლამაზ მყუდრო მაისის დღეს, რომელიც დადგა რამდენიმე დღის ავდრის უკან, და როდესაც ყოველი ხვნათესვის პატრონი მიაშურებდა მამულებსა, ვენახებს და ბოსტნეულებს, თითქმის ყველა ნაწრეტიანი შეიყარნენ ამ მეიდანზე და ჰქონდათ ბაასი. აქ იყო ვასოცა. ყველანი ნებიერად, მზეზედ ზურგ მიშვერილნი, ისხდნენ ერთს დიდს თავხეზედ და იმის წინ შენობისათვის დაყრილს ქვებზე, რომელიც თუნდა ათი წელიწადია იყო მიზიდული, და ჯერ აქამდინაც შენობა არა ჰღირსებოდათ. ყველა ჰგრძნობდა რაღასაცა სიტკბოსა. მზე, გადაფარებული სუბუქი ღრუბლებით, არ იყო ცხარე; ახლად ამწვანებული და გაშლილი ხეხილის სურნელება აღვიძებდა უფრო კიდევ ნებივრულ სიტკბოებას კაცის სისხლში, და მეტადრე ნაწრეტიანთ პოეტურს აგებულებაში. იოთამ იყო სრულიად თავის ქერქში: ტკბილი ბუნება, დამშვიდებული ჰაერი, ცოლი ვენახში, საიღამაც იმას არ შეეძლო წამოეყვედრებინა, რომ რატომ არას აკეთებო, ყველანი ერთათ შეყრილნი, სადაც ამას შეეძლო დაეწყია ბაასი და მასლაათი. ერთი სიტყვით ის ჰრაცხდა თავის თავს ყოველად ბედნიერად.

ასე გასინჯეთ, რადგან ამ ხანათ ძაღლები საცალას მიიმაღ-  
ნენ და არ უშფოთებდნენ გულსა, სოფრონიც-კი დამშვიდე-  
ბული იყო და უგდებდა ლაპარაკს ყურსა, რომელშიაც წაუ-  
რევდა ხოლმე თავის სჯასაც ან „წუს“ ან „სწორეთის“ ან  
„კაი სიზმარი გინახავთ“ ის თქმით.

— ზღვას იქით ქვეყნებს რა უნდა, ერთი მამიშენის მზესა!—  
ელაპარაკებოდა იოთამ ვასოსა, რომელიც უამბობდა, რომ ის  
ოდესაზღედ მოვიდა უნივერსიტეტიდამ ზღვითა.— ზღვას აქით  
ხომ ცის კიდვა.

— ეგ, ბიძაჩემო, მაშინდელი აზრია, როდესაც ზღვის პირას  
იქით არავინ წასულიყო. ჯერ აი ოდესსა რა შორს არის, და  
ისიც-კი შავი ზღვის გაღმაა,— ეუბნებოდა ვასო.

— მამაჩემი არ წამიწყდეს, რომ ახლანდელმა სწავლამ სულ  
გადარია ე ჩვენი დრო. თუ ი თქვენმა დელახტორებია თუ რა-  
ღაც პრაფესორები, იცოდნენ რამე, თავს ლაფი დამასხი. არა,  
ერთი დაფიქრდი, ი კარგი მამიშენის მზესა, ეგ რომ აგრე იყ-  
ვეს, მაშ რალაზედა დგას მაშინ ეს ამოდენა ცა. მაგის მოთქ-  
რება როგორ არ უნდა გქონდეთ. მაგრამ, რაკი თავში აღე-  
ბული ავქთ, რომ ჩვენისთანათ არავინ იცის და რაც უნდა  
ვსთქვათ, დავგიჯერებენო, როგორც უნდათ ისე ლაპარაკობენ.  
მგონი რომ თქვან, ღმერთი არ არისო, დაუჯერონ.

— დაჯერებული არ არის, თქვენი ჭირიმეთ,— დაიწყო  
თუთალამ,— თქვენმა მზემ, აი ე ჩვენს ლაწირაკებს ეხლაც რომ  
მივცეთ ნება მარხვის ჭამისა, მგონი წითელი პარასკევიც არ  
შეინახონ. აკი სჯერათ ყველაფერი, რაც ფრანციცებისა და  
ლემენტებისაგან ეყურებათ. ისე გასხვარჯულდნენ, თქვენმა  
მზემ, რომ ჩვენი ქრისტიანობისა სულ აღარ ეყურებათ-რა.

— როგორც იმას ამბობენ, ედესია ზღვას გაღმა არი-  
სო! თქვენი ჭირიმეთ, რატომ არ გამიგონია!— დაიწყო ისევ  
იოთამმა, რომელსაც თუთალასავით ისე გადასხვარჯულება არ

აღვლელბდა, როგორც ისა, რომ სწავლას სწორე გზა დაუკარგავს.—ედესია იყო ეფესის ქალაქი მელქისედეკ მეფის სადგომი. აი სამღრთო წერილში მაინც წაიკითხონ იმ თქვენმა ფილოსოფოსებმა. რა ენაღვლებათ ისე გასწავლონ, როგორც არის საქმე. არა, ჩემო რძალო, ისე არ გვიწერს სამღთო წერილი?—მიუბრუნდა თუთალას, რათგან ის უფრო მკოდნეთ ირიცხებოდა სამღრთო წერილში.

—ვილასა სჯერა ეხლა ან სამღთო წერილი ან წმინდანების სიტყვა, —დაიწყო თუთალამ.—სამღთო წერილის სიტყვას რომ მისდევდნენ, ხომ არც გათათრდებოდნენ და არც გაწარმათდებოდნენ. ნეტავი ჩვენც არ წავგვწყმიდოს მაგდენმა მაგათმა ლეთის წინააღმდეგმა საქმეებმა და ურწმუნობამ, თორემ სხვას ყველას ჯანი გავარდეს: რისაც ღირსნი არიან, ის მიეგებათ.

—ნწა! ნწა! შე გასაოხრებელო!—წამოვარდა უცებ სოფრონი, რომელმაც თვალი მოჰკრა ზედ თავის კარებზედ ერთს მეზობლის ძაღლსა.—აი შენ დაურჩი ვერანათ შენს პატრონსა!—აქ სოფრონიმა წამოავლო ხელი ქვა მოხვდა თუ ლოდი და მიაყარა ყველა ერთბაშათ. რამწამ მოჰკრა ძაღლმა ყური სოფრონის ხმას, ერთი-კი მოიხედა აქეთ გულ-გახეთქილმა და უცებ გადაეწო ბაკის ლობეზედ.

—მატა, აგრე იყვეს, შე გაქუცულო შენა!—სოფრონს ყველა ძაღლისთვის ცალკე სახელი ჰქონდა დარქმეული თავის შესაფერი.—სოფრონ გამოეკიდა თან ძაღლსა, მაგრამ თვალის ველარ მოჰკრა. ის მობრუნდა და ისევ დაჯდა დამშვიდებული.

—არა, ნეტა ვინ იყო... როგორც ის აეყინებინა, რომ დედამიწა მრგვალია... ჰო! აი ე ჩვენი თეოფანე ღვდღოს შეილო, აკადემიაა თუ რალაცა სემენარიაში გაზდილი, —ბაასობდა კოდევ იოთამ.—აბა, ერთი იფიქრე იმ მეცნიერების უჯუნურება, ვინც ამას ამბობს; რგვალი რო იყვეს, მაშ რატო რაც ზღვაში წყალია არ დაიღვრება აქეთ იქითა, საითაც მი-

წაა დაქანებული? უფრო უარესებს ამბობდა ისა. დედამიწა მწვადივითა ბრუნავსო. ჰმ!—მეტი უგუნურება და კაცის დაბრმავება იქნება, თქვენი ჭირიმეთ!.. ეგ ადამიანის დაბრმავება და დაცინვაა... ვაჟო, რატო ამას არავინ ეტყვის, თუ მართლა და ამისთანა ახირებულს რასმე ისწავლებიან, რომ, თუკი დედამიწა ბრუნავდეს, რატო ეს ამოდენა ხალხი თავიქვე არ ვეკიდებით და ქვესკნეთში არა ვცვივდებით?.. მაგრამ, რომ ვანბობ კაცი აღარ არის, რიგიანი მოფიქრება შეეძლოს მეთქი—ეგ არის, სხვა არაფერი.

— სწორეთ!—დაუროთო სოფრონმა, რომელმაც ამ სიტყვის გათავებისათნავე სცქვიტა ყურები და გაიხედა თავის ბაკის კარისაკენ, სადაც ის იყო გამოყო თავი ერთმა ძაღლმა, და რამწამს მოჰკრა სოფრონს თვალი, იმწამსვე ისევ შეძვრა ლობეში და გავარდა.

— ჰაჰაჰაი! შე ძუნგელავ შენა! მე გამოგაყოფინებ მაგ სახატანგე თავსა! ერთი აქეთ გამოდი!

ეს სოფრონი რომ ასე მრისხანეთ ემუქებოდა ამ ძაღლსა, უცებ მოუარა ისევ იმ მომცრო მწყემსის ძაღლმა, რომელმაც ეს ადრევე დაგლიჯა, წამოუარა უკან ერთი სქელი თავხედამ, რომლისაც ძირს იჯდა სოფრონ და რომელზედაც ჰქონდა ზურგი მიშვერილი, წამოუშვირა ცალი ფეხი და ერთის თვალის დახამხამებაზედ ჩაუშვა შიგ კისერში თბილი ნაკადული. სოფრონმა იგრძნო ეს მგრგინარე სითბო და უცებ მიიხედა, მაგრამ მინამ ის ფიქრს მოვიდოდა, ძაღლი გაექანა და გავარდა ვენახებისაკენ.

— უ! ერთი დახედე ამ ვერანასა, რა ქნა ე?!—აქ სოფრონ წამოვარდა საშინელი გამწარებული, აიკრიფა კალთაში ქვები და დაედევნა სულ დორბლის ყრით თავის უპატიურების მიმყენებელს ძაღლსა.—აბა თუ შენ დამემალები და მე კაცი არა ვყოფილვარ.

თუთალა გაჰყვა თანა წუწუნითა და წყევლით.

— ახლა-კი გავეცალნეთ სოფრონს აქედამა, — სთქვა ერთმა სახლისკაცთაგანმა, — თორემ აქ აღარავის გვედგომება. თქვენმა შხემა მაგისი ქათმებისა და თხებისაგან სახლში ველარა დაგვიყენებია-რა და ბოსტნებში, და მაგის შიშით-კი ძაღლს ველარ გაუვლია ამისთანა შიშთანობაში ჩვენს კარმიდამოზედ. თქვენმა შხემ, ერთს ღამეს რომ ოსები სახლში შემოგვიცვივდნენ და ყელეები დაგვლადრონ, მყეთარი არ გვყავს, რომ ხმა ამოიღოს.

იოთამს ეცვალა ფერი ამ ამბავზედ, რადგან ის ძაღლი იყო ამისი ღამის მეხრისა.

— ეიპ! ეიპ! ეიპ!.. რას იზავ, ძმავ... უნდა შფოთსა და ბოროტს ერიდებოდეს კაცი, — სთქვა იმანა და გასწია შინისაკენ.

— შფოთი და ბოროტი თქვენა ხართ! — წამოესარჩლა სოფრონს იმისი ქვრივი რძალი, ზილახან, რომელიც ის იყო მოვიდა ამ ამბავზედ. — მაგ დროულ აღამიანს მაგისთანა წუჰაკი ძაღლისაგან ეგ უნდა მოუვიდეს, რომ თქვენს ღლეში ბოროტები ხართ და არ იშლით ბოროტებასა!?

— მმ.. მოჰკალით, ჩემო რძალო, წაწყნდეს ის კაცი, ვინც თქვენ მაგისი მოკვლა დაგიშალოთ... რავქნა, ახლა ხომ სულ ვერ ამოვწყვეტამთ, რაც ძაღლები გვყავს... ქვეყანაა, ათასი აკაკობაა... ღმერთი შენი თავდებია, აქამდინ რო ეს ძაღლები არა გვყოლოდა, თითონ ჩვენი გლეხკაცობა დაგვლადრიდენ შუალამისას ყელეებსა.

— თქვენისთანა ბოროტებს, რაც მოუვა, ყველაფერი ახია.

— რას იზავ, ძმავ! დედაკაცი ქმრის ხელში ამირანია და ქმარი რომ მოუკვდება — ამირანთ ამირანიაო: მაგის აყოლა რა ხელს მოგვცემს. — დაიწყო ბუტბუტი იღთამმა და შევიდა შინა, ისე ზილახანის ბოროტების მორიდებით არა, როგორც იმის შაშითა, რომ გაშფოთებული სოფრონ უცებ არ დაბრუნებულიყო.

ამ დროს გამოვიდა კატო შინიღამა და მთხოვა, გავყოლოდი ზვარში, სადაც დეიდაჩემი ათოხნივდა ბოსტნეულს.

კატო იმ ნაირათ მამიბრუნდა ამ თხოვნითა, თითქო ვასოსაც ეუბნებოდა: ნეტავი შენც წამოხვიდეო.

— იმედი მაქვს, რომ მეც მიმიწვევ კატო, — უთხრა ვასილმა, რომელმაც ეგრეთვე შენიშნა ეს კილო და რომელიც თითქმის ველარც-კი სძლებდა უკატოვოთა, რომელსაც უამბობდა სხვა და სხვა ამბავსა და ცდილობდა ამის გონების გახსნას.

— თუ ისიამოვნებ ჩვენთან ყოფნასა? — უთხრა კატომ და შეეტყო რაღაცა სიამოვნება, რომ ვასოც ჩვენი ამფსონი ხდებოდა.

— როგორ არა გრცხვენიან, კატო, რომ მაგას ამბობ? შენმა გაზღამა, ჩემი საკუთარი დაა რომ მყვანდეს, კიდე შენთან ყოფნა უფრო სასიამოვნოთ მიმაჩნია. რამდენჯერ მინატრია ჩემს გუნებაში, ნეტავი კატო ჩემი საკუთარი და ან ძმა იყვეს მეთქი, რომ საუკუნოთ იმას აღარ მოვშორდე.

— მაშინ მე შენისთანა კარგი ძმა მეყოლებოდა და რამდენს კარგს რასმე ვისწავლიდი. ეხლა ერთი ძმაც არა მყავს, რომ ის მაინც მიაბოს, რაც ქვეყანაზედ ამბავია. ჩვენზედ უსაცოდავესი ქვეყანაზედ არავინ არ არის. რამდენი სწავლაა, რამდენი ამბებია, და ჩვენ-კი გალიაში გამოწყვედელივითა ვყრივართ, რო ამბის შემტყობიც არავინა გვყავს. ეხლა მე რომ ან შენი დაა ვყოფილიყავ, ან ძმა, თავს მოვიკლამდი და წამოვიდოდი სასწავლებლათა, სადაც შენ ისწავლიდი.

ამ ლაპარაკმა უცებ თითქო პასუხი მოუკვეთა ვასოსა. ის გაჩუმდა და პატარა ხანს უკან ოდნავ ამოიოხრა.

ჩვენ წყნარის ნაბიჯით მიუახლოვდით ზვარსა და შევედით კიდეცა დიდი უზარმაზარი კაკლების ჩრდილებ ქვეშა. შევე-

ნიერი სურნელება კაკლის ახლად გაშლილი ნორჩი ფურცლებისა ტრიალებდა ჰაერში, გაზაფხულის მშვენიებით დამტკბარი ბულბულები შეუწყვეტლივ ტრციალებდნენ ვარდის ბუჩქებზედ, რომელნიც უხვად იყვნენ ჩაყრილი ღობის ძირებზედ; გარშემო ბუნება იყო მწვანე ხავერდით გაშლილი.

— წადი ერთი, გიჟო ბიჭო,—დამიძახა, დამინახა თუ არა დეიდაჩემმა,—ბურნუთის კოლოფი ჩამომიტანე, თორემ შინ დამრჩენია.

მე მაშინვე გავექანე შინისაკენ.

კატო და ვასო გაჩუმებული მიდიოდნენ კარგა ხანს. ისინი მივიდნენ ერთს მყუდრო დაჩრდილებულ ალაგას, სადაც ხასხას მწვანეთ გადაშლილიყო წმინდა აბრეშუმივით ბალახი. ისინი უნებურათ დაეშვნენ აქა და დასხდნენ. ვასო წამოწვა მხარ-თეძოზედ და ჰფიქრობდა. იმას ოდნავ, ნებიერის ცემით უღელავდა გული.

— წახვიდოდი კატო სასწავლებლათა ჩემთან, რო შგებლებოდა?—დაიწყა იმან ოდნავის ხმის თრთოლით.

— შენ იმდენი რამეები მიაბზე, იმდენი რამე ჩამაგონე და ისეთ ნაირი სურვილი გააღვიძე ჩემს გულში სწავლისა და ქვეყნის ცნობისა, რომ ქვეყნისა არა მცხვენოდეს, დღესვე დავკრამდი ფეხსა და იმდენს ვივლიდი, მინამ არ მივიდოდი იმისთანა ადგილას, სადაც შესაძლებელი ყოფილიყო, მეც მესწავლა რამე და თქვენოდენა მეც შემძლებოდა.

ვასომ უცებ სტაცა კატოს ხელი ხელში და გაუყარა თვალი თვალში.

კატომ თავის მხრივ შეუჩერა თვალები.

— სწორეთ, ვასოს მზემა! რაც კარგათ გაგიცანი და რაც შენ გამაცანი სხვა და სხვა აზრები და მცირეც არის ამიხილე თვალები, მე სრულიად აღარ მამდის ჩვენი ცხოვრება თვალში. რა ცხოვრებაა ჩვენი ცხოვრება?! პირუტყვებივით გინდა უცხოვრია კაცსა გინდა არა!.. მეტადრე ეხლა რომ შენ აქელამ

წახვიდე, კაცსაც ველარ ვიპოვი, ჩემი გულის პასუხი უთხრა, რომ მისცეს ჩემს გონებას ისა, რაც ჩემს გულში და ფიქრში აღძრულა და კი არ შეეცებულა. ეხლა ისე მგონია, აქამდის ძილში ვიყავ, და ახლა ვფხიზლდები, მეთქი. თუ ამას იქით ჩემი ცოდნა არ წავა, რო არ გამეცანი და არ გაგედვიძებინა ჩემს თავში არაფერი აზრები, ის მერჩივნა. ჰხედავ ამ მოკლე ხანში, რა რიგათ შევიხარე? განა ასეთი ვიყავი, როდესაც შენ პირველათ მნახე? დღე და ღამ სულ იმ ფიქრში ვარ, რათ გავჩნდი, თუ-კი მეც სხვასავით ადამიანური ცხოვრება არ მიწერია, მეთქი... ეხლა რო კაცათ მაქცევდეს ვინმე, ჩემს ქონებას და ჩემს ნახევარ სიცოცხლეს მივცემდი... ქალი რა გასაჩენი იყო, რომ უნდა ყველაფერში სხვის ხელის შემაკვერალი იყვეს!.. ტყვე იყვეს!.. ტყვეს კიდევ გაქცევა აიმედებს, ჩვენ ამ იმედსაც მოკლებული ვართ...

ამ ლაპარაკში კატო აენტო ცეცხლივით; ხმა უკანკალებდა და კილოში სჩანდა საშინელი გაბედულება და განწირულობა.

ვასილმა უცებ გამოართვა ხელი ხელიდამ, დაემხო პირქვე და ჩაიყო ცხვირპირი ორთავ თავის მუქებში.

კატო მღელვარეთ წამოდგა მუხლის თავებზედ და დაუწყო მახლობლათ მდგომს ვარდის ფურცლებს წიწკვნა.

პატარა ხანს უკან მე და დეიდაჩემიც მივედით მცირე სადილით, რომელიც აქ დეებარებინა დეიდაჩემსა.

ვასილ წამოდგა უცებ და წავიდა შინისკენ, ფიქრისაგან გატაცებული. ჩვენს თხოვნაზედ, ის არ დადგა სადილათ. კატო უფრო ჩაფიქრდა და თითქმის ძალათ იტენდა საკმელს პირში. პატარა ხანს უკან ის უცებ წამოდგა და შეერია ვენახის ბუჩქებში. იმას უჩუყდებოდა გული. ცრემლები ერეოდა თვალეებში.

ვასილ, აღელვებული, დაბრუნდა შინა, შევიდა თავის კოშ-

კის ოთახში, სადაც იმას ჰქონდა გამართული თავის საკუთარი საწოლი და დაემხო პირქვე მუთაქაზედ.

— საწყალი კატო! — ჰფიქრობდა ის საშინელის გულის ცემითა. — რატომ არა ხარ ჩემი ან და ან ძმა!? მაშინ მე ვიცოდი, როგორც გიპატრონებდი. სიკეთის მაგიერათ, მე მხოლოდ დაურღვიე მშვილობა. გაულვიძე ცნობის მოყვარება, სწავლის სურვილი, გავატაცებინე მაგისი გონება ადამიანურს აზრებს და ახლა საშველი-კი არსად არის. — რა არის ჩვენი დედაკაცის მდგომარეობა!.. ჰქონდეს ადამიანათ ქცევის სურვილი და-კი არ შეეძლოს!.. მე სიკეთის ნაცვლათ, ავაზაკობა გაუწიე... ვინ იცის, რა დემართოს ამ სურვილის შეუსრულებლათ?! და როგორ უნდა შეისრულოს სურვილი?! იმის კილოში სულ ის ისახებოდა როგორც გამიღვიძე ცნობის მოყვარეობა, ისე კიდევ მიჩვენე გზა, რომ ეს სურვილი შევისრულო და კაცათ ვიქცეო... ღმერთო! ნეტავი აგრეთი გონების პატრონი, აგრეთი მოსიყვარულე გულისა, აგრეთი მტკიცე და მოუღრეკელის ხასიათისა მაინც არ იყვეს... მერე ვინ იცის, ვის და რომელს უშვერს კაცს უნდა ჩაუვარდეს ხელში, რომელიც უნდა უყურებდეს მაგას, როგორც გალიაში გამონწყვდეულს შოშიას, რომელსაც ინახავ მხოლოდ სათამაშოთა და თავის დასატკბობათ!.. კატო, მაგისთანა გულისა და სურვილის პატრონი, უნდა გახდეს ნივთათ უბრალო ბრიყვისა და მოუხეშავი ქმარისა, რომლისაც გულში, ვინ იცის თავის დღეში არ გაღვიძებულა კაცური გრძნობა და ცნობიერს დედაკაცს უყურებს, როგორც ღვთის წინააღმდეგსა!.. ნუ თუ მართლა ეს ახდება როდისმე და კატო გახდება ამგვართა უშვერთა სათამაშო?!..

აქ უფრო აჩქარებით დაუწყო გულმა ცემა. ის უგრძობლათ გადაბრუნდა გულალმა და ახლა გადიფარა თვალებზედ მკლავები. ფიქრი, რომ როდისმე კატოს პატრონი გახდება სხვა ვინმე, კიდევ უფრო და უფრო უწინკნიდა ვასილს გულსა.

შეპყრობილი ამ ფიქრებისგან, ვასილ უნებურათ წამოდ-  
გა ფეხზედ და დაიწყო ოთახში სიარული წყნარის ნაბიჯითა.  
შემდეგ ის გამოვიდა უცებ ოთახიდან, დაეშვა დაფიქრებული  
კიბეზედ და გასწია თავის მამის ზვარისაკენ. იმან იარა დიდს  
ხანს და მოქანცული დაეგდო დაფიქრებული ზვრის ბოლოზედ  
გაშლილს ველზედ ერთი ძველი დიდი ვაშლის ძირას.

ვასილ ძლივს გამოერკვა მაშინ, როდესაც დაუძახეს სადი-  
ლათ. სადილზედ ის სცდილობდა გაექარვებინა ფიქრები და  
არ შეემჩნევინა თავის დედმამისათვის, მაგრამ მაინც ვერ დარეო-  
და თავის თავს. მისდა უნებურათ უტრიალებდნენ თავში ფიქ-  
რები. კატოს სახე, იმის გამოცანასავით ლაპარაკი, იმისი საყვე-  
დურის კილო, რომ ახლა შუა წყალში ვრჩებიო; იმისი ცოც-  
ხალი თვალების ბრიალი; იმისი განწირულებით ლაპარაკი თა-  
ვის მდგომარეობაზედ და ულონობა ამ მდგომარეობიდან გა-  
მოსვლისა, — არა შორდებოდნენ თავიდან ვასილსა და უნებუ-  
რი ოხვრა ხდებოდა გულიდან.

დედამ ამისმა, სიღონიამ, რომელიც ადევნებდა ყოველს  
ვასილის სახის მოძრაობას ყურსა, შენიშნა ყოველივე ეს  
და დაიწყო ოხვრა. იმას წამ და უწუმ მოსლიოდა ცრემ-  
ლები.

— რა ვქნაა! რა ვქნაა! — ბუტბუტებდა ის ვასილის ჩუმათ  
და იცემდა კალთებში ხელებსა. — ჩამქოლეთ, ჩამქოლეთ, მე  
ძუძუ დამწვარი!

— რო გეუბნები ნუ დადიხარ, იჯექ შინა მეთქი, მტრო-  
ბით ხომ არ გეუბნები. როგორ არ უნდა კაცი დაერიოს თა-  
ვის თავსა და მოერიდოს იმასა, რაც ავნებს. ემანდა ახლა ისევ  
აგეშალა ე შენი ავთმყოფობა. ე დედაშენს-კი თავისას და-  
მართებ და! — დაუწყო ბაადურმა დიდკაცურის კილოთი ვა-  
სილსა.

— ღვთისმშობელოოოო!! — შეკბლავლა უცებ სიღონიამ

და განუპყრო ზედ შუა სადილზედ ღვთისმშობლის ხატს ხელები.

ვასილ გაცოფებული წამოვარდა.

— მე ერთხელვე მამისხენებია თქვენთვის, რომ თუ გინდათ ჩემი აქ ყოფნა, დამანებეთ მეთქი თავი! აბა რა ნახეთ, რაზედ იხეთქავთ გულებსა?! ისე მე არა ვარ ავათა, როგორც თქვენ თქვენის გცევით მიწუხებით გულსა და მიცხოვლებთ ავათმყოფობას!—აქ ვასილი გავარდა გაცხარებული მეორე ოთახში და მიიჯლახუნა კარები.

— მამიწამლეს! მამიწამლეს!—იწეწდა კავებსა სიღონია. მამიწამლეს, ეგ ერთათ ერთი შვილი! ჩემი მშობლური გულმამაშინვე ჰგონობდა, მაგან რომ იქ დაიწყო სიარული, მაგრამ ჩემი ვის ეყურებოდა!... ვის ეყურებოდა!... ვიპ! ვიპ! ვიპ!— და აქ უარესათ გაიწია და გამოიწია კავებსა.—ჩამაქვავეთ, თქვენი ჭირირიმეთ, ჩამკირეთ!—გამოიოძახოდა ხამუშ-ხამუშათ.

ბაადურიც წამოვარდა სუფრიდამა.

— კარგი, ერთი მამაშენი ნუ წაგიწყდება! კაცს-კა უნდა ყოვლისფერი ამოაშხამო და! აბა რა ნახე, რა იყო, რაზედ გაგვიმწარე სუფრა?! ბავშვი, ხომ ჰხედავ, კარგათ არის... რა არის ერთხელ ორჯელ ამოიოხრა?!

— უი, დადექ, დადექ, ჩემო წამწყმედაო!... სულ შენგანა ვარ დაღუპული და სახლში ნიათ გამოღეული! რა უნდოდა, თქვენი ჭირიმეთ, ჩემს შვილს უნუსტეტში?.. რა სჭირდა, მაგას, თქვენი ჭირიმეთ, სასწავლებელი?! მაგისი საკმაო ქონება როგორ არ მოგვეპოვებოდა, რომ მაგასაც ჩვენთან ექამა ერთი ლუკმა პური?!.. იმისი არ იყვეს, როგორც შენ ამოსწყვეტ სახლიკაცებს მოაწამლვინე... რათ აძლევდი, შე ჩემი ცოდვით საესე, იქ სიარულის ნებასა?! როგორ იმეტებდი მე ერთათ ერთ შვილს იმათში გასარევათა და რაზედა მჭრიდი ყელსა?!. ვუიპ! ვუიპ! ვუიპ! ვუიპ! ვუიპ!

— ღმერთს ერწმუნე, ქვა და კლდე ვიყავი, რომ ეს

ოცდა ხუთი წელიწადი გაგიძელ შენა!... სულ შენმა ბაიყუმმა ქცევამ ამოიჭამა იმოდენა შვილობა... ქვეყნის სირცხვილს რა უყო და თავზედ ლეჩაქი როგორ მოვიხვიო, თორემ მე ვიცი შენი საკადრისი საქმეები.— შეუტია მრისხანეთ ბაადღურმა და გავიდა.

— გენაცვალეთ! წყეულიმც იყვეს ის ღლე, რა ღლესაც მე ჩავარდი ამ უგვაროების ხელში... რა იციან ამათ ადამიანის ყადრი... ამათ ტოლი კაცისშვილი უნდა ვიყვე, რომ შემიფერონ... ვაი ჩემი ბრალიცა! ვაი ჩემი ბრალიცა! ქმრისგანაც და შვილებისგანაც უბედურსა!.. რა უყო შვილებსა, რა უყო შვილებსა, თორემ მე ვიცი, როგორც დავადგებოდი ამ უგვაროებს თავსა!..

ამ სიტყვებთან წამოდგა სიღონა, დაეშვა ხატების წინ მუხლის თავებზედ, განუპყრო ხელები და მდულარე ცრემლებით შეჰლაღადებდა გულ-ამოსკვნითა.

— მამეცით მოთმენა! მამეცით მოთმენა!.. ნუ დამწვამთ მოუნელებელის ცეცხლითა, თქვენის მაღლისა და სახელის ჭირიმეთ! ნუ მამასწრებთ ჩემს ვასილზედ გამწარებასააა!

აქ რომ ეს ამბები ხდებოდა, ვასილ დაეშვა ისევ ვენახებისაკენ. აქედამ ის გავიდა ქალებში, სადაც დიდს ხანს იარა ყრუ ადგილებში. ბოლოს ის მიადგა ერთს მშფოთარე მდინარეს, რომელიც მთებში ავდრების გამო, იყო თიხისფრათ ამღვრეული, მოდიოდა ჭექა-ქუხილით, გახვეული გარშემო ატეხილ ყრუ ქალებში, და მოჰქონდა თან არე-მარე. ვასილ, მოქანცული, დაეგდო უნებურათ ამ წყლის პირას და მის მრისხანე ხმებზედ, რომელიც თითქო რაღაცა სიმხნევეს უღვიძებდა კაცს გულში, მიეცა გარინდული ფიქრებსა.

იმის ახლად აღუღებელი ახალი აზრებისაგან ტვინი, რომელსაც მრავალი ხელის მოკრით და ჯერედ ცხოვრებასთან გამოუცდელის ბრძოლით, არ გაფილისტერებულებოდა და არ გაპყლოდა ცხოვრების ტალღებს, ვერ ინელებდა იმ აზრსა,

რომ კაცი, რომელსაც ასე ცხარეთა ჰქონდა გაღვიძებული სწავლის და ქვეყნის ცნობის სურვილი, დარჩენილიყო იმ სურვილის შეუსრულებლათ. ამასთან ამის გულში ლაპარაკობდნენ კიდევ სხვა გრძნობანიცა. ის, სიყმაწვილითვე წიგნებში თავჩაკრული და გამოწყვდელი სახელმწიფო ხარჯზედ სახელმწიფო სასწავლებელში, ვერ იცლიდა იმ ხალხში გასვლისათვის, სადაც ენახა ქალები და შესძლებოდა იმის გულს, ამათ არჩევაში შესულიყო. ამის გამო, თითქმის პირველი ქალი კატო იყო, რომელსაც ეს ასე დაუახლოვდა. თავის მხრივ კატოსაც არა ჰქონდა შემთხვევა სხვის დაახლოვებისა და არც მიეცემოდა, რადგან უცხოს ამასთან არ მოუშვებდნენ და თუ ვასილ დაუახლოვდა, ესეც იყო ბრალი ნათესაობისა, რომელსაც აქ ძალიან პატივი ედვა და ირიცხებოდა დიდ სამღრთო მოვლინებათ. კატოს გულისთვის, როგორც საზრდო, ისე საჭირო გახდა ნიადაგ ვასილის ნახვა და ვასილ, რომელიც უამისოთაც იყო კატოს სახით გატაცებული, რა-კი ჰხედავდა იმის გულის გატაცებას ამისგან, კიდევ უფრო მიელტოდა იმისაკენ გული და გრძნობანი. ეს გრძნობანი კიდევ უფრო და უფრო აღვიძებდნენ ვასილის გულში კატოს სიბრალულს.

ის აქამდინაც ვერ გასტეხოდა ამ გრძნობას და ვერ წარმოედგინა, საიდანაც წარმოსდგებოდა ასეთი ცხარე გულის შემატკივრობა კატოზედ. ის ამაში ჰხედავდა მხოლოდ წრფელს მეგობრულს გრძნობას, რომელსაც აღვიძებდა ამაში კატოს გონიერება, ხასიათი და ცული გარემოებანი, რომლიდანაც დაღწევა იყო თითქმის შეუძლებელი.

ვასილს ამ საშინელი მქუხარე წყლის ხმაზედ, რომელიც თვისის სიჩქარით მოაქანებდა უზარ-მაზარ ქვებსა და გაჰქონდათ ჩახა-ჩუხი, — ელალებოდნენ ერთი ერთმანერთზედ ათასნაირი ფიქრები; იმას უთუთქავდა გულს, როგორც წარმოიდგენდა, რომ კატო შეიქნებოდა ქმრიანი და იქნებოდა სხვის ხელში. ფიქრები ტყვიასავით აწვებოდნენ და უმძიმებდნენ თავ-

სა. მაგრამ ამ დამახშოვებელს წყლის მუსიკაზედ, როგორღაც უფრო მხნედ და იმედით ჰფეთქავდნენ ვასილის ფიქრები. ის უცებ წამოხტა ადგილიდან და დაიძახა.

— Рѣшено!

ამ სიტყვებთან ის პატარას ხანს კიდევ იდგა გაშტერებული და შემდეგ გასწია შინისაკენ საკმაოდ დამშვიდებული. როდესაც კარგა გამოერკვა ფიქრებიდან, ვასილმა შენიშნა, რომ ბინდი მოტანებული იყო. იმან გამოაშურა შინისკენ, რომ არსად გაბმულიყო გაუტეხელს და გაუტანებელს ქალის ძეძვებში; საღამოს ნიაფი საამურათ უგრძობდა გულს, თავის გადაწყვეტილება აძლევდა უფრო მხნეობას და თან სიტკბოებას.

ვასილს შორს მოესმა რაღაცა ძახილი და ხმაურობა. წყლის ხმისაგან ის ვერ არჩევდა კარგა ხმასა. ის შევიდა ფიქრში, რადგან მაშინ ოსების ავკაცობის ხმა იყო გახშირებული. ის ჰფიქრობდა, რომ დაუხვდნენ ვისმეს და შეველასა თხოულობენო. ვასილ გაეჩქარა, მაგრამ ბილიკები აღარა სჩანდნენ, ძეძვები თან და თან უფრო და უფრო ედებოდნენ ფეხებში და უჭერდნენ ტანისამოსსა. ხმაურობა ხან უახლოვდებოდა და ხან შორდებოდა. ვასილ იყო გაოცებული ამ ხმაზედ. ის ცდილობდა ჩქარა გაშორებოდა იმ ადგილებს, სადაც აღარა ყოფილიყო ისე დამაყრუებელი ხმა საშინელის მდინარისა. მაგრამ ის უფრო და უფრო გაება ქალებში, შევიდა საშინელს ყრუ, დაბურულსა და უკაცურს ადგილებში. იმან შენიშნა, რომ მუხლები ჰლალატობდნენ. დაატანა თავს ძალა და შეეცადა ყოვლის ღონით გზის გაკვლევას, მაგრამ ყოველივე იყო ამაო: საითაც გაუხვია, ყველგან უარესი დაბურული ქალები დაუხვდა, ყველგან ერთმანერთზედ გადახლართული ძეძვები და ეკლები აბამდნენ ამას თავის კლანჭებში. ვასილმა მისცა ხმა, რომ გაეგონათ მოყვირალთ მაინცა, რომელთაც ხმა იმას აქამდინ ესმოდა; მაგრამ ის ხმაურობაც მოსწყდა და სრულიად აღარ სად ისმოდა. ის, მოქანცული, დაეგდო ველზედ დასასვენებ-

ლათ, რომ ხელმეორეთ შემოეკრიფა ღონე და გასდგამოდა გზის გაკვლევას.

ვასილის დაგვიანებაზედ შეექნათ შინ მოკითხულობა და ჯერ ისევ ნათელია, რომ გაგზავნეს მოურავი ცხენით მოსაკითხათ. მწყემსმა ბიჭებმა უთხრეს, ვასილ ქალებში ვნახეთ და წყლისაკენ მიდიოდა.

მოურავმა დიდს ხანს ეძებდა ცხენითა, უყვირა ქალებსა და წყლის პირებზედ, მაგრამ ვერსად ნახა. კარგა ვახშობა იყო მოტანებული, რომ მოურავი დაბრუნდა შინა იმ ფიქრითა, რომ ვასილ უთუოთ თითონვე დაბრუნდებოდა შინაო.

ამ მოურავის მოსვლაზედ, შეუდგათ შინ ერთი ამბავი და აღიაკოთი. მთელი ბიჭი და გოგო დადგა ფეხზედ. სიღონია, თმა გაწეწილი და საშინელის წივილ-კივილით, გაექანა წყლის პირისაკენ. ბაადურმა შეისხა იარაღი, ანთებინა ფარნები, გაიძღოლა წინ ბიჭები, მოაჯდა ცხენსა და გასწია ვასილის საძებნელათ.

ამ აღიაკოთმა გადმოაღწია სახლიკაცობამდინაც. ყველანი დადგნენ ფეხზედ და ეცნენ ქალებსა. ვასილი სახლიკაცებსაც ყველას მოსწონდათ და უყვარდათ, რადგან ის არავის არ ერიდებოდა და არა თავილობდა, ყველასთან იყო თანასწორათა და ყველასთან, როგორც შინაურებთან, დაიარებოდა. ამ ამბავმა ყველა მართალის გულით შეაწუხა. ასე გასინჯეთ სოფრონმაც-კი დაუწყო ძაღლებს ძახილი და პურის ყრა, რომ გაჰყოლოდნენ ქალებში ვასილის საძებნელათ.

ამ ხმამ მიაღწია კატომდისინაც, რომელიც ის იყო აპირებდა დაწოლასა. ამ ხმაურობამ და საშინელმა მოძრაობამ კატოს სულ დაუბნია გონება. იმას სრულიად დაავიწყდა ყველაფერი და როგორც იყო, ისე, ფეხთ ვახდილი, გაექანა მართათ მართო წყლის პირისაკენ. დეიდაჩემი და იოთამ კიდევ იყვნენ წასულები.

რაკი შევნიშნე ეს საშინელი ატაცება კატოსა, რომელ-

საც დიდი ხანია ვატყობდი, რომ ვასილი მთელს ქვეყანას ერჩინა, მე დავედევნე უკანა, რომ არსად რა დამართოდა მარტოკასა. ის, ხმა გაკმენდილი, კრიკა შეკრული და მუხლებ მოდუმებული, თითქო აპირებდა გაფრენას, მაგრამ მუხლები სრულიად არ აძლევდნენ გაჩქარების ნებას.

ჩვენ სრულიად დავშორდით სხვებსა. მთვარემ ამჟოყო მოწმედლის ცაზედ მთის წვერებიდამ თავისი მორგვალეული ფარგლები და ცოტა არ იყო გაანათა ქვეყანა: ჩვენ გავებით ქალებში, სადაც ყველგან ისმოდა ხმაურობა და ძახილი. კატოს არ ელო ადამიანის ფერი. წამ და უწუმ ეკვებებოდა მუხლთა და ატანდა თავს ძალასა... ჩვენ შევედით ერთ ყრუ ქალის გაშლილს ველზედ, რომ უცებ ჩვენ წინ გადისხნა ბუჩქები და მთვარის შუქზედ მოულოდნელათ გამოყო ვასილმა თავი.

ამ მოულოდნელს ამბავზედ, კატო ვასილს და ვასილ კატოს ეცნენ სრულიად უნებურათ და გადაეხვივნენ. მე მაშინვე ვეცი სხვებთან შესატყობინებრათ, რომ ვასილ გამოჩნდა მეთქი.

— ეს სულ შენი ბრალია! — უთხრა ვასილმა კატოს, რაკი მოშორდნენ ერთმანეთს ხვეენისაგან. — დღევანდელმა შენმა ლაპარაკმა ამაღლევა და ამ ფიქრებში დამიღამდა ამ ქალებში და ველარ გამოვიგენ გზა. სულ იმ ფიქრში ვიყავ, რა უშველო მეთქი ჩემს კატოსა. და მარტო ერთი ღონისძიება ვიპოვნე. მეტი ხსნა არ არის, და, რაც მე გითხრა, უნდა შეასრულო, თუმცა იქნება შენ გეჩოთიროს ესა. მაგრამ ჩვენ უერთმანერთობა არ შეგვიძლიან.

კატოს გულმა დაუწყო ცემა და რაღაცა გრილმა ჟრიანტელმა დაუარა ტანში. ის თითქო ხვდებოდა, რაც უნდა ეთქვა ვასილსა.

ისინი დასხდნენ მწვანე ველზედ.

— რა ღონის-ძიება იქნება ისეთი, რომ მე შენთან ვიჩო-

თირო?—უთხრა კატომ ხმის კანკალით და ლოდინით, რომ რალაც უკანასკნელი ბედის გადამწყვეტი სიტყვა უნდა მოჰყოლოდა ამ კითხვასა.

— რა და, ერთბაშით თქმა, ვგონებ შენი აზრებისთვის არ იყვეს კარგი, მაგრამ მეტი ლონე არ არის... არც არაფრის წინააღმდეგია რამე აქა, არც სინიდისისა, არც რჯულისა, თუ შენი ნება იქნება და ინდომებ იმ კაცის დაახლოვებას, რომელსაც შენ ურჩევნიხარ ყველასა.

— თუ არაფრის წინააღმდეგი არ არის და მაშ რათა გგონია, რომ ჩემი გონება არ იყვეს მომზადებული იმგვარი საქმისათვის? რა უნდა იყვეს ისეთი ღონისძიება, რომ მე ვიქცე აღამიანათ, და ვიზოთირო!

— მომეც სიტყვა, რომ თუ არ მოგეწონოს ეს აზრი და წინააღმდეგათ გეჩვენოს, არ აიღებ ჩემზედ ხელსა და არ იფიქრებ არაფერს ცუდს ჩემს განზრახვაზედ, გარდა იმ სიკეთისა, რომელიცა მსურს როგორც ჩემთვისა, ისე შენთვის.

— არ ვიცი, რა უნდა იყვეს ისეთი და რა უნდა წარმოსდგეს შენგან იმისთანა, რომ შენზედ ხელი ამალებინოს და ცუდი რამ მათქვამებინოს.

— ჩვენ უნდა საუკუნოთ გაეხდნენ ერთმანერთისანი, — უთხრა საშინელის ხმის თრთოლით ვასილმა, და შეჰხედა კითხვით თვალებში კატოსა.

კატო აენტო ცალკე ღელვით და ცალკე უცებ ამგვარის მოულოდნელის გადაწყვეტილებით. იმას საშინელი სიცხარით უცემდა გული, თითქო აპირობს გამოვარდნასაო. ეს გულის ცემა და რაკა-რუკი ეყურებოდა ვასილსაც.

ვასილმა ჩაავლო ხელში ხელი. ისა თრთოდა და კანკალებდა. ხანა ხურდებოდა, ხანა ცივდებოდა, თითქო ყინულში ამოუვლიათო. უცებ ისინი მიეკვრნენ ერთმანეთს ტუჩებში და დიდსა და დიდს ხანს არა შორდებოდნენ. წამ და უწუმ ისინი იმეორებდნენ ერთმანერთის კოცნასა და ხვევენას,

ჩუმათ, ხმის ამოუღებლივ, რომლითაც უფრო ჰსახავდნენ თავის გულის პასუხს და ბედნიერებას, ვიდრე იმით, რომ ქცეულიყო იმათი ბედნიერება სიტყვებისა და გამოთქმის ნაკადულათა.

ისინი გამოარკვია ჩვენმა ხმაურობამ. ამ ხმაურობაზედ ვასილ და კატო მოგვეგვებნენ წინა.

### III.

მეორე დღეს ვასილი უჯდა რუსული წიგნით კატოსა და ასწავლიდა.

კატომ, როგორც ზემოთაც იყო ნათქვამი, წერა კითხვა და ლაპარაკი რუსული კიდევ იცოდა, რომელიც არ დავიწყებოდა სასწავლებლის უკან, რადგან სახლშივე ეყარათ თითო ოროლა რუსული წიგნი, რომელთაც ხშირათ ჰკითხულობდა, რომ არ უნდოდა რუსულის დავიწყება.

ისინი დიდს ხანს უსხდნენ წიგნებსა.

როდესაც დაიღალნენ სწავლითა, იმათ დასდეს წიგნი და პატარას ხანს, თითქო დაღალვისგან, იყვნენ ჩუმათა.

— ახლა შენ ესა სთქვი: როგორ უნდა მოვახერხოთ ჩვენ ყოველივენი ჩვენი დაწყობილება? — დაიწყო პირველი კატომა.

— ჩემი განზრახვა ესრეა და ამაზედ მეტი სხვაც არა მოგვარდება-რა, — მიუგო ვასილმა: — მე აქ დავრჩები კიდევ თითქმის ექვსი თვე. ამ ექვს თვეში შენ ისე მოგამზადებ, რომ მემრე შენ თითონაც შეგეძლოს ზოგიერთა საგნების მომზადება. მემრე მე წავალ ისევ უნივერსიტეტში და ერთი ექვსი თვე ვცდი: ავიტან ჰავას თუ კიდევ არა. თუ ავიტან, მოვალ და აქ ჩუმათ დავიწეროთ ჯვარი და წავიდეთ ერთათ ისევ რუსეთში, სადაც შეგვიძლიან, მინამ სწავლაში ვიქნებით, დაა-ძმურათ ვიცხოვროთ, ცალ-ცალკე. თუ არა და მაშინ მე ისევ აქ დავრჩები. მაშინაც მაინც დავიწეროთ ჯვარი და მე თითონ მოგამზადებ ყვე-

ლაფერში. შენი გონების პატრონი, რასაც ერთს წელიწადს მოისწრებ, სხვები ორ-სამ წელიწადსაც ვერ იზამენ იმასა.

კატო აღტაცებით ისმენდა ამასა. დიდი ხანია ამისი სურვილი იყო უცხო ქვეყნების ნახვა და უცხო ხალხების გაცნობა. ახლა ის ისახავდა თვალწინ იმ ბედნიერს დროს, როდესაც ეს უნივერსიტეტის ქალაქში დაიწყებს სწავლასა, გაიცნობს ნასწავლსა და დაწინაურებულს ხალხსა, სადაც გაიგონებს ცხოველს სიტყვებსა და ნახავს ცხოველს საქმეებსა, სადაც, ერთის სიტყვით, ექნება ცხოვრებით სავსე გული და ამათ შორის ეს იქნება ვასილთან მოუშორებელი, რომლითაც ერთი-ორათ გაუადვილდება ყოველი საქმე და ყოველი სიძნელე.

ვასილი თავის მხრივ კატოზედ ნაკლებათ აღარ ოცნებობდა.

— რაკი დავასრულებთ სწავლასა, დავბრუნდებით ჩვენს დაჩაგრულს ქვეყანაში, — ელაპარაკებოდა ის კატოსა, — გვექნება სწავლის მხრივ საკმაო მომზადება, და ვინ იცის რამდენი საქმე ქვექნება წინა! რამდენი კარგი საქმე შეგვეძლება, რომ გავაკეთოთ ამ ჩვენს ჯერეთ თავ-შეუღებელს და ხელ-შეუხებელს ქვეყანაში. სასწავლებლები, ამხანაგობაები, ბანკები სოფლები-სათვის. ესლა რომ საცოდავთ მურტლები და ტიტვლები დაიარებიან ე საცოდავი გლეხის ბიჭები ილიაში სახრე ამოჩრილები და სიცივისაგან წელში წაკუზულები, შეგვეძლება სწავლით და სხვა და სხვა დაწყობილებებით ამათი ამგვარი არა კაცური ცხოვრების შეცვლა. შეხედე აბა ჩვენს ბუნებას! უკეთესი განა ღმერთს კიდევ გაუჩენია რამე! ამ ბუნებას უნდა ახლა მცოდნე ხელი და შემძლებელი ხალხი. მაშინ უყურე, როგორ ეხლანდელი წუმპეების მაგივრათ ჩვენს კარმიდამოზე, რა სუფრთა მეიღნები იქნებიან; ქვარტლიანი სადგომების მაგივრათ, სადაც პირუტყვნი და კაცნი თითქმის ერთს საწოლზედა წვანან, იქნებიან სუბრთათ გაწყობილი, დიდ ფან-

ჯრებიანი სუბრთა სახლები თავისის მშვენიერის ბაღჩებით! ნახე რა რიგ დამშვენდება მაშინ ჩვენი გლეხის დედაკაცი,— რომლისაც ბუნებრივი მშვენიერები და ხასიათი სრულებით დახშულან სიმურტლისა, სიღარიბისა და უშვერებისაგან,— რაკი მოიციეს ქონებასა და ისწავლის ცხოვრების გასუფრთავებასა და შეიყვარებს წიგნსა და სწავლასა. ამას ყველას უნდა მხოლოდ მხნე და თავ-გამოდებული გულის შემატკივარი მომზადებული კაცები. რამდენგანმე რომ დაიწყოს ეს საქმეები, მხოლოდ რამდენგანმე, რაკი ნახამენ სხვები მაგალითს, ყველანი წაჰბაძვენ და ისწავლიან. მადლობა ღმერთს, ჩვენ ხალხს არც გონება და არც ხალისი არ აკლია, მხოლოდ უნდათ მაგალითის დანახვება და ერთხელ კვალში ჩაგდება. მემრე ყველაფერი წყალივით წავა და ჩარხივით დატრიალდება.

კატო აღტაცებით უგდებდა ამას ყურსა, თვალები ეღვასავით უბრიალებდნენ. ის ამჟამათ ჰხედავდა ვასილში იმ კაცსა, რომელისაც მონატური იყო ყოველთვის ამისი გული. ქალის გულს უნდა გმირი ცხოვრებისა, რომელიც ცხოვრებაში ირჩეოდეს სხვებისაგან, სულ ერთია იმისთვის ეს გმირი ცხოვრებისა არის გმირი კარგის მხრივ თუ ცუდის მხრივ, ოღონდ-კი ამ გმირს ჰქონდეს რაინდული თვისებანი და არა იყვეს იმ ცხოვრების ქუჰყ-მოცხებული, რომელიც ნიადაგ თვალ წინ გვიბრუნავს, რომელიც ისე გვიწვრილებს გულსა, გვიწყლავს სიცოცხლესა და თვისის დაუსრულებლობით სრულიად გვაბეზრებს თავსა. კატოს თვალში ვასილ იყო სრული გმირი. ამ ცხოველმა სიტყვებმა, რომელშიაც არა სჩანდა არც ნამცეცი-იჭვი ყოველისავე ამის შეუსრულებლობაზედ; რომელშიაცა სჩანდა სრული სიწრფელე და წმინდა ცხარე ლტოლვილება ამ საქმეებისადმი, ისე აღავსო გული კატოსი, რომ შესაძლებელი ყოფილიყო, შთანთქმიდა ან შთანთქმევენებოდა ვასილსა, რომ გამხდარიყო ერთსულ და ერთს ხორც და ამათი

აღვესო სრულიად თავისი ნეტარება, თავისი სიყვარული, თავისი სიტკბოება.

გატაცებული ამ ტკბილის ფიქრებით, ვასილ და კატო საშინლათა ჰბეჯითობდნენ სწავლასა. ვასილ ყველაზედ მეტათ უფრო ჰბეჯითობდა ფრანციუსს, რომ შესძლებოდა კატოს ყოველ მხრივ გონების გახსნა. კატო გასაოცებლათ მალე ხედებოდა ყველაფერს. რამდენიც ჰხედავდა კატოში ბეჯითობას და ნიჭიერებას, იმდენი უფრო ჰხალისობდა ვასილიცა და ჰბეჯითობდა კატოს სწავლას. კატოს მთელი დღე და ღამე ეჭირა წიგნები და რვეულები ხელში. დედმამა სრულიად არ უშლიდა ამასა. იოთამ პირიქით თითონაც ახალისებდა თავის ქალსა. ის, თითონაც ფილოსოფოსი, როგორცა ჰფიქრობდა, ყოველთვის მონატრული იყო, რომ შვილი სწავლული გამოსვლოდა.

— ისწავლე შვილო, ისწავლე, მაინც ღმერთმა ვაჟი შვილი არ მამცა და შენ მაინც მიყავი მაგივრობა. სწავლა თავის დღეში ნაქები ყოფილა და არც ქალს აწყენს კაი სწავლაი— ეუბნებოდა იოთამ, როდესაც რომ ჰხედავდა თავის ქალს ასე სწავლისაგან გატაცებულს.

მაგრამ სახლიკაცებსა და ბიძაშვილებში არ ისმოდა ამგვარი ქება კატოს სწავლისა.

— მაგან თუ შტო კაცოა ხანაში არ ისწავლა და რუსულათ არ იტიტინა, დიდი საჭიროა, — ჰკიცხავდა თუთალა კატოსა.

— ნეტა ვიცოდე, ი დედმამას რაღა ყური წაუგდიათ, რომ იმოდენა ქალს აუღია საქმეზედ ხელი და ჩასჩინინებს რუსულ წიგნებსა! — უცემდა კვერს ქვრივი რძალი თუთალასი, ზილიხან.

— თქვენი ჭირიმეთ, რა ქალის საქმეა, და ისიც მაგოდენა ქალისა, რუსული წიგნები! სხვა ნასწავლი ქალებისა რა ხერი უნახავთ, რომ ახლა გასათხოვარ ქალს ასწავლიან რუსულ-

სა ეგ თვალ-დამდვარები!—უმეტებდა მაზლის ცოლი თუთალასი, ანუხსია.

— შენ გენაცვალე-და, რაღა დროს მაგოდენა ქალის სწავლას!—ასდევდა ფეხის ხმას თუთალას პურის მცხოველი გლეხის დედაკაცი, თითია.—ახლა ეგეც უნდა გაგვირუსდეს!

— იმისი არ იყოს, როგორც შვიდი წლის გომბიო შეავდეს რუსებში და მთელი სამი ოთხი წელიწადი ეგდო იქა! რა უნდა ისწავლოს რუსებშია არაშეიკობის მეტი!—ავრცელებდა თუთალა.—სამდთო წერილი ასწავლონ ის კი არაო, და მოჰყოლიან რაღაცა მიქარვასა. მაგოდენა ქალია, და რიგიანათ ჯერ ხუცური წიგნი არ იცის.

— სწორეთ!—უსვამდა ბეკედს სოფრონ,—რომელიც სთლიდა ერთ მოკლე კობალს, რომ უფრო მარჯვე სასროლი ყოფილიყო ძაღლებისათვის.

ტოლებიც, რომელნიც აქამდინ ამასთან ასე დამეგობრებული იყვნენ და უყვარდათ ამასთან დროს გატარება, რა-კი ველარა ჰხედავდნენ ამას თავიანთში და ჰხედავდნენ, რომ ის სულ წიგნებს ჩასციებოდა და ესენი აღარ ახსოვდა, აიღეს ცოტ-ცოტათი შური და დაუწყეს კილვა.

— დიდი რამა ჰგონია იმას ის თავისი რუსული წიგნები! კნაყნა სასო-კი არ იყო ისტეტუტში, რომ ეხლა ველარ გაუძლია შინა და სულ რუსის ჩინოვნიკებისთვის ოხრამს.

— მე ვიცი მაგასაც ისე მოუვა,—იძახოდა მეორე.

— მე ისიც მინახავს, რომ მაგ რუსულ წიგნებს გაეგვიე-ბინოს ადამიანი!—იძახოდა მესამე.

ამგვარათ კატო და ვასილი არც-კი ჰგრძნობდნენ, რა აზრები ისმრდა ამათზედ. მაინც იმათთვის სულ ერთი იყო. ამათ თუნდაგაეგონათ, ყურსაც არ უგდებდნენ. ესენი იყვნენ მომავალის ბედნიერებით და სქმეებით გატაცებულნი, ამათ სხვა არა ახსოვდათ-რა.

რუსული სწავლის მეტი ჯერ საზოგადოებას კატოს და

ვასილში არა აღელვებდა-რა. ისინი სხვა რასმე გუნებაშიაც ვერ გაივლებდნენ, რადგან ნათესაობა კატოსი და ვასილისა არ აძლევდა ამათ მიზეზს სხვაფრივ ამათის გაკილვისას.

#### IV.

ამაში ხანი გადიოდა და ვასილის წასვლის დრომ მოატანა.

ვასილ იყო სრულიად კარგათ. დედ-მამა აღარ აძლევდა ვასილს წასვლის ნებასა, მაგრამ ვასილმა პირ-და-პირ გადუქრა, რომ ამას აქ ვერა ძალა ვერ დაიკავეს.

ქრისტიანობის თვეში წავიდა ვასილ და უთხრა კატოს, რომ პასუხს ელოდეს-აბრილში.

წასვლის უკან სიღონია მთელი კვირა იყო დაჩოქილი ხატების წინ და მოსთქვამდა. ეკლესიის კარები იყო მოცვეთილი იმის მუხლისთავებისაგან.

ბაადურმა ვერ გაუძლო სიღონიას და გაეცალა მთელი ერთი კვირით ქალაქში.

— მინამ კიდევ ვისმე არ ამოიქამ, შენ არ გაჩუმდები! — უთხრა ბაადურმა წასვლის დროს.

— რა გეხმის, — შე უბედურო! რა იცი, რა ამბავია ჩვენს თავსა! — მისტირა უკან სიღონიამ ბაადურს, — და გასწია ამანაც ეკლესიისაკენ.

ვასილ დაბრუნებული უნივერსიტეტში, ჰგრძნობდა თავის თავს კარგათ.

რადგან პირ-და-პირ არ შეიძლებოდა მიწერ-მოწერა კატოსთან, ვასილ უზგავნიდა საკითხავსა და სასწავლებელს წიგნებს თავის მამის სახელობაზედ, რადგან ამის მეტმა ამათს გვარში არავინ იცოდა ფაქტის გზა, და ამ წიგნების ფურცლებში სდებდა წერილებს.

კატო გაგიჟებული კითხულობდა ამ წერილებსა და ჰლო-

ცავდა თავის ბედს, რაომ ვასომ აიტანა ჰავა. ის მოუთმენ-  
ლათ ელოდა იმ დროს, როდესაც დაბრუნდებოდა ვასო და  
წაიყვანდა ამასა. მინამ კატოს ბეჯითობას არა ჰქონდა სა-  
ზღვარი.

აპრილის დამლევით იყო, რომ კატოს სახელობაზედ კიდევ  
მოუვიდა ბაადურს კარგს მაგარს ყდებში ჩასმული რუსული  
სასწავლებელი წიგნები მხატრობაებითა. როგორც სჩანდა, ისინი  
უნდა ყოფილიყვნენ ზოოლოგიური და ფიზიოლოგიური წიგ-  
ნები.

სიდონია სიამოვნებით დასცქეროდა იმ წიგნებს, რომელ-  
ნიც, ვინ იცის რამდენჯერ სჭერია ამის პაწაწკუნა ვასილსა.  
იმას არ მოუთმინა გულმა, გადახსნა გარედამ მკვიდრათ და-  
ბეჭდილი და მაგრათ გადაკრული კლეიონკა, დაუწყო შლა და  
კოცნა თითქმის ყველა ფურცელს ცალკე.

— შეილოოო! ვინ იცის შენი თითები რამდენჯერ ცოდ-  
ვილებულა ამ ფურცლებზედა და შენი ლამაზი ყუყუნა თვა-  
ლები—(თუმცა სრულიად არ ჰქონდა ვასილს ყუყუნა თვალე-  
ბი)—რამდენჯერ ჩაჰფიქრებია!.. მოგიკვდეს დედა, რომ აგრე  
დაშორებული ჰყევხარ... შენ გენაცვალოს შენი სიდონიას თვა-  
ლები, ჩემო პაწაწა გიჟო ბიჭო, დედის ნებიერო...

ამ ფურცელასა და ალერსში რომ იყო, უცებ ერთს ალაგს  
ფურცლებს შუადამ ამოიღო პატარა დაბეჭდილი წერილი. ნა-  
ხა, იყო კატოს სახელობაზედ.

— ვნახო ერთი რასა სწერს ჩემი ბიჭი ამასა. ეს გოგოც  
შემიყვარდა ჩემი ვასილის გამო, რაკი ჩემს ვასილს უყვარდა  
და დროს ატარებინებდა.

აქ გახსნა ბეჭედი სიდონიამ და დაუწყო კითხვა:

წიგნში სხვათაშორის ეწერა, რომ კატო თიბათვეში მზა-  
თა ყოფილიყო და წაიყვანდა ჩუმათ ქალაქში ლამითა და იქ  
ერთს ნათლუხელს ღვდელს დააწერინებდა ჯვარსა. პატარას

ხანს უკან სიდონიას გავარდა ხელიდამ წიგნი და დაიწყო ძახილი:

— წყალი!.. წყალი!

გამგონი არავინ იყო. ბააღურიც არ იყო შინა.

— ღვთის-მშობელო! — შესძახა იმან საშინელის განწირულებით. — ეს რა უცნაური ცეცხლი მამიველინე... მიშველეთ!.. ქრისტიანებო!.. ვკვდები... ჯიგარი... დამეწვა ჯიგარი... მიშველეთ!..

მაგრამ მშველელი მაინც არავინა სჩანდა.

სიდონია აქეთ ეცა, რომ ეპოვნა სადმე თავის მამშველელი და მამსურიელბებელი, იქით ეცა, მაგრამ მაინც ვერაინი იპოვნა. ყველანი, თითქო განგებ, საცალას გასულიყვნენ. რაკი ვერავინა ნახა, იმან სტაცა ხელი წიგნსა, ისე გაშლილი და გაფრიალებული დაიჭირა და გაექანა ეფემიასაკენ.

— ჰა!.. ეგ ჯადოქრები ეგენი!.. ჰა!.. ეგ თილისმიანები ეგენი!.. ჰა!.. ეგ კათაკმეველნი... ქრისტეს გამსყიდველნი... არა რჯულნი... ჰა!.. ეგ ქრისტიანობის წა!...გამ... გამყრკენელნი!.. ნათესაობაც აღარ დაინდეს!.. ნათესაობანი!..

ასე გაათორებული შევარდა სიდონია პირ-და-პირ დეიდაჩემთან. ისინი ყველანი ისხდნენ სადილზედ. მეც ის იყო მივედი იმათსა, რაკი კატოს ეთხოვნა, რომელსაც ჩემს გარდა გული არავისთან ენდობოდა და თავის გულის პასუხს ვერავის უტყუდებოდა.

— ჰა!.. ნახევით! ნახევით ე თქვენი ნამუსიანი ქალის ამბავი! — და მიაგლო ზედ ცხვირპირში ეფემიას წიგნი სიდონიამ. — ემაგიტომ დაათრევდით ჩემს შვილს აქა?!.. ემაგიტომ აღარც დღე აღარც ღამე აღარ უშვებდით ჩემ უმანკო, ჩემ ანგელოზ შვილს აქედამა?!.. ჰა!.. ჰა!.. ჰა!.. თქვე... თქვე... რჯულისა და ნათესაობის გამამწრეტნო... ამამწყვეტნო... თქვე... თქვე... თქვე... ღვთის ფეხის მამქმელებო...

კატო მაშინვე მიხვდა, რასაც ნიშნავდა ესა და სულ მთლათ

გაშრა. ლუკმა გავარდა ხელიდამ. ის შეიქმნა სრულიად უძრავი. ის თითქმის აღარა ჰსუნთქავდა.

იოთამ თვალზე გაქცეტილი და გაოცებული უყურებდა გაცოფებულს სიდონიასა, რომელიც ხან დოინჯს შემოიყრიდა, ხან იქნევდა საშინლათ ხელებსა და შესძახოდა და ჰყვიროდა პირიდამ დორბლების ყრით.

— ღმერთი!.. ღმერთი! იმისმა მადლმა! ღმერთი!— გაიძახოდა ხამუშ ხამუშ სიდონია.

ეფემია კითხულობდა წიგნსა და ხანა ყვითლდებოდა და ხანა წითლდებოდა. იმან გაათავა წიგნი და დასდო უნებურათ ძირსა. იოთამ მოუთმენელად შეჰყურებდა ეფემიას, თუ რას იტყოდა იმისთანა საზარელსა, რომელსაც ასე საშინლათ აეშფოთებინა და აელეღვებინა სიდონია.

ეფემია იყო ჩუმათა.

სიდონიამ წამოავლო ხელი წიგნსა და გასწია.

— ემ წიგნს ჩემის ხელით პირ-დი-პირ მივართმევ ეგზარხოსსა, მართებელსა... მოჰყრყვნეს მეთქი ნათესაობა... შვილი გამირყვნეს მეთქი!..

აქ გავარდა სიდონია ხელში წიგნ გაფრიალებული და გაიჯღახუნა კარები.

— ჰა!.. თქვე თავზედ ლაფ-დასხმულებო!.. ბოზხანა გამართეთ განა თქვენს სახლში, რომ სხვაფრევ სული ველარათი მოიღგით! თქვენი ქვეყნის ნათრევი ქალით უნდა ჩემი შვილი საუკუნოთ დაგელუნათ! ჩემი ქონება შთაგენტქათ!.. ჰა!..

მიდიოდა მთელს მოედანზედ და მიიძახოდა სიდონია. სახლიკაცობა და სხვა მეზობლობა გამოაცვივდნენ და უყურებდნენ სიდონიას განცვიფრებულნი. სიდონია გადავარდა გაცოფებული შინა, სადაც დაუხვდა ბაადურიც და ზოგიერთა გოგო-ბიჭებიცა. სიდონია ჰყრიდა პირიდამ ცოფებსა, ეყრებოდა გულსა, ველარ იბრუნებდა სულოსა, მეტადრე რაკი დაინახა ბაადურ...

— ან შენ აიყარე... ან შენ აიყარე აქედამ, ან მიგათი-  
სინსილა არ იყვეს, სინსილა!.. ეგ როგორ არ შეგიძლიან მა-  
გოდენა ხელმწიფის ნამსახურს კაცს, რომ ეგ ყარტლიანები,  
ეგ ჯადოქრიანები არ დაგვეტრიალებდნენ ზედ ცხვირ წინ ბაი-  
ყუშებივით თავსა!.. ე მაგას როგორ ვერ ითავებ, რომ სულ  
გადასახლო ეგენი აქედამა... ჰა! შე ჩემო დამლუპაო!.. შე ჩე-  
მო დამლუპაო!.. შე ჩემო ნაცარზედ წყალის დამსხმელო!..

ელდასავით გავარდა ეს ამბავი იმავე თვალის დახამხამება-  
ზედ მეზობლობასა და სახლიკაცობაში და შეიქნა ერთი საში-  
ნელი ღალანი და მითქმა-მოთქმა.

— უი! ამ ღლის მომსწრესა!— იცემდა თუთალა თავში,  
რომელთანაც შეიყარა თითქმის მთელი სახლიკაცობა და მრავალი  
მეზობელი გლეხის დედაკაცები თავში ცემით და მუხლგე-  
ბის თქვეფითა— თქვენი ქირიმეთ, რატომ ცა თავზედ არ და-  
გვენგრევა... თქვენი ქირიმეთ, რა მოხდა... რა ცოდის ბრუნ-  
ვაა!.. მაგ ქალის პაპა და ვასილის პაპა ღვიძლი ბიძაშვილები  
იყვნენ... აი განათლება!.. აი რუსული ტიტინი... ი! ღვთის  
მშობელო! რატო ერთი ცეცხლს არ მოუვლენ ქვეყანასა და  
არ გადასწვამ ამოდენა ცოდვებო ბრუნვისათვისა?..

— გენაცვალე, ჩემო რძალო,— იძახოდა თუთალას ქერი-  
ვი რძალი, ზილიხან, ტუჩებზედ ხელმიდებითა,— და ბრმა შე-  
ნიშნავდა იმ ამბავსა, რასაც ისინი ჩადიოდნენ... თქვენმა მზემ  
ე ქალი თითონ ზედა ვარდებოდა... მუხლებში უვარდებოდა...  
მარტოკანი ვინ იცის სად არ დადიოდნენ... გახსოვთ ერთხელ  
ვასილ რო დაიკარგა... ის როგორ მოხდა, რომ ისა და კატო  
ერთათ ვიპოვნეთ?!.. გინახამთ ვისმე კატო იმ საღამოს შინა?!..  
აბა, შენ გენაცვალოს ჩემი თვალები, და შუადღიდან შუალა-  
მემდინ ყმაწვილი ქალი რომ ყმაწვილ კაცთან მარტო-მარ-  
ტო იმისთანა ჭალებში დაეთრეოდეს, სადაც ტურებისა და  
მგლების მეტი ვერა ქრისტიანი ვერა ჰბედავს სიარულსა, რა  
მოუათ, თქვენი ქირიმე, ათასი ცოდვისა და ბოროტის მეტი?!

— გენაცვალე, ქალბატონო, და ასე მოგახსენებენ, რომ ნაბიჭვარიც გაუგდია მაგ ქალსაო და ჩუმთ თავის ვენახის ღობეში ჩაუგდია და იქ ღორებს შეუქამიათო!— გაიძახოდა ერთი გლეხის ქვრივი დედაკაცი, ფეფელა, რომელსაც არა ჭორი არ გამოეპარებოდა და როდესაც ნახავდა, რომ ჭორები გამოილიაო, თითონ უცნაურს ჭორს დაჰბადავდა, და არ იყო აღამიანი, რომ ამის მოგონებაზედ იქვი შეეტანათ, თუმცა-კი ყველა ეძახდა მეჭორე დედაკაცსა.

— თქვენ გენაცვალეთ, ე რა მესმის!— იცობდა თუთალა ყურებში თითებსა;— ნაბიჭვარიც გაუგდია?! ვაი გვარის შერცხვენასა... ვაი ჩვენს ლაფის დასხმასა!.. ნაწრეტანთ ერთი ენამუსის ხმა-ლა ჰქონდათ და ახლა უნამუსოსა და გოთვერნების მოწყალებით ეგეც შეგვირცხვა და მოგვექრა საქვეყნოთ თავი.

— კაი სიზმარი გინახავთ.— უთხრა სოფრონმა, რომელიც უგდებდა ამ ლაპარაკსა და გულის-ხეთქვას ყურსა და რომელსაც ძაღლების დანახვა უფრო აღელვებდა, რომელთაც საცა-ლაც შორს მოჰქრა თვალი, რომ დასდევდნენ ძუენა ძაღლსა, ვიდრემ გვარის შერცხვენა და თავზედ ლაფის დასხმა.

— მაგათი სახლი ყოველთვის ეგრეთი ბოროტი ყოფილა და ეგრე ბოროტათაც დარჩება,— დაუმატა სარიდან ნაწრეტი-შვილმა, რომელიც ირაცხებოდა შემდეგ ბაადურისა ამ გვარში დარბაისლათ, რადგან ჰქონდა ყელის მედალი და თავის უმაწვილობაში ახალი რუსობის დროს, რაღაცა ამორჩეულათ ყოფილა სამსახურში, თუმცა არც მაშინ და არც ეხლა არ იცოდა წერა კითხვა.

მინამ აქ ეს ამბავი და ლაღანი ასტყდებოდა, მინამ დეიდაჩემის სახლში უფრო სხვა ამბავი იყო. გავიდა თუ არა სიდონია, დეიდაჩემმა, რაღაზედაც დამსაქმა და გამიტყუა გარეთ. იმან ჩაკეტა კარები და უცებ, როგორც აფთარი, თვალეში საშინელის ცეცხლით, კრიკა შეკრული და სულ-გამელებული ერთი თვალის დახამხამებაზედ ეცა კატოსა, სწვდა გძელს, სხვილს

ნაწნავებში, ამოიღო ქვეშა, აგლეჯდა თმასა, სთელამდა წიხლებით, სცემდა მუშტებით, ათრევდა ფეხით, უხლიდა საშინელის გამეტებით კელლებზედ და მიწაზედ თავს და აგლეჯდა ხორცებსა.

კატო იყო ჩუმათ, ხმა ამოუღებლივ. იმისი სურვილი ეხლამხოლოდ ის იყო, რომ მოეკლათ. აღარც ტკივილს, აღარც სირცხვილს არაფერს ამ სურვილის მეტს ის არა ჰგონებდა.

ეფემია, მოღალეული ცემისა და ღელვისაგან, დაეშვა მთლათ უღონოთ და დაუწყო გულმა ღონება. კატო იყო უგონოთ. იოთამმა, რომელიც აქამდინ გამშრალი და გაშტერებული შეჰყურებდა ამ ამბებს და არ იცოდა, რა ჟქნა ან როგორ მიჰშველებოდა თავის ქალს, შეჰქნა ყვირილი. ამ ყვირილზედ შევევარდი მე. კატოს ცხვირიდამ, პირიდამ, ხელებიდამ, თავიდამ სდიოდა თქრიალით სისხლი; ტუჩები ჰქონდა დასიებული; თმები ჯქუფ-ჯქუფათ ეყარა აქეთ-იქითა; თავი ჰქონდა რამდენგანმე გატეხილი, ტანისამოსი ლუკმა-ლუკმა ნაქცევი. ის ეგდო უძრავათ. დეიდაჩემი იღო გულალმა გადაშოტილი, ხელებ გადაყრილი. ის იყო გულ-შემოყრილი. ამისთანა ჯანიანი, ამისთანა მხნე, მუშა დედაკაცი, რომელსაც ძვირათ ჰნახავდა კაცი გაშფოთებულს, ეხლა ეგდო თითქმის უსულოთ.

მე და იოთამ მაშინვე მივცვივდით წყალს, ძმარს, არაყს და სხვა ამგვართა და უწყეთ მოსულიერება. ამ ხმაურობაზედ შემოაცვივდნენ სხვანი მრავალნიც, რომელთაც გვიშველეს ამათი მოსულიერება.

კატო გავათრიე ცალკე ოთახში და შევიკეტე კარები, რომ დედას ამის დანახვაზედ კიდევ არ აშლოდა გულის შფოთვა და არა მოეხდინა რა საცოდაობა თავის თავსა და კატოს თავზედაც.

კატო შემცდარივით აცეცებდა თვალებსა, რომელნიც საშინლათ დაჰსიებოდნენ ცემისა და კაწვრისაგან. ის დაემხო

პირქვე მუთაქაზედ და არ უგდებდა, აღარც ჩემს ლაპარაკს ყურს აღარც არავის სხვის სიტყვებსა.

ლამე არ გაუხდია იმას ტანთა.

მე ვერა ვშორდებოდი, რაკი ვიცოდი, რომ ისევ თუ ვის-მე რას გაუგონებდა, გამიგონებდა მე.

მე ოდნავ ჩამთვლიმა.

შუალამე კარგა გადასული იყო, რომ უცებ გარეთა კარების კრიალი მამესმა.

მე მაშინვე გული შემიკრთა.

ენახე... კატო აღარ იყო.

— არიქა, მიშველეთ, კატო გავარდა! — შეეძახე შინა, და გავექანე მაშინვე წყლისაკენა, რაკი ვიცოდი, რომ კატოს გამბედავი ხასიათი პირდაპირ ამ გზას უჩვენებდა იმ მდგომარეობილამ გამოსასვლელათ, რაშიაც ახლა ჩავარდა.

ლამე იყო მთვარიანი, კატო აღარა სჩანდა. მე საშინელის სიმალით, ფეხშიშველა გავრბოდი იმ გზაზედ, რომელსაც კატო არ ასცდებოდა. შორიახლო წყლისა, საურმე გზაზედ მოვკარ ჩრდილივით რაღასაც თვალი, რომელიც საშინელის სისწრაფით, თითქო მიფრინავსო, გარბოდა წყლისაკენ. მე შემოვიკრიფე ყოველი ძალი და ღონე და მოუმატე რაც-კი შემეძლო მუხლსა.

ახალი მოვარდნილი წყალი, აღელებული, ისვრიდა საშინელს ზვირთებსა და ჰყრიდა საშინელს წინწყლემსა და ქაფსა. ქვების ჩახა-ჩუხი აყრუვებდა კაცსა. მთვარე ანათებდა მოწმენდილს დამშვიდებულს ცასა. გარშემო იყო მყუდროება. შორს ისმოდა ქოტის ხმა. ბუღბუღების ტკრცენა, შტიალი და სტვენა ეღებოდა ქალებსა.

კატო წაადგა ერთს საშინელს ბორცვს, სადაც ერთათ დარუებული საშინელის ღრიალითა და დამახშოვებელის ხმულით მოდიოდა მდინარე. იმან სასწრაფით გადიწერა პირჯვარი და... გადაეშვა...

V.

რამწამს გადაეშვა კატო გადასახტომათ, ამ დროს წამო-  
ვწვდი მე და ვსტაცე შიგ ნაწნავებში ხელი. ის სრულიად  
უგონოდ, წყლის მაგივრათ, გადმოვარდი კურტ-უკულმა და  
დაეშვა ჩემს მკლავზედ. მე გადავსწვდი ქულით წყალს და  
უწყე სულიერება. კატო მოვიდა გონს მხოლოდ შინა. იმან  
გადავავათვალაიერ-გადმოგვავათვალაიერა რალაცა უცნაურის გა-  
კიცხვის თვალით და თითქო ამბობდა, ეს უცნაურება რო-  
გორ მოხდა, რომ მე წყლის მაგივრათ ჩემსავე სახლში ვა-  
რო, მიეცა დუმილებას, და პატარას ხანს უკან ისევ დაეშვა  
პირქვე მუთაქაზედ. იმას თვალეზზედ გაუშრნენ ცრემლები, ასე  
გასინჯეთ, რომ ის წყალი, რომელიც ნიდაგა ბრწყინავდა იმის  
ცოცხალს თვალეზში, ის წყალიც-კი გაჰქრა იმის თვალეზიდან.  
ეფემია თავის მხრივ უყურებდა ისევ მრისხანე და შეურეგებე-  
ლის თვალთ, იოთამ იყო უფრო ჩუმათა და შიგა და შიგ  
უშვებდა ტუჩებიდან შტვენის მსგავს ფშვენასა და იმეორებდა  
ხამუშ-ხამუშ „ჰე, ჰე და არა არა!“

— აი, ეგეც მაგათი სწავლა!—გაიძახოდნენ იოთამის სახ-  
ლიკაცები.—აი რა მოსდევს სწავლასა!

— უბედურები!—გაიძახოდა თუთალა,—აჰყენენ ეგენიც  
ფეხის ხმასა, ვითომ ჩვენც არავისი ტოლი ვართო!.. საქვეყ-  
ნოთ-კი ლაფი დაისხეს და ქვეყანაში თავი მოგვეკრეს... რაზედ  
იქერდნენ! რაზედ იქერდნენ!.. დაეხრჩო თავი და მოვერჩინეთ  
ამითი ამოდენა სირცხვილსა, რო დეედევნენ მაშინვე უკანა!..  
რალა სასიცოცხლო იყო, თქვენი ჭირიმეთ, ამ ამბების უკანა!

ამ ამბებმა და ხმებმა მიაღწიეს ჩემს დედის ძმას ზაალ ამ-  
რეზაშვილამდინ, რომელიც ირიცხებოდა თავმომწონე დარბაი-  
სელ კაცათ გარშემო მეზობლებში და იყო ნამსახური საცა-  
ლას პერეგოდჩიკათ თუ დიამბეგის პომოშნიკათა. ის, საშინე-  
ლი აღელვებული, დაიბადა მეორე დღესვე დეიდაჩემთან.

— სად არის ის ნამუსიანი ქალი?!.. სადა ბრძანდება ის ჩვენი საქვეყნოთ თავზედ ლაფის დამსხმელი და ჩვენი საუკუნოთ შემარცხვენელი?!— შემოჰყო თუ არა თავი, იკითხა მრისხანეთ და საშინელის განკიცხვით ზაალმა კატო.

კატო იყო მეორე ოთახში პირქვე დამხობილი, ორი ღლის პურ უქმელი და ეყურებოდა ესე ყველაფერი. ამ ხმაზედ იმან წამოიწია მუთაქიღამ, მოიხედა რალაცა გამოუთქმელი სახით, სახით, რომელიც ამბობდა საშინელს ამღვრევას, საშინელს შინაგანს ბრძოლას, საშინელს ლელვას, დაურეველს მწუხარებას და ძალას, რომელიც ცდილობდა ყოველი ამ მდგომარეობის დაფარვას. ის იყო ამრეზილი, ანთებული, ატაცებული; თვალები ჰქონდა ჩაცვივნილი და დახშული.

ძმის დანახვაზედ ეფემიას გაეხსნა ცრემლების ნაკადული და აუმიწყდა გული. იმან მორთო ტირილი, ტირილი ცხარე, ტირილი გულიანი, რომელიც კვლავ არას ოდეს არავის არ უნახავს ამისი. ეს „ქვის გულის პატრონი,“ როგორც უძახოდნენ ამას ყველა მახლობელნი და ნაცნობნი, სტიროდა, როგორც ჭირისუფალი, რომელსაც დაუკარგავს საუკეთესო გულის საყვარელი.

კატომ ამ ამბავზედ იტაცა ორთავე საფეთქლებში ხელი და დაეშვა ისევ პირქვე იმნაირის გულით, თითქო უნდა ამითი გახეთქოს მიწა და შთანთქას თავი ქვეშენეთშიაო.

— ტირილი-კი არა, უნდა გაგეტიტვლებინათ დედის-შობილა, შეგესვათ ვირზედ, დაგესხათ საქვეყნოთ ლაფი და გაგედლოთ სახლიდამ, — დაუწყა ზაალმა, — რა შესანახია მაგისტანა ნამუსზედ ხელ აღებული ქალი სახლში!.. რათ იქერდით, თავს რომ იხრჩობდა?!. კი არ უნდა დაგეჰირათ—უნდა ქვა მოგებათ კისერზედ და ისე გადაგედლოთ წყალში, რომ სულითაცა და ხორცილთაც დაკარგულიყო... სად არის? სადა გყავთ, ერთი მჩვენეთ — შევხედო იმას თავის პატოოსან თვალებში, ერთი თავის სპკადრისათ შევმქცო.



ამ ხმაურობაზედ უცებ წამოხტა კატო გიჟივით და დაუწყო კედელზედ თვალიერება. აქ ხშირათ ეკიდა ხოლმე იოთამის იარაღი: კატო დაცეცებული თვალებით, სწრაფლათ ეძებდა იარაღს. იარაღი მე ვავიტანე იმავე ღამესვე აქედამ. რაკი ვერა ნახარა კატომ, ის უცებ მიეშვა და დაასკდა პირქვე მუთაქას.

ზაალ გამოემართა კატოს ოთახისაკენ, მაგრამ იოთამმა შეაყენა. საწყალი მოხუცებული, იოთამ, ვერ იმეტებდა<sup>1</sup> კიდევ თავის კატოს. იმას უკვდებოდა გული ისე შერცხვენისგან არა, როგორც იმაზედ, რომ კატო ამ საშინელს გარემოებაში ჩაადგეს, თუმცა ამაზედ არ უტყდებოდა თავის თავს და ცდილობდა თავის ცოლის წაბაძვას.

— კარგი, ზაალ, მამაშენი ნუ წაგიწყდება, დაბრძანდი, ერთი გვითხარი რამე ამ მწუხარე გუნებაზედ... კატო ეხლა რა სანახავია!.. მამაჩემი არ წაწყდეს, რომ ის თავის გონებაზედ აღარ იყვეს,.. ორი დღეა პურუჭმელია...

— ეეჰ, კარგია ერთი, მამაშენი ნუ წაგიწყდება, იოთამ და! სულ შენგან არის ეგ ქალი გაფუჭებული! აცლიდი და ჩაუსვამდი წიგნებსა... წიგნები და წიგნები!.. შენ გინდა, რო ყველა შენსავით ფილოსოფოსი და მეცნიერი ჭამოვიდეს... მეცნიერებამ და ფილოსოფობამ ეგ იცის... ქვეყანაზედ-კი აღარ გამოგესვლებათ და!..

აქ ზაალ დაჯდა. იმან აიყარა იარაღი და მისცა თავის ბიჭს, რომელიც ის იყო შემოვიდა ამასთანა. ბიჭი ისევ გავიდა.

— ახლა ტირილით და თივში ცემით აღარა მოემატება-რა, — დაიწყო ზაალმა შემდეგ რამდენისამე სიჩუმისა; — ახლა უნდა ვეცადოთ, რომ მინამ ეს ხმა მოედება ქვეყანასა, ეგ ქალი მოვიშორათ თავიდან და მივაჩქოთ, ვინც იყვეს, თორემ მასუკან, რაკი გაიგებენ მაგის ქალობას, მენახირეც აღარ შეირთავს.

— მეტი რა გზაა, შენ გენაცვალოს ეფემიას თვალები! —

დაიწყო ეფემიამ დაშოშმინებით.—უნდა გამიწიო სამშობლო-  
ბა და მიპატრონო რამე. შენს მეტი პატრონი არაყინა გყავს.  
შენს სიძეს რომ ყური მიუგდოთ, თქვენმა ბზემა, თვალწინაც  
რომ ნაბიჭვარი გაუგდოს, ყურებსაც არ გაიბერტყს, ოღონდ-  
კი ამეცნიერე და ალაპარაკე. მე ქალი ვარ და არავის ვიც-  
ნობ. ეხლა იმ საშინელს მდგომარეობაში ვართ, რომ, ოღონდ  
ამ სირცხვილს და ამოდენა სახლიკაცობის საყვედურსა და ძრახ-  
ვას მოვრჩეთ, თორემ დიდს ვისმე, არც არავის-კი გამოვეკი-  
დებით. ასე რომ არ მოგვსლოდა, მე ვიცოდი, როგორც ვა-  
პირებდი, მაგრამ ეხლა არჩევანებში შესვლა ძნელია... რა მა-  
მაფიქრებდა, რა მამაფიქრებდა!.. ყმაწვილს შვილივით უყუ-  
რებდი... ყმაწვილი ძმათ ეკუთნოდა... და ასე გამიმეტებდნენ...  
ასე თავს მამჭრიდნენ... ნეტა ჩემგნით ან წყენა ახსოვდეს, ან  
დაშლა რისამე... ვანებიერებდი... თითონაც სულ ჩემი თვალ-  
სა და პირში შემაყურებელი იყო... ჩემს სიცოცხლეთ მაგას-  
ლა ვიგულებდი და ნახე!..

აქ ეფემიამ ამოიოხრა საშინლათა და მორთო ისევ ტი-  
რილი.

— ახლა გადასადგებადაც გამიხდა ერთათ ერთი ქალი...  
ახლა უნდა ავიღო და, თვალის ჩინივით გაზდილი ქალი, ერთ  
უბრალო მენახირეს მიუგდო...

— რა გაეწყობა!—სცემდა ზაალ ეფემიას ნუგეშსა,—ჩვენ  
ჩვენი ვეცადოთ და ეგება ღმერთმა სრულიად არ აიღოს ჩვენ-  
ზედ ხელი. ერთი ორი რიგიანი მეგულება, თუ ვინმე არ გა-  
დაგვიბარა და არ მიალწია იმათამდინაც ამ ხმამ, ეგება მოხერხ-  
დეს. აი თუნდა ილიკო კუდარიკიძე. შენმა მზემ კაი ყმაწვი-  
ლი, სრულიად... ბავშვი, კაი თვალადი, კაი ტანადი, კაი თა-  
ვადიშვილი. ყმა და მამული თავისთვის საკმაო. ჩემთან ხში-  
რად დაიარება. ხვალვე შეუდგები იმის გზასა და ამ დღეებში  
იმედი მაქვს მოვახერხო. თუ ის იქნება, ხო რა კარგი, თუ  
არა და ვინც იქნება ამ დღეებში უნდა მოხერხდეს.

ეს ლაპარაკი ყველა დაწვრილებით ესმოდა კატოსა. ამ ლაპარაკზედ, თითქო გველმა დაუარა ტანშიაო, იმას წამ და უწუმ შეათრთოლებდა და შეახტუნებდა.

ვახშობა მოვიდა. ვახშამზედ კიდევ ილაპარაკეს კატოს საქმეებსა და თავიდან მოშორებაზედ. ვახშამთ უკან მალე მიეცნენ ყველანი მოსვენებასა, რათგან ზაალ იყო ნამგზავრი და დაღალული, ეფემია და იოთამ ნაღელვები ამ ორი დღის თავსგადასახედებისაგან. ღამე კატოს მაგრა დაუკეტეს გარს კარები, რომ წასვლა არსად შესძლებოდა. მე და ერთი გოგო გაგვიშვეს კატოს ოთახში. სამთელა მთელი ღამე ენთო. კატო ისევ ტანთ გაუხდელი ეგდო.

გოგო, წინა ღამის ნაღელვები და ნანჯღრევი, როდესაც გამოცვივნულიყვნენ კატოს საქმენელათ, ის რომ წაივინა დასახრჩობათა, ეგდო ჯირკვივითა და ეძინა, როგორც მკვდარს.

მე არ მეძინებოდა, რათგან სადილთ უკან მეძინა ბევრი, და ვკითხულობდი რალაცა წიგნსა, რომელიც კატოსთვის გაეშვა ვასილსა.

შუალამე გადასული იყო. სახლში და გარშემო იყო საშინელი სიყრუე, შორიდან ისმოდა მხოლოდ ქოტის ძახილი და მოდიოდა საშინელი ხრიალი და ხმუილი იმ მღელვარე მდინარისა, რომლისაც მსხვერპლი კინაღამ გახდა წინა ღამეს კატო.

კატომ უცებ გიმოიხედა შუბლ ქვეშ და დაგვათვალეირა. შენიშნა, რომ გოგოს ეძინა მკვდარივითა. იმან უცებ მანიშნა ხელით, რომ ახლო მივსულიყავ. მე მივედი, ის უცებ მამეხვია და ჩამიკრა გულში, გადამდო თავი მხარზედ და მამათარა ზურგს უკან თვალები, რომ არ შემენიშნე, რაცა ჰხდებოდა იმის თვალეში. იმას წასქდა უცებ ტირილი, მისცა ცრემლის ნება და გადიქცა ცრემლის ნაკადულათ. იმისმა ცრემლმა გამტანა ახალუხს ქვეშიდამაცა.

— გიყვარვარ, განა, ჩემო ბესარიონ?! ხომ ჰხედამ რა

დღეში ვარ!—დაიწყო იმან შემდეგ დიდის ხნის ტირილისა, შემაგრებულის დაბალის ხმით.—შენ ვერ მიხვდები ჩემს ცეცხლსა, თორემ გუშინლამ მე არ გამიმეტებდი ამ ცეცხლში ჩასაგდებათა და არ გადამარჩენდი!.. ვიცი—ეგ ჩემი სიყვარულით მოგივიდა. მაგრამ გესმის ახლა უფრო რა ცეცხლი მელის?!?.. გესმოდა ბიძაჩემი ზაალის ლაპარაკი?!.. რას მიპირებ, ბესარიონ!? ჩემო ბესარიონ!!.. ჩემი მისამართი შენს მეტი ქვეყანაზედ არავინ არის... გესმის თუ არა—უნდა ქმარი შემერთონ!!!.. ჰა!!.. ვასილი?!.. ჩემი ვასილი?!..

და აქ უცებ მიიფარა კატომ თვალებზედ ხელები და ჩამიყო თავი კალთაში. ის დიდსა და დიდს ხანს იყო ამ მდგომარეობაში. უნებური, შემაგრებული მწარე კვითინი ჰხდებოდა ხამუშ ხამუშ გულიდამ. ბოლოს აიმართა ისევ და შემამხედა პირდაპირ თვალებში. კატოს თვალები ჰღელავდნენ ისევ თავისებური სიცოხლით და ცეცხლით. იმათში გამოითქმოდა ცალკე განწირულება, ცალკე რალაცა სასოება.

— ბესარიონ!—დაიწყო ისევ იმანა:—თუ გაქვს პატიოსნება, თუ გაქვს მცირეც არის ჩემი სიბრაღული და არ გინდა საუკუნოთ ჩემი საცოდაობა ზიდო, უნდა ან გამიშვა და დამანებო თავი, რომ როგორც მიჯობდეს, მოუარო ჩემს თავსა, ან უნდა გამაქციო... ქალაქს... და აცნობო ეს საჩქაროთზედ ვასილს.

ამ სიტყვებზედ გამიყარა კატომ თვალებში თვალები და მოელოდა მოუთმენელათ პასუხსა.

ვაშვება ამისი თავის ნებათ—ჰნიშნაყდა იმასა, რომ მიმეცა ნება თავის დიდრჩობისა. ქალაქში წაყვანა! რა ადვილი საქმეა სხვებისთვის და რა ძნელი შესასრულებელი ჩვენთვის!

მე ჩაფვიქრდი. გული მეთუთქებოდა, თითქო მდულარე ვისმე დაუსხამსო. რომ არა მრცხვინებოდა, კატოზედ მე უფრო ტირილს მოვრთამდი. კატო, რომელიც თითქმის ქვეყანას მერჩივნა, კატო, რომელმაც მარტო მიიღო მონაწილეობა ჩემს

მწუხარებაში და ასალმუნებდა ჩემს გულს, ეს კატო იყო იმ საშინელს განწირულებაში, ჩემს მეტი შველა არსადა ჰქონდა, და მე-კი ამისი შველა არ შემეძლო. საწყალი გატო! წყალ წაღებული ხავს ეკიდებოდაო. ის იყო წყალ წაღებული და მე— ხავსი, რომელსაც იმისი შველა სრულიად არ შემეძლო. ქალაქს წაყვანა! გროში ფული არც მე და არც იმას არა გვქონდა; არც მე და არც იმას არც ნათესავი და არც ნაცნობი არა გვყვნდა, რომელსაც ან ერთი დღე მიინც არის შევენახეთ. სად, ვისთან და როგორ უნდა მიგვემართნა? მერე ვისა? მე, რომელიც სრულიად გამოუცდელი ვიყავი ამგვარს საქმეებში.

— რას დაფიქრდი? — შემეკითხა უცებ კატო საშინელის გაბედვისა და თან ხვეწნის კილოთი, — ვიცი უფულობა გაბრკოლებს, სხვა მე ვიცი, რომ ჩემის გულისთვის ვერა დაგიქერს-რა. ფულიც იქნება — ჩემი ნივთეულობანი, აი ყველანი აქ არიან, რა წამსაც მეტყვი, სუყველა ჩვენ ხელთ არის, ოღონდ მიშველე, შენი ძმობის ჰირიმე! — და აქ კატო უცებ მოეშვა ჩემ წინ მუხლებზედ.

ამ დროს ~~გაგლო~~ ჰარები და შემოვიდა იოთამ: იმასა ჰქონდა ნამტირალევი თვალები. ჩვენ ორნივენი ~~დავრჩით~~ გაშეშებულინი. იოთამ მივიდა პირდაპირ, გადაეხვია კატოს და შორთო ჩუმი ტირილი. იმას მთელი ღამე არა სძინებოდა და მოეკრა ყური ჩვენი ლაპარაკისთვის. საწყალი მოხუცებული! იმას გაგიეებით უყვარდა თავისი კატო და ვერა გაეწყო-რა ამის ამ მწუხარებაზედ.

— სად უნდა წახვიდე? — დაიწყა ჩუმის სლოკინით იოთამმა. — ვილას ამარა უნდა გაუშვა შენი მოხუცებული მამა? ცალი ფეხი სამარეში მიდგია, შვილო! ჩემი სიცოცხლე შენ იყავ. ჯერ მე მამკლან და მემრე შენი უსიამოვნო საქმე ისე ჩაიღინონ. ვის შეუძლიან შენს უნებურათ შენი გათხოვება?!.. რათ გინდა, შვილო, შენი მოხუცებული მამის სიკვდილი!.. რა წყე-

ნა მოგაგონდება... მე შენ არას გეტყვი, თუ-კი გამიმეტებ სა-  
სიკვდილოთა.


კატოს აუჩუყდა გული, მოეხვია მამას ყელზედ და მოუმა-  
ტა ტირილსა.

— განა არ გამიმეტებ, მამაჩემო? განა ჩემს უნებურათ არ  
მიმცემ არავისა და არ მოინდომებ ჩემს სიკვდილს?!  
იოთამ მოეხვია კატოს და ჩაიკრა გულში.

ამგვარათ ტკბილათ ჩაკრულნი და წრფელის გულით ალერ-  
სით თავის გულის პასუხის გამოთქმულნი მამა და შვილი მე  
ალარ შემხვედრია მასუკან.

დიდს ხანს იყვნენ ისინი ამგვარათ. დიდს ხანსა სტირო-  
დნენ ჩუმათ, თითქო ამითი უნდა გამოეთქვათ თავისი სი-  
ყვარული. მასუკან იოთამ ჩუმათ გამოვიდა, რომ არავის  
გაეგო ეს ამბავი და კატოც გულდამშვიდებით ძლივს მიეცა  
ძილსა.

მეორეს დღეს ჩუმათ ვაფრინე კატოს წიგნი ვასილთან  
ფოჩტითა, რომელიც მე თითონ ჩავიტანე ფოჩტაში.



მეორე დღეს აღრიანათ, მინამ იოთამ და ეფემია გაიღვი-  
ძებდნენ, ზაალ წასულიყო კატოს გათხოვების თადარიგის და-  
საქერათ.

ილიკო კულარიკიძე, რომელიც უნდოდა ზაალს კატოს-  
თვის, იყო მართლაცა და კარგი გვარის თავადიშვილი. ის იყო  
სწორეთ ჩემხელა. მართლაცა და ლამაზი თვალად ტანადი. მე  
იმას კარგათ ვიცნობდი. ისა და მე ერთათ მიგვაბარეს ერთს  
პოლკის სასწავლებელში, საიღამაც მე გადმიყვანეს ანუ გამგზავ-  
ნეს ერთს უფრო მაღალ სასწავლებელში და ის ერთი წელი-  
წადი კიდევ დარჩენილიყო იქა.

მამა ამისი, ბეჟან კულარიკაძე, იყო კარგი შემძლებელი

თავადისშვილი. მამამ ბეჟანს დაუტოვა დიდი ყმა და მამული. იმას უღარდელათ მოსდიოდა ცხოვრება სახლში და უღარდელათაც ატარებდა თავის დღეთა. ამან თავის სიყმაწვილეშივე შეირთო ერთი სომხის დარდიმანდი ქალი ორასის თუმნის მზითვითა, რომელიც მაშინ დიდს ფულს შეარდგენდა. მაგრამ ამისმავე დარდიმანდმა ცოლმა მალე აშობინა ამ ფულს აქლემი. დარდიმანდობით ბეჟან ცოლს და ცოლი ბეჟანს არ დაუეარდებოდნენ. აქ დადგა ვორონცოვობა. თავადისშვილობამ, რაც იყო და არ იყო, აიწია და დაუწყო ბაძვა ვორონცოვის ცხოვრებას. ჩაცმა—დახურვამ, სახლებმა, მებელმა, ეკიპაჟებმა, გამოსვლამ უცებ შემოყვეს საშინელის მოთხოვნილებით თავი ჩვენი მალალი წოდების ცხოვრებაში. გაიხსნა პრიკაზი. ფული გაგვიადვილდა და ეწაფნენ ჩვენი თავადები ამ ფულებსა. ბეჟანიც, რასაკვირველია არ დარჩა შტატ გარეთა. იმან ერთბაშათ გამოიტანა ხუთასი თუმანი. რაკი ბეჟანმა მოიგდო ფული ხელში, აღარ ახსოვდა, რომ ამ ფულს მოითხოვდნენ უკან ხარგებლითა. ამ ფულსაც ამანა და ამისმა დარდიმანდმა ცოლმა აშობინეს აქლემი. პრიკაზმა დაგირავებული მამული შეასყიდინა დაგირავებულ გლეხებსა, რომელნიც გავიდნენ სახელმწიფოთა. დარჩა ბეჟანს ნახევარზედ ნაკლები თავის ყმა და მამულისა. მაგრამ, რაკი შეეჩვია ის მდიდარ ცხოვრებას, ველარ ითმენდა ამათს დათმობას და გაზდევდა ჩვეულებას. ამისგამო დაიწყო ურიებისა და სომხებისაგან ვალების კრეფა, რომელშიაც აძლევდა თითქის მთელს მოსავალს სარგებელშია. ბეჟანს აღარ მიჰყვა ზურგი ხშირათ ქალაქში სიარულისა და ამან დაიწყო თავის დარდიმანდის ცოლით დღეობაებში სიარული და შაქცევა. ის არ იტეხდა ეხტიბარს თავის ტოლს თავად-აზნაურებში და ცდილობდა ეჩვენებინა იმათთვის, რომ ნაკლებობას არაფერში არ ითმენს. იმისი ცოლი, კნენა რიფსიმე, იყო დედოფალი ყველა დღეობისა. ყმაწვილი კაცები და ქალები ევლებოდნენ თავსა. გარდა პურადობისა, რომლითაც

იცოდა კნენა რიფსიმემ მიზიდვა ახალგაზღვრობისა, იმას ყოველთვის ჰყვანდა თავისთან ლამაზი გასათხოვარი ქალები ან თავისი ან ქმრის ნათესაობიდან. ეს ყმაწვილკაცობის გარს ვლენა და ამასთან ნიადაგ ტრიალი აძლევდა რაღაცა სიამოვნებას კნენა რიფსიმეს. დღეობაებში მთელი გამოჩენილი ყმაწვილკაცობანი იყვნენ ამისი სტუმარნი, რომელთაც შეაქცევდა საზანდრებითა და ზურნა-დაფითა. უიმისოთაც ამის სახლში არ გამოიღეოდა სტუმარი და შექცევა. ერთის სიტყვით, კნიაზიცა და კნენაც, რა დღესაც მოაკლდებოდნენ ამგვარს სიამოვნებათა, აღარ ეგულდებოდნენ თავი ადამიანათ. ამგვარს ცხოვრებას უნდოდა დიდი შეძლება და მხნეობა, კნიაზი და კნენაკი ორივეს იყვნენ მოკლებულნი. მაშასადამე, რითიმე უნდა შეევესოთ ნიადაგ თავისი დეფიციტი. ამგვარს გაქირვებებში კნიაზთან დაიწყეს საიდამლაც ცნობა და სიარული ოსებმა და თათრებმა. კნიაზს უჩნდებოდა უცებ საიდამლაც საჩუქრებათ სულ არჩეული ცხენები და კამბეჩები, რომელთაც ის თითქმის უფასურათა ჰყიდდა. მაინც ესეც არას გახდა. მიღწეა იქამდის საქმემ, რომ ხშირათ სტუმრისათვის არამც თუ ცხვარი, და ქათამიც აღარ ეშოვებოდათ. მაგრამ სტუმრები მაინც მაძღრები და ნასიამოვნები რჩებოდნენ. მხოლოდ გასაკვირველი ეს იყო, რომ ბოლოსა და ბოლოს დროს, რამდენიც ამასთან სტუმრები მოვიდოდნენ, იმდენა მეზობლების ცხვარი, ღორი, ქათამი, ბატი, ინდოური აკლდებოდათ. კნიაზ ბეჟანზედ ვინ რას გაიფიქრებდა! კნიაზ ბეჟან, რომელსაც მოსდევდა ნაჩალიკი, სუდია, მარშალი, დიამბეგი; კნიაზ ბეჟან, რომელიც დაიარებოდა ვარანცოვის ბაღეში! მართალია, ეს კი იცოდნენ, რომ კნიაზ ბეჟან სჩაგრავედა სახლიკაცებს, სტაცებდა ბეგარას, საბალახეს და სხვა, რომელიც ამას ვაჟკაცობაშიაც ეთვლებოდა, რომ ძალასა ჰხმარობდა და არ ჩადიოდა ჩუმათა. მაგრამ, რომ ამას ჩუმათ ვისთვისმე წაეგვარა ქა-

თამი, ინდოური, ბატი და სხვა, ამას ვერაფერს მოიფიქრებდა. მართალია, დადიოდა ერთი რაღაცა უცნაური ხმა, მაგრამ კნიაზ ბეჟან იყო მტყუანი თუ კნიაზ დარისპან—არაფერს იცის, რადგან ქურდობისა და ამგვარი ავკაცობის ხმა უფრო დარისპანს ჰქონდა, და რომ ამაში კნიაზ ბეჟან არ უნდა ყოფილიყო მტყუანი, ეს იმითიც დაუმტკიცა კნიაზ ბეჟანმა, რომ მეორეს დღეს, საშინელი ცილისთვის, დაჰხვია კნიაზ დარისპანს ბიჭები და კინალამ მოაკვლევინა ცემითა.

აი რაში მდგომარეობდა საქმე. ერთს ღამესაც კნიაზ ბეჟანს დაესხნენ სტუმრები. ამავე ღამეს კნიაზ დარისპანის ფარეხთან ატყდა ერთი საშინელი ძაღლის ყეფა: მეცხვარეები გამოცვივდნენ. კნიაზ დარისპანიც გამოვარდა და უცებ დაიჭირეს კნიაზ ბეჟან ერთის კარგის ჭედილათი, რომელიც იმას ჰქონდა შემოგდებული ცხენზედ და მოეჩქარებოდა შინისკენ. დარისპანმა და მეცხვარეებმა იცნეს ჭედილა თავისათ, მაგრამ კნიაზ ბეჟანმა დაიმოწმა ვიღაცა მეცხვარეები, რომ იმათ გამოვართვი საბალახეშიაო და არ დაანება ცხვარი. დარისპანმა დაჰყარა ხმა ბეჟანის ცხვრის მოპარვაზედ. ამ ხმამ მიაღწია ბეჟანამდის და ეს ითაკილა ბეჟანმა.

— როგორ თუ!—იძახოდა ის გაშმაგებული.—მაგ ქურდმა, ქურდის შვილმა, მე უნდა ქურდობა შემწამოს! ჰა! აი მაგისი!.. სულ ნაკუწ ნაკუწათ ვაქცევ, მამაჩემი არ წამიწყდება!

ამ დროს გაიგო ბეჟანმა, რომ დარისპან ვენახისაკენ მიდისო. ის დაუხვდა უცებ ბიჭებით, დაადებინა ადგილზედ საქვეყნოთ და იმდენი სცემა სულ რბილს ადგილებში, სინამ გულს ისრულებდა.

— როგორ თუ!—გაიძახოდა საქვეყნოთ ბეჟანი.—შენ ქურდობა ჰქენ და სხვას ცილსა სწამებ?! ვინ არის შენი ტოლი!.. შე ჩირქიანო! შე ქვეყნის ამამგდებო, რომ შენი შიშით ქათამიც-კი ველარავის გაუჩენია! ჰა! ჰა!.. მოჰკალით ეგ ჰარა-

მზადა მოუსვენარი ევა!.. მოჰკალით და მაგის სისხლს მე ვზღაძე!  
მოჰკალით!..

დარისპან უგონოთ წაიღეს შინა.

მაგრამ აქ ერთი გარემოება იყო, რომელმაც შეაფიქრინა კნიაზ ბეჟანი. ნაჩალიკი იყო ახლად მოსული რუსი, რომლისა ცნობა ჯერ არა ჰქონდა ამასა. ამის გამო შესაძლებელი იყო, დარისპანის საჩივარი გასულიყო. კნიაზ ბეჟანმა აფრინა უცებ ნაჩალნიკთან ქალაღლით თავის ცოლის ძმა, რომელიც ამასთან იყო საზანდრებით მოსული შესაქცევრათა, რომ კნიაზ ბეჟან კუღირიკაძე მოაკვლევინა ცემით ბიჰებსა კნიაზ დარისპან კუღირიკაძემ, და სთხოვდნენ დოხტორს შესამოწმებლათ. მინამ დარისპანის სახლობანი გონს მოვიდოდნენ, მინამ ნაჩალნიკმა ექიმი კიდევ გამოგზავდა ბეჟანის შესამოწმებლათ.

მინამ ექიმი მოვიდოდა, კნიაზ ბეჟანმა შეაწვევინა მოლურჯო სტაფილო ცეცხლში და უბრძანა იმითი რბილი ადგილების მაგრათ დაზელა. კნიაზ ბეჟან დაზილეს ღონივრათა და დააჩნდა სტაფილოს სამღებრო ტანზედ წითლათა და ლურჯათ. ბეჟანმა მიიკნავლა ხმა და ჰკვნესოდა მწარეთ. ექიმმა გაჰხადა ტანთა. ტანთ ძლივსა ჰხდიდნენ, რადგან მტკივანს ადგილებს ძლივსა ჰსძრავდა მეტათ ნაცემი ბეჟან. ექიმმა დაუწყო თითით შინჯვა. ყოველს თითის დაკარებაზედ, ბეჟან გაჰკიოდა ხრინწიანის მიკნაიებულის ხმით. ის იყო მთლათ დალურჯებული. ექიმი შეწუხებული იქნევდა თავსა და თან იძახოდა: „ВОТЪ ЗВЪРСТВО“.

გაშანჯვის უკან, ექიმს მიაკრეს ერთი ხუთი თუმანიც ხელში. იმან მისცა საშინელი ნაცემობის მოწმობა და აცნობა ნაჩალნიკს ამგვარი უღმერთობა კნიაზ დარისპან კუღირიკაძისა. ნაჩალიკი ჰღელავდა და შუგთავდა დარისპანზედ: სულ ციკბირს უპირებდა გაგზავნას. აქ ახლა იმისგანაც კაცი მოვიდა, რომ კვდება ბეჟანის ნაცემობისაგან და ექიმი გვიბოძეთო.


— Самъ чертъ вась не разбереть! — შესძახა იმან გაჯავრებულმა. — Нихай вась бѣсы разбирають! убирайтесь вы къ чертовой матери! Этотъ на того, а тотъ на этого жалуются. Вотъ и разбирай!

ამ გვარათ, თუმცა, ციმბირში აღარ გაჰზავნა დარისპანი, მაგრამ მაინც იმის საჩივარს ყური აღარ უგდო, და გაუშვა ასე კნიაზ ბეჟანის საჩივარიცა...

მართალია, იმ დარისპანის დაყრილმა ხმამ კინალამ ააღებინა იქვი კნიაზ ბეჟანის ქურდობაზედ, რადგან მეზობლებს დიდი ხანია უკვირდათ, რითი და როგორ გამოდიოდა ამოდენა სტუმრებში, ისა მაგრამ ამის უკან ფიქრათაც ველარავინ მოვიდოდა, რომ ბეჟანისაგან იმისთანა თავის დასამცრობი საქმე წარმოსდგებოდა, რომ ქათმებითა და ინდოურებით ჩუმათ ესარგებლა ვისგანმე იმასა. არა ჰქონდათ ამაზედ იქვი, ვიდრემ ერთი კიდევ უარესი საქმე არ მოუხდა და რომელმაც კიდევ მოუღო ბოლო ამ სახელოვანს თავადის-შვილსა.

რალაცა დღეობიდამ დაბრუნებულს, მთელი ერთი კვირა უდგა კნიაზ ბეჟანს სახლში სტუმრები. ამ ღამეებში მეზობლობას ზოგს ღორი ეკარგებოდა, ზოგს თხა, ზოგს ცხვარი, ზოგს ბატი, ზოგს ინდაური, ზოგს ქათამი და სხვა. ერთს მეზობელს, რომელსაც წინა ღამეს დაეკარგა ქათმები და ინდაური და ეგონა, რომ მგელმა ან მელამ მოიტაცაო, დაუგო შიგ საქათმეში მგლის ხაუნგი, რადგან ერთს ადგილას იყო საქათმე გატეხილი და გაკეთება ველარ მოისწრეს.

მიწყნარდა ფეხის ხმა, სოფელში ხმაურობა აღარ ისმოდა. ყველანი ტკბილს პირძილში იყვნენ; მთვარე გვიან იყო ამოსასვლელსა, ღამე იყო მარაგინი. ამ დროს ერთი ვიღაცა, საშინელის სიბრთხილით მიიპარებოდა სწორეთ ამ საქათმისაკენ. ის მივიდა და ჯერ დაათვალიერა სახლი. ხმაურობა სრულიად არ ისმოდა. მაშინ გასწია გაბედვით საქათმის კარისაკენ, მაგ-

რამ კარები დაუხვდა დიდის კლიტით დაკეტილი. იმას ახსოვდა გატეხილი ადგილი საქათმისა და გასწია იქითკენ. ამან აპყარა კიდევ რამდენიმე წნელი იმ ადგილას და საჩქაროთ შეჰყო თავი შიგ შესაძრობათ. ამ დროს მოეშვა რაღაც, ტკაცან! და ჩაუყარა მაგრა კნიაზ ბეჟანს ხათანგმა რკალები. 

ამ უცნაურს ამბავზედ, კნიაზ ბეჟანმა უნებურათ შეჰყვირა საშინლათ და გამოიწია უკან. ხათანგი მოედო წნელსა. ბეჟანმა დაუწყო ცოდვილობა ხათანგსა, მაგრამ ვერ მოეხერხებინა ახსნა. ხათანგი უჭერდა კისერში და თითქმის ახრჩობდა, კნიაზ ბეჟანს დააწყობინა ზმუილი. ამ ხმასა და ზმუილზედ უცებ მოცვივდნენ საიდამლაც საშინელი ქოფაკი ძაღლები გაცხარებულის ყეფით და სწვდნენ წადრეკილს ბეჟანს შიგ გაზებსა და ღუმებში. ბეჟანმა არ იცოდა, რა ექნა, ხათანგი მოეშორებინა თუ ქოფაკი ძაღლები. ამ ხმაურობაზედ, გამოცვივდნენ სახლიდამ კაცთან დედაკაციან კეტებით, თოხებით, ბარებით, ნიჩბებით და ეცნენ ამ ადგილას. კნიაზ ბეჟან ზმუოდა. წადრეკილი ბეჟან ზმუილსა და ხრიალში, საქათმის პატრონებმა მიიღეს მგლათა ან დათვათ, და თოხი, კეტი, სარი, რაც-კი მოხვდათ დაუშინეს საშინლათ. ძაღლები მოექცნენ ბეჟანს ზედ ქეჩოზედ და ჰღრღინდნენ, რაც შეეძლოთ. ბოლოს ვიღამაც მოჰკრა ძლივს ყური კაცის ხმასა და ძახილსა. „მოკვდი! ქრისტიანებო!.. თქვენს ღმერთს მიავალეთ!..“ ისმოდა ხრიალითა და თანა ცდილობდა ყელსა და რკალს შუა ხელები მიეცა, რომ არ დამხრჩვალყო ხათანგისაგან.

— დაიცა! დაიცა, კაცო! — დაიძახა ამ ყურის მომკვრელმა, — კაცია, — აღამიანი, ვილაცა.

— კაცი-კი არა! მოჰკალ! — გაიძახოდნენ შიგა და შიგ გაცხარებულნი და აღიოდა და დადიოდა კეტი თუ სხვა, რაც ხელში ეჭირათ.

ბოლოს ბეჟანმა ერთი საშინელი ზმუილი ამოუშვა და დაეშვა უღონოთ. მაშინ სხვებმაც შენიშნეს, რომ ეს კაცი

იყო. იმათ საჩქაროთ გამოიტანეს მკვარი. ნახეს, იცნეს—კნიაზ ბეჟანი!

— ვაი შენ ჩემო თაო და დედი ჩემი ღმერთსა!—შემოიკრეს გლახებმა თავში,—ე რა ღმერთი გაგვიწყრომია! არიქი ბიჭებო, ჩქარა შეანტვრიე კარი!

ზოგნი ეცნენ კარსა, კარი იყო დაკეტილი. ეძგერნენ გასაღებს მოსაძებნელათ.

— არა, გარეთ გამოსწი, გარეთა—იძახოდნენ სხვები და სტაცეს ფეხებში ხელი გამოსათრევათ, მაგრამ ხაფანგი მოედო ისევ წნელსა.

— ვაი დედი ჩემი ღმერთსა!—შესძახეს ფეხების მწვევლთა,—ხაფანგში გაბმულა, ჩქარა კარი!

გასაღები საცალას მიიმალა, ყველანი ეძგერნენ გასაღების ძებნასა.

— მიშველეთ!—ხრიალებდა კნიაზ ბეჟან,—დავიხრჩე!

ძაღვები ისევ იწევდნენ ბეჟანზედ და გლახები ძლივს აგერებდნენ. ტანისამოსი ჰქონდა ნაფლეთებათ ნაქცევი, სისხლი სდიოდა თქრიალითა; ღუმებისა და გაზების ნაფლეთები გამოსჩროდა დახეულს ტანისამოსში.

როდის, როდის ეპოვნათ და მარბვეინეს გასაღები, აღსნეს კნიაზ ბეჟანს ხაფანგი და თითქმის უგონოთ გამოათრიეს საქათმიდამ.

— ვაი შენ ჩემო თაო, ბატონო კნიაზო, რა უკაცრაობა მოგვივიდა შენთანა!—იხილდნენ გლახები ბოდიშსა, შენი რისხვა და ღვთის რისხვა არა გვაქვს, დათვი გვეგონე, თორემ აგრე როგორ ღმერთი გაგვიწყრობოდა... ვაი დედი ჩემი ღმერთსა!.. დახე რა სიბრიყვე მოგვივიდა ეე!..

ბეჟანს ამათი სმენის თავი აღარა ჰქონდა, ის ცოცხალ მკვდარი ძლივს ჩაათრიეს თავის სახლობაში დიდის ბოდიშის ხლითა, რომ უსაბედი მოგვივიდაო. ბეჟანმა იცოცხლა კიდევ რამდენიმე თვე, თუმცა არ იყო, რომ ამ ნაცემობისა და ნაკ-

ბენობისაგან ზოიხედა, მაგრამ სირცხვილი ველარ აიტანა ქვეყნისა, იავადა და გადაჰყვა ამ ამბავს თანა.

ამის უკან კნეინა რიფსიმეც მოეშვა და აღარა ჰქონდა ის აიერი ხალხისა და საზოგადოების თვალში. ის დღიურათ ძლივს გამოადიოდა თავის ერთის შვილით, ილიკოთი.

ილიკო იზრდებოდა ამ გარემოებაში და ჰხედავდა ყველა ამ ამბებსა. არასოდეს იმის თაეში არ გაუვლია ფიქრსა, თუ როგორ უნდა იცხოვროს, ან რითი და როგორ უნდა შეიძინოს საარჩო. ის ჰხედავდა ქეიფებს, არშიყობას, საზანდრებს, ქურდობას, დაუნდობლობას, და ყველა ესე ენერგებოდა ყრმა გულში. ამის აღზრდისთვის არავინა ჰფიქრობდა. ის კნიაზ ბეჟანმა მისცა პოლკის სასწავლებელში, სადაც ამას ცალკე ახდენდა თავისი საძაგელი მაგალითების ნახვანი და ცალკე თავისი სილამაზე. ამ სასწავლებელში პირველი ღონე იყო ჯოხი, ჯოხს უნდა ექცია კაცათა. ილიკო ყველა ამისი იყო ხამი და ცდილობდა სხვა რითიმე თავის მეუფროსიების გულის მოგებას. ამას გარდა ილიკო იყო დაჩვეული შეგცევაებსა, კარგს სმა და ქამასა, მოსვენებასა, აქ ყველა შეგირდები იყვნენ ამას მოკლებული, და ილიკო ვერ ითმენდა ვერც უამათობას. იმან სცადა გაგცევა, მაგრამ ისევ მალე დააბრუნეს უკანა და შეუჩვეველი ღუმები მალე გააცნეს ამ ყოველი სენის გამკურნებელს მანუელის წკებლებსა. მაშინ ილიკომ მოიგონა თავისი დედისა და იპის გარს მყოფთ უნარები, კიდევც შენიშნა, რომ სილამაზის მუსტარნი იყვნენ აქ ბევრნი, და გაჰყვა იმათს პატიჟსა. ამან იხსნა ეს ყველა იმ მწუხარებათაგან, რომელშიაც იყვნენ სხვა შეგირდები. სადილ ვახშმათ ნახევარზედ ეს ბრძანდებოდა უფროსებში; ეცვა სხვა ყველაზედ სუბრთათა, წმინდა ტილოს საცვალი და კოხტა ყელ სახვევები; სასუნებლები და პომადები უნდა ეხმარა დღეში რამდენჯერმე; შეჰყურებდა ნიადაგ თავის სილამაზესა, ხილი ჰქონდა გამოუღვეველი; დღესასწაულებში მიჰყვანდათ ყოველთვის სახლებში; კლას-

ში ჰყვანდათ სხვებზედ დაწინაურებელი, ერთის სიტყვით, ის იყო იმ ყოფაში, რომელსაც ნატრობდა, თუმცა მაინც და მაინც ამასაც შინ დაბრუნებასა რჩეობდა. ამგვარათ სრულიათ გაწვრთნილს, ამას მოუყვდა იმ უბედური შემთხვევით მამა, და ის, რაკი წავიდა საორთვეოთ შინა, აღარ დაბრუნდა სწავლაში, რომლისაგამოც გამორიცხეს სასწავლებლიდამ. აქ ის გაჰყვა მალე დღეობაებს, ქეიფებს, დარდიმანდობას. თხუთმეტ-თექვსმეტის წლის ბავშვმა დაიწყო ლოთობა და ქეიფი უცოლო ლაზღანდარა მოქეიფე ყმაწვილებში, დაიწყო თრევა უდროვოთ ქალებში; გაჰყვა ბაზრის ბიჭებს ყომარბაზობასა და სალახანობაში,—ერთის სიტყვით, ის შეიქნა სრული ტიპი იმ ჩვენი შინა თავად-აზნაურობის ყმაწვილკაცობისა, რომელსაც შეჭვდები ჩვენს პრავანციის ბაზარ ადგილას და დღეობაებში და რომელთაც ეძახიან ჩიტო—მიტო—ნიკო—გვრიტებსა და რომელთაც იდეალათ აქეთ აღებული კინტოები და ყოველი გარყვნილებითა და სიწამხდრით გადუქარბებიათ კინტოთათვის. ტოლებში ილიკოს ჰქონდა სიკეთის ხმა, რადგან მართლაცა და იცოდა ამხანაგების გატანა, იყო გულადი და შეუბოვარი, ცხენსა და მუშტში მარჯვე; ყოველ საამხანაგო საქმეში თავგადადებული.

ამგვარს ცხოვრებაში ატარებდა თავის ცხოვრებას ილიკო თითქმის იმ დღიდან, რა დღესაც დაბრუნდა საწავლებლიდამ შინა. შრომა, ჯაფა, ფიქრი იმისთვის ღმერთს არ გაეჩინა. ამისი სიმღერა, ამისი კილო რომ გაგეგონა, არ გინდოდა მოგეშორებინა ყური, ისეთ ნაირათ ტკბილათ, უდარდელათ, ცხოვრების კმაყოფილებით ამოსდიოდნენ გულიდამ ჰანგები და თითონ შენც თითქო გიქარვებდნენ სევდას თავის უდარდლობით, თავის უზრუნველობით.

დედა ამისი, კნენა რიფსიმე, რაკი ჩავარდა ამ დღეში და სხვა რჩენის ღონე აღარსად იყო, შეუდგა სახლის მოვლის თადარიგსა და როგორც იყო გამოჰყვანდა თავიცა და შვილიცა.

ილიკო არას დაგიდევდა. იმან იცოდა სახლის კარი მხოლოდ მაშინ, რაკი ფულის სახსარს ვერსად გახდებოდა. აქ მართავედა მაშინვე დედას; და თუ დედა მაშინვე არ უშოვიდა, ის ემუქროდა მამულების გასყიდვას; რომელნიც შიგა და შიგ კიდევ დაეყიდნა. ჩაიდებდა ფულს და გაჰკრავდა ისევ ტოლგებისა, ზურნა დაფისა და სონიკებისა და ხარუნკებისაკენა.

აი ეს არის სურათი იმ ყმაწვილის კაცისა, რომელიც უნდოდათ კატოსთვის საქრმოთა.

## VII.

კატო ამ მამის იმედის მოცემით დაშოშმინდა და ყველა უბედურება და შერცხვენა, რაც გამოელო, თითქმის სულ გადიყარა გულიდამ. წიგნიც გაგზავნილი ეგულებოდა ვასილთან. ის თითქმის მხიარულათაც იყო. მაგრამ კარში და მეორე ოთახში მაინც არ გამოდიოდა, რომ არ შეჰხვედროდა იმ პირთა, რომელნიც ამას უყურებდნენ ცუდის თვალითა, და აგრეთვე ერიდებოდა დედასაც, რომელსაც ვერას გზით ვერ მოენელებინა ამგვარი მოულოდნელი სირცხვილი. ეფემია იყო ისე აღელვებული, ისე გამწარებული და გატაცებული ფიქრებისაგან, რომ მთელი დღეობით იჯდა შინა და აღარა საქმისთვის არ მიუხედნია. იმას გულში თუ არ მეტი, ნაკლები ცეცხლი აღარა ტრიალებდა კატოს გულისგან. იმის ნუგეში, იმის სიცოცხლე იყო მხოლოდ ერთი—კატო; კატოსგან მოელოდა სიცოცხლესა და სიამოვნებას, კატოს ბედნიერებით აპირებდა თავის სიბერის დღეთა განახლებასა; კატო, ერთათ ერთი შვილი, კატო, და ახლა უნდა ამოერიცხა ეს გულიდამ და გადაეგდო ვინ იცის ვისთვის. კატომ, რომლისგანაც ეს მიელოდა ყოველს ბედნიერებას, რომელსაც ამან შესწირა თავისი დღენი, თავისი ჯანი და თავისი გული, ამ კატომ ასე გაიმეტა ესა და ასე შეარცხვინა სიბერის დროს, ასე გამოასალმა ქვეყანასა.

ეს საყვარელი და ამისი სული და გული კატო, რომლისაც მოშორებას ასე მალე არა ჰფიქრობდა ეფემია და რომლითაც ამაყობდა, ახლა გაუხდა სამარცხვინოდ და უნდა ცდილიყო, რაც შეიძლებოდა მალე მოეშორებინა თავიდან, რომ ისიცა და თავის თავის ნამუსიც ამოელო ქვეყნის ყბისა და კიცხვისაგან, რომ უარესათ მოსაყრყენელათ არ გაეხადნა იმისიცა და თავის სახელიცა. ეფემია იჯდა მთელი დღე ჩუმად ბუხრის პირასა ხელებზედ ნიკაპ დაბჯენილი და ჰღელავდა მწარე ფიქრებითა.

სალამოს ჟამი იყო. კატო იჯდა თავის ოთახში. იმან ამოალაგა ვასილის მოწერილი წიგნები და კითხულობდა გულის მოსაქარველათ. ამ დროს უცებ მოვიდა ერთი ბიჭი და ისევ საჩქაროზედ გაბრუნდა. ეფემიას უცებ შეუდგა ფაცა-ფუცი. დაუწყეს სახლს დალაგება. შეუდგნენ სამზარეულოებს. ეფემიამ აფრინა აქეთ-იქით ბიჭები. კატოს ეს არაფერი არა გაუგია-რა. ისა კითხულობდა ჩუმად ვასილის წიგნებსა და იკრავდა მზურვალეთ გულში.

— უწინ მიწასა ჰნახავ კატოს გულზედ, — ამბობდა კატო ამ წიგნების კითხვის დროს, — ვიდრემ კატო შენს გარდა სხვას ვისმე შეირთავდეს... ღმერთო! როდის მალირსებ კიდევ ვასილის ნახვასა... მაშინ ველარავინ დაგვიდგება წინა... რო იცოდეს ეხლა ჩემმა ვასილმა, რა ცეცხლში ვარ, რა მალე მამე-შველებოდა და გამამიხსნიდა ამ უცნაურებისაგან.

ამ სიტყვებსა და ფიქრებთან კატო ხან გულში იკრავდა და ხან ჰკოცნიდა ცხარეთ ვასილის წიგნებსა.

— ყუთში რა ხელი აქვთ ამათა, რომ დაკეტილში მიყრიან, — წარმოსთქვა უცებ კატომ, — ესენი არიან ჩემი გულის ნუგეშნი და უნდა იყვნენ ჩემის გულის მცველათა.

იმან გაახვია ის რალაცა მძიმე ფარჩის ნაქერში და აიკრა ზედ გულზედა.

კატო რომ ამ სიამოვნებაში იყო და არ ესმოდა, რაცა

ჰხდებოდა სახლში, მე ამ ამბავზედ დამიწყო საძაგლათ გულმა ცემა. მე ვგრძნობდი, რომ ეს ამბავი არასფერს კარგს არ მოასწავებდა. მე სრულებით ავირიე და დავიბენ. ასე უეცრათ მე არაფერს არ მოველოდი, მაგრამ, როდესაც დავფიქრდი, მაშინ მამაგონდა, რომ კნიაზ ილიკო თავის კამპანიით და ზურნა დაფით იყო იმ ქალაქის ბაზარში, სადაც მე ჩავიტანე კატოს წიგნი ვასილთან გასაგზავნათა, და ამ ქალაქშივე მიმავალი შემამხვდა ბიძაჩემი ზაალ.

ბინდმა ჰკრა, რომ მოგვესმა შორილამ ზურნა-დაფისა და ერთი საშინელი ღრიანცელის ხმა.

მე კინალამ მუხლთ მომკვეთა. დამბლის დამცემმა ზარმა დამიარა თავილამ ფეხამდის... ესენი იქყვნენ კნიაზ ილიკო თავისის კამპანიით.

რა უნდა მეთქვა კატოსთვის?!

ამ ხმის გაგონებაზედ, ეფემიამ უცებ შეალო კატოს კარის ოთახი და შევიდა.

— მოემზადე!—უთხრა იმან გადაწყვეტილის კილოთი.— სამეფო მოდის.

ამ ხმის გაგონებაზედ, ერთი უცნაურათ შეჰხედა კატომ დედას და დარჩა ისე დიდხანს თვალეზ დაქყეტილი გაოცებისგან.

— ამოუღეთ სოსანი ფარჩის კაბა თავისის სამკაულით,— უბრძანა ეფემიამ გოგოებს,— და მოუშადეთ ყველა მოსართავი. ჩემ რძლებსაც ეხლავე ვსთხოვ, რომ უშველონ მორთვა.

— დედავ!— შესძახა ძლივს კატომ და წამოიწია დედის მუხლებზედ მოსახვევნათ, მაგრამ დედა აქ აღარ იყო, ის გავიდა საჩქაროთ... სხვა სამზადისებისათვის.

კატო დარჩა ისე დაჩოქილი და ხელებ განჰყრობილი კარგა ხანს. მერე თან და თან მოეშვა მკლავები და მუხლები და ის უგონოთ დაეშვა ცალიერს ადგილზედ.

ერთი წყლის შესხმა და კატოს მოსულიერება ერთი იყო. ის არა ჰგვანდა თავისის ნერვებით იმ ქალთა, რომელთაც თავვის დანახვაზედ გული მისდით და ისტერიკა ემართებათ. იმის გული, იმის ნერვები არა ტყდებოდნენ თვით ამ საძაგელს ტრაგიკულს მდგომარეობაშიაც. ისინი უმაგრდებოდნენ თვით ამ საზარელებასაც საშინელის შეუპოვრობით.

მოიხედა თუ არა, კატომ დაუწყო ისევ თვალსიერება დედას, მაგრამ მაინც დედა არსად იყო. კატო მიინძრ-მოინძრა, და გაიმართა წელში და საშინელის გაბედულობით და თითქო ითხოვს ყველას საბრძოლველათაო, მიჯდა კუთხეში და გააოიქიმა.

— კატოჯან! — დაიწყო შემკრთალმა კატოს გამდელმა, პირნაფარდისამ.

— კრინტი! — შესძახა კატომ კრიჭა მოჭერით და რაღაც მრისხანის სახით. პირ-ნაფარდისას ჩაუვარდა ენა.

კატო მქუშათ, გაალმასებული, ძუ ვეფხვივით იჯდა კუთხეში და იყურებოდა ისე, თითქო ამბობდა: ვაი იმისი ბრალი, ვინც პირველი მოვაო.

კარებზედ მეფიანი კიდევ მოვიდნენ ზურნა დაფითა. ბიჭები მიეგებნენ ცხენების ჩამოსართმევათ. ილიკო იყო ვერცხლსა და ხავერდში ჩამჯდარი. ის თუმცა იყო ნასვამი, მაგრამ სიმთვრალე არ ეტყობოდა, რადგან ძალიან იტანდა ღვინოსა. შეიარაღებული და მორთული, ის ჰშვენოდა მშვენიერათ. იმის შავთ ჩანასკული თვალ-წარბი, წითელი ხასხასი ლოყები, წვრილი ბავშვური მოყვანილი მხარ-ბეჭიანა აგებულება, შავი ცოცხალი თვალები, გამოქნილი და გამოქანდაკებული გულმკერდნი, ყველა აძლევდა რაღაცა მშვენიერს მამაცურს სანახაობას. თუმცა ამისი ჯერეთ უბანლო სახე უფრო ჰგავდა ქალისას, ვიდრემ კაცისას. სოფლის ხალხს და სახლიკაცობას ზედ რჩებოდათ თვალი ამ მშვენიერს ყმაწვილზედ. გასათხოვარი ქა-

ლები გულში შენატროდნენ კატოსა ამისთანა ბედნიერების-  
თვის. ზოგს შურიც შეუვიდა გულში.

პატარა დავაცადოთ, შემოვიდნენ კატოსთან ამისი ძალუაე-  
ბი: თუთალა, ზილიხან, თალია და სხვანი და შემოიტანეს კა-  
ტოს სადედოფლო ტანისამოსი, ფერ-უმარილი, სადაფი, პირ-  
შუშტაკი და სხვა კოსმეტური მოწყობილებანი.

— აბა, შეილო, მოემზადე, — დაუწყო თუთალამ, — შენმა  
გაზდამა დიდი ბედნიერება მოგადგა. ნეტავი ყოველს ჩემს მო-  
კეთეს მისცეს მაგისთანა ქმარი. დიდი თავადისშვილი, დიდი  
ყმისა და მამულის პატრონი, კარგი ნასწავლი, განათლებული  
ცხოვრების პატრონი და მშვენიერი თვალად ტანადი.

— ვისაც გერჩივნოთ, თავს პატივი დაიდეთ! — უთხრა გა-  
დაწყებით კატომა, რომლითაც აგრძნობინა, რომ ყოველი  
ლაპარაკი ამაო იქნებაო.

ამაში მაყრიანი შემოლაგდნენ მეორე ოთახში, რომელიც  
ხალობასა სწევდა ამგვარს შემთხვევაებში.

— ღვდელი! — დაიძახა უცებ ამოხიანათ ზაალმა.

ღვდელი მზათ იყო თავისის ოლარით.

— ნიშნის ხილი და შაქარი! — დაიძახა ისევ ზაალმა.

პატარას ხანს უკან ესეებიც მზათ იყვნენ, რომელიც მო-  
ეტანა თითონვე ბაზრიდამა.

— რა იქნა სადედოფლო? მამა ჩემი არ წაწყდეს, რომ  
ტარიელს და ნესტან დარეჯანს რომ იტყვიან, სწორეთ ე ჩემი  
სასიძო და დისწული იქნებიან: ორივენი სწორეთ კალმით და-  
ხატულები არიან. მოიყვანეთ ჩქარა დედოფალი. დიდი მორთ-  
ვა რა საჭიროა! განა თითონ სამეფომ არ იცის, რომ ეს უცებ  
მოხდა. ამას ქალი უნდა და არა იმისი მორთულობა.

ქალი იგვიანებდა. ქალს ყველა ესეები ეყურებოდა და  
მისდიოდა და მოსდიოდა ფერი. ის ჰგრძნობდა, რომ ეს იყო  
უკანასკნელი ბრძოლა, სადაც ყოველი ძალა იყო წინააღმდეგს  
მხარეზედ და ამისთვის არავინ და არაფერი, თავისი ჭირვეულო-

ბის მეტი. იხ ჰფეტქამდა კიდევ მამის იმედით, რომელიც ცხარის ცრემლებით ჰპირდებოდა დაფარვას.

ზაალს დაეკარგა სასოება და შეეარადა კატოს ოთახში.

• — ეს რა ამბავია? — შესძახა იმან მრისხანეთ, როდესაც კატო დაინახა გაწეწილი კუთხეში.

აქ რომ ეს ამბავი იყო, შევიდა ერთი ამფსონთაგანი ილიკოსი, ტიტო კირიზელაშვილი, რომელიც რამდენიმე ხანი არა სჩანდა აქა, და სხვების შეუნიშნავად გაიხმო ილიკო გარეთ.

პატარას ხანს უკან ვილამაც დაიძახა: მეფიანი მიდიანო.

— როგორ თუ მიდიან! — შესძახა ერთხმად სახლიკაცობამ ერთი ოთახიდან და ზაალმა კატოს ოთახიდან.

— ეეჰუ! — დაიძახა სოფრონმა, რომელმაც იქვე საღალას მოავლო კეტს ხელი და ჯერ ვალოდ რაცხა ეთავაზებინა ერთმოდლისთვის, რომელიც, რაღაც თავის საუბედუროთ იქვე ფეხებში შეხვდა. — ნახე! — მიაძახა ამან ძაღლსა, რომელიც წკმუტუნით გაძვრა საღალას ხალხის ლაჯებში; და აქ გადაეგლო სოფრონ მეფიანთკენა. — როგორ თუ! — იძახოდა ისა. — ჰხედავ ამ უნარებსა!.. და აქ ერთის თვალის დახამხამებაზედ სოფრონმა უტაცა ილიკოსაც და კირიზელიაშვილსაც ცხენებს ხელი.

— არ გვინდა ე თქვენი ნაბიჭრიანი ქალი! — იძახოდა კირიზელიაშვილი. — ვინ არის თქვენი მოსატყუარი!

— აგრე არ ირის თქვენი საქმე! — შესძახა სოფრონმა და დატრიალდა კიდევ კეტი. მინამ ილიკო და კირიზელიაშვილი იძრობდნენ იარაღს, მინამ სოფრონმა გადმოყარა კეტით ორივენი ცხენიდან. ისინიცა და სხვა მაყრებიც, რომელნიც გამოცვივდნენ გასაგებათ, თუ რა ამბავი იყო და მოსაშველელათ თავის ამხანაგებისა, შეიპყრეს ერთს წუთას სოფრონმა სხვა თავის სახლიკაცებით და მსახურებით, აპყარეს იარაღი და შეასხეს შინა.

სოფრონ კიდევ ცხარობდა და აპირებდა კეტით ჟინის

მოკვლასა, მაგრამ ზაალ მალე მოვიდა გონსა და დააშოშმინა ყველანი.

— მოიცადეთ ყმაწვილებო, რა ამბავი? — დაიწყო იმანა. — კნიაზ ილიკო როგორ იკადრებს მაგას! განა ილიკო აგრე მიცნობს მე და ჩემს ოჯახსა! დღეს არ ვიცნობთ ერთმანეთს და გუშინა. განა ჩვენ სამაგისოთ საქმეს გავიხდით!.. დაბრძანდი კნიაზ ილიკო, ი კაი მამიშენის სულის მზესა, აბა როგორ გეკადრება! მტრის ენას როგორ უნდა აპყვე. აბა ჯერ ერთი ნახე ქალი და თუ მერე კიდევ იფიქრო წასვლა, რაც უარესი იყვეს, ის მითხარით. ვაი შენ ჩემო თაო! მაგას ვიფიქრებდი შენგანა!

რაკი პატარა დააშოშმინა ხალხი, ზაალმა უცებ გაიხმო ტიტო კირიზელიაშვილი, რომელიც უპირებდა ილიკოს გაპარებასა.

— რა იყო, ყმაწვილო, რაზედა მქრიდი, ერთი ი მამაშენი ნუ წავიწყდება, თავსა! რაზედ აბრიყვებდი ი ყმაწვილსა? — დაიწყო ზაალმა.

— არ შეიძლება მეთქი ზაალ, შენმა მზემაცა და ი ზიარების მადლიც არ გამიწყრება, ჩენი ცოცხალი თავითა! — იძახოდა კირიზელიაშვილი. — ეგ ყმაწვილია, მაგას ჯერ არა ეყურება-რა, ცოლი ასე ჰგონია სათამაშო იყოს. ჩვენ მაგი მოვალეობაში ვერ ჩავდგებით: მაგი დედის საცოდაობით ვერც სააქაოს და ვერც საიქიოს ვერ ვიხვირებთ. ერთი ე თავი დედას ჩავაბაროთ, და მერე, თუ ის ნებას მისცემს, მაგისი თითონ იცის, ჩვენ ვალი აყრილი გვექნები. ქალს რამდენიმე ნაბუშარი გაუგდია და ჩვენს მეტი მოსატყუარი ვერავინ იპოვეთ!

— ტიტო! შენ რომ ჩემი კვიცი მოგწონდა, ხომ გავახედინინე!.. ეპეი! რა ტარება გამოიტანა. ქარია, რალა ქარი. როგორც ნიაფი ისე გარბის. ისეთსა ისვრის წინა ფეხებსა, როგორც ზვართები. რაკი შენ მოგწონდა, შენთვისა მყავს შენახუ-

ლი.—შესცვალა უცებ ლაპარაკი ზაალმა.—როცა გინდოდეს გამოგზავნე ბიჭი და წაიყვანე.

— მე აგრე კვიცი არ მამწონებია, მედა ჩემმა ღმერთ-მა!—მორბილდა ტიტოცა.

— შენ გაჩუმდი, რა გრჯის, კაი ქეიფი გასწიე!—დაატანა ზაალმა, — შეგვექ კაი კვიცზედა და იარე.

— გაჩუმდი რომელია! დღეს ჩემი ძმა-ბიჭია, ჩემ თავ ეგ მირჩვენია.

— თუ ეგ მართალი იყვეს, ტიტო, ე ჩვენმა წმინდა გიორგიმ ამომიწყვიტოს ცოლშვილი. მაგისთანა ქალი რო იყვეს, აბა მაგისთანა პატიოსან თავადისშვილს შევებდავდი. გაბრუნდი, შენ შენს ქერქში იყავი და მე ვიცი და მაგანა.

აქ ზაალმა სტაცა მხრებში ხელი და მიაბრუნა სახლისკენა.

ტიტო შევიდა და წასჩუქულა ილიკოს.

— ქორი ყოფილა.

— არა, ძმავე!—გაიძახოდა ილიკო, — ჩემი ცოცხალი თავით არ იქნება, რაც უნდა იყვეს, გინდა ცის ანგელოზი იყვეს. მე ამ უპატიურებას არ მოვითმენ. მე ამათგან უნდა გავილახო! ამათგანა!

— არა, შენ ამ ქალს გვიწუნებ! ამ ქალსა!—შემოვიდა ზაალ და სტაცა პირდაპირ ილიკოს ხელი და თითქმის ძალათი წაათრია კატოს ოთახისაკენ.

კატო ისევ ისე მოქურუშული და ამრეზილი იჯდა კუთხეში. ოთახი ძალზედ იყო განათებული. ამ სინათლეზედ წითლათ ანთებული კატო კიდევ უფრო ჰშვენოდა. გაწეწილი სქელი ნაწნავები ეყარა შავათ გაშლილი მხრებზედ და ეს კიდევ უფრო უმატებდა ამის მშვენიერებას.

ილიკომ ჩაუყარა თვალები თვალებში და აუდუღდა სისხლი. ის მართლაცა და არ მოელოდა ამ მშვენებასა.

— ერთი შეჰხედე და!—დაატანა ზაალმა და ისე საჩქარო-

ზედ გამოაბრუნა ილიკო, რომ არ მოსულიყო კატო ერთბაშათ ფიქრსა და არა ეთქვა-რა ილიკოსთვის.

აი, გრცხვენოდეს,—მიატანა ზაალმა ილიკოს, გამოაბრუნა თუ არა და გამოიყვანა ისევ დიდს ოთახში:—ისე გაუჭირე მაგისთანა ანგელოზ ქალს საქმე, რომ მზა.მზარეულათ ჩაცმულს და მომზადებულს ისევ გაახდევინე ტანთა და ეგრე დაალონე.

ილიკომ ცოტა არ იყო მოიხედა. კატოს სილამაზემ ამის თავში გააღვიძა მხოლოდ პირუტყული ლტოლვილებანი. იმას უტრიალებდნენ თავში ცალკე საწოლი, კატო სრულს ამის ნებათა და ხელთა, რომელსაც როგორც უნდა, ისე ექცევა და სხვა ამგვარები.

— ნიშნობის დრო აღარ არის!—დაიძახა კვლად ზაალმა. აბა გასწით თქვენ პირდაპირ ეკკლესიაში კარგის მაყრებითა და დედოფალიც ემ წუთაში იქ იქნება. აბა, სოფრონ!—ახლა თქვენა და თქვენმა ნამუსმა იცით,—წასჩუროხულა მაყრების შეუნიშნავათ ზაალმა სოფრონს,—როგორც მაგრა დაიჭერთ მეფიანთა და არ შეარცხვენთ გვარსა.

— უნარი ჩვენი იყვეს!—მიუგო სოფრონმა და აქ უცებ ამოჰკრა ჭიტლაყი ერთს ძაღლს, რომელსაც ვერ შეენიშნა ამდენს ხალხში სოფრონი და მიძვრებოდა იმის მახლობლათ იოთამის ოთახში გასაძრომათ.

გამიართა მაყრული და გასწიეს მეფიანთ და სხვა მოწვეულთა ეკკლესიისაკენ.

კატო იჯდა კუთხეში უქმათ, უთქმელათ და უძრავათ.

ზაალ შევარდა გაშმაგებული.

კიდევ არ იცვამ?!—შესძახა იმან კატოსა და აქ უცებ სწვდა კავებში და გადაათრია.—შე ჩვენო ყელის გამამქრელო! შე ჩვენო ლაფის დამსხმელო!.. ასწი ბიჭო ანუ ციმციმა და წაიდეთ ეკკლესიაში.

ბიჭები შემოცვივდნენ საჩქაროზედ და სტაცეს კატოს ხელი. იმას ასწიეს ციმციმა:

ფემია ადგა თავს ჩუმათა. იოთამ სტიროდა გულამოსკენითა.

— მამავ, მიშველე! — შეპლრიალა საშინელის განწირულე-ბით კატომა და განუპყრო იოთამს ხელები.

იოთამმა მიიფარა თვალეზხედ ხელი და მიეშვა მუხლებ მოკვეთილი ტახტზედა. ამაზედ მეტი იმან კატოს ვერ უშველა.

კატო წაიყვანეს ეკკლესიაში და საუკუნოთ თავისი ღტოლ-ვილებისა და ბედნიერებისგან.

## VIII.

რამდენისამე დღის უკან მეც გამოვესალმე იქაურობას და წამოველ თბილისისაკენ ლუკმა პურის საშოვნელათ. იქ ჩემს გულს აღარა იკრავდა-რა. ერთათ ერთი ჩემი გულითადი მეგობარი კატოც აღარ მეგულებოდა ჩემს მახლობლათ. მე გადავწყვიტე — ან სიკვდილი ქალაქში, ან თავისა რამე ღონით შველა.

არ გასულა მასუკან ერთი ათი თვე, რომ ერთს მთვარიანს ღამეში, როდესაც შუალამე თითქმის გადასული იყო, მომესმა ყიჟინა პაყარებისა და დუღუკის ხმა. დუღუკზედ დამღეროდა რალაცა ნაცნობი ხმა. მიუგდე საკვირველებით ყური. ის იყო ხმა ილიკოსი. იმისი გულიანი სიმღერა, უდარდელი კილო შიგ გულში მეცა. მე თითონაც არ მეძინა მაშინა და ვკითხულობდი წიგნსა. არ მამითმინა გულმა და გავიხედე გარეთ მოფარებითა, რომ იმას არ დავენახე.

ილიკო თავისის ამტსონებით მოუძლოდა წინ დუღუკსა და იყო ტკბილათ გადახვეული ერთს გოგოზედ, რომელიც წინათ იყო ილიკოს სოფლის მახლობლათ მყოფს ბაზარ ადგილას ყმაწვილი კაცების საყვლეფავათ წასული. ის, ეშში შესული, შექმდერიდა ტრფიალებით ღვინისგან გახეთქილს გოგოსა, რომელსაც აღარ ედო ადამიანის სახე და გაჰქონდა აქეთ-

იქით ბარბაცი; შეჰმღეროდა და თან ჰყვიროდა: „შენი ჳირი-  
შეე, ხარენკა-ჯან! ვიჰ!“ აქედამ იმათ შეუხვიეს ერთს მიყრუე-  
ბულს უხვირო ტრახტირში, საიღამაც გაისმოდა მთვრალი და-  
ბნეული სიმღერა, რომელიც ძნელათ გაირჩეოდა უხვირო ტი-  
რილში. გათენებამდინ არ შეწყვეტილა აქ ზურნისა და დუდუ-  
კის ხმა. გათენებამდის აქა ლოთობდნენ ეს დარდიმანდები თა-  
ვისის ხარენკოთი.

რამდენიმე ღამე ამგვარი დუდუკით ვხედავდი აქ ილიკოს,  
მთვრალი ხარენკა იყო. ამათი განუშორებელი.

ერთღამესაც ჩამოიარეს ამათ. ხარენკა აღარა სჩანდა. ისინი  
უცებ შესდგნენ ჩვენ სახლთანა.

— არა ჩემო ძმაო, — დაიწყო ერთმა ამესონთაგანმა, რომელიც  
ევგრეთვე იყო თავადიშვილთაგანი, — ახლა დავითხოვოთ,  
ფული აღარც ერთს აღარა გვაქვს.

— რას ამბობ კაცო! — როგორ არ გვენდობიან. კალო-  
ზედ პურს მივცემთ, თუ უნდა ტკბილი წაიღონ.

— არა, კნიაზჯან, რომ გაგვისტუმროთ, მე და ჩემმა სულ-  
მა, ისა სჯობიან. აგერ ერთი კვირაა არა გვიძინებია, ცოლ-  
შვილი არ გვინახავს. — დაიწყეს მედუდუკეებმა, რაკი დაატყეს,  
რომ საქმე ნისიაზედ ვარდებოდა. — ჩვენ ჩვენი ალალი მოგვე-  
ციოთ, თქვენი თავი ღმერთმა თქვენ პატრონს მოახმაროს.

ამათ ამოალაგეს უკანასკნელი ფული და გაისტუმრეს მე-  
ზურნეები.

ხვალ აღრიან წავიდეთ, თორემ ეს ქალაქია, დიდი მუცე-  
ლი აქვს, — დაიწყო რამდენმამე, — თორემჳიდეე გავყვებით რას-  
მე და ერთს სირცხვილსა ვსჭამთ.

მეორე დღეს მართლა აღარა სჩანდნენ ისინი. მაგრამ რამ-  
დენიმე დღის უკან ილიკოს ისევ მოეკარ თვალი. ის ერია ქა-  
ლაქის პაჳარბ ბიჭებში და მიდიოდა ფაიტონით და ზურნა და-  
ფით ბაღებისაკენ. რამდენიმე დღის უკან ღამე მოეკარ თვალი,  
რომ ის ისევ იმ ტრახტირში მოვიდა. პატარა დავაცადლოთ და

შემოსმა ისევ დუღუკის ხმა და ტკბილი გულიანი სიმღერა ილიკოსი. მე უგდე კარგა ხანს ყური და აღარ მამითმინა გულმა—ავდექ და წავედი ამ ტრაქტირში. ილიკო, თითონ მეტრაქტირე და რამდენიმე ქალაქის დარდიმანდი ბიჭი ისხდნენ ერთს ყრუ ოთახში, ჰსვამდნენ ღვინოსა და შეექცეოდნენ დუღუკითა.

— შენი-კი ჭირიმე, კნიაზჯან!—შესძახოდა მეტრაქტირე ეშხში შესული და აცეცებდა თვალებს ილიკოს, როგორც მსუნაგი კატა ძეხვსა!—იმ ღმერთს-კი ვენაცვალე, რამაც ღმერთმა ეგ წარბები გამონასკვნა მაგ სპეტაკ შუბლზედ. ერთი პროშტი, შენი ჭირიმე და ნუ მამკალ ულაზათოთა.

მეტრაქტირე მოვიდა პროშტსა და კოცნამ გაიღო შოლტივით მალალი და ვრცელი ტყლაშუნი.

— ვინა, კნიაზჯან! შენ უნდა წახვიდე ხვალ?! ვინ მამაძალლი, მინამ ამ ჩემ ოხერ ტრაქტირში მოიპოვება რამე, შენ აქედამ გაგიშვებს!.. ფული რომელია! მე ფული არა ვარ?! ეტრაქტირი რა ოხრათ მინდა, თუ სულ შენ არ განაცვალე... ჩემი თავიც შენი ჭირის სანაცვლო იყვეს... ეი! ღვინო, რომელიც უფრო კარგი კახური იყვეს... აი, შინ არ არის ყველაფერი!..

აქ შემოიტანეს მართლაცა და ჩინებული კახური ღვინო. ღვინო იღვროდა წყალივითა. პაჟარნები გაუგებრათ ღრილებდნენ; მედუქნეებს აღარა გაეგებოდათ-რა. მეტრაქტირე ცხადათ იპარავდა სმაში ღვინოსა. ილიკოს თანდათან მოედო ღვინო. მეტრაქტირე წამ-და-უწუმ მიდიოდა პროშტსა. მთვრალი პაჟარნები ძლივს წავიდნენ. ტრაქტირშიიკმა მედუღუკეები გაისტუმრა, ილიკო უგონოთ მოეშვა იქვე ერთს პატარა ტახტზედა. მეტრაქტირემ შეიტანა ილიკოსთვისაც და თავისთვისაც ქვეშაგები და შეიკეტა კარები.

ილიკო მართლაცა და დარჩა ქალაქში. ბინა ჰქონდა ისევ ამ ტრაქტირში, ფულებსა ჰვლანგავდა ბზესავით ხარენკასა და

ხარენკას მსგავსებს იცვლიდა ყოველ ღამე. სახლკარი იმას აღარ ახსოვდა. ლოთობისა, ცუდათ ცხოვრებისა და უძილობისგან დაეტყუა სიგამხდრე და ჩამოყვითლდა სამთელივითა.

აქ მოვიდა ამბავი, რომ ვაჟი გეყოლაო.

ამ ამბავზედ ილიკომ ყურიც არ გაიბერტყა და ფიქრათაც არ მოჴვიდა ახლა მაინც არის სახლის მოგონება. ის კიდევ დიდს ხანს დარჩებოდა ქალაქში, რომ არ ასჩენოდა საძაგელი სწეულება, რომელმაც მეტრაქტირეც-კი შეაშინა.

— არა, კნიაზჯან! ახლა შენ ცოლშვილსაც მიხედე, აგრე როგორ იქნება! კნიაზის მშემ, რომ ჩემი საქმეც ცუდათ არის. დღეს თუ ხვალ ტრაქტირს დამიკეტენ.— გაუცხადა მაშინ ძლივს მეტრაქტირემ.

აქ, მეტი ჩარა არ იყო, უნდა დაბრუნებულყო ილიკო შინა.

## IX.

ერთიც ვნახოთ კნენა რიფსიმეს მიაღდა თავისი შვილი ცოლიანათ კარსა, მაყრებითა და ზურნა დაფითა. ეს ჯერ შეჰქრთა: არ მოელოდა ამ ამბავსა, რადგან საცოლოთ ჯერ ყმაწვილი ეგულებოდა თვრამეტ-ცხრამეტის წლის ბავშვი. მაგრამ, როდესაც ჰნახა სასძლო, რომ ადამიანის სახე ელო და თითონაც რიფსიმეს ძალიან უყვარდა ლამაზი ქალები, დამშვიდდა და მეორე მხრითაც იმითი დაიმშვიდა გული, რომ იქნება ჩემმა ილიკომ მოიკვეთინოს თავისი ცუდი ყოფა-ქცევა და ახლა მაინც არის სახლკარობას თავი დაუდოსო.

ილიკომ მართლაცა და რამდენიმე კვირა დაჰყო შინა. ცოლთან იყო ტკბილათა და აღერსითა. მაგრამ რამდენიმე კვირის-უკან იმას შემოუარეს ამფსონებმა, გაიყოლიეს თანად და აქ გააცნეს ხარენკა, რომელიც, როგორც ზემოთ იყო ნათქვამი, იყო იქით მხარეს მისული ყმაწვილკაცობის საყვლად, ვაჟათ,

რადგან ქალაქში ბაზარი წახლდამოდა. მასუკან დაიკარა ილიკო სახლიდამ და ბრუნდებოდა შინ ერთი-ორი ღამობით, რომ ფულები გამოერთმია დედისთვის, და შემდეგ ის იკარგებოდა კიდევ ახლად ფულების გამოღვეამდინ.

კატო, რა-კი ჩავარდა ამ დღეში, არა ჰრაცხდა ვალად თავის გამოავკაცებას: ის იყო ჩუმათა და ეს დადუმება თავის გრძობათა და ტანჯვათა უფრო და უფრო ედებოდნენ ამის გულს ცეცხლივითა. ის გახდა, მიტკნარდა და რამდენიმე თვის უკან რომ ენახა კაცს, ველარ იცნობდა ამაში იმ კატოსა, რომელიც იყო გათხოვებამდის.

დედამთილი ცდილობდა ყოველის ღონისძიებით ამის სიამოვნებასა და გართობას, მაგრამ ესეც არ იყო დიდის ხნისა. კნენა რიფსიმეს ყურამდინ მიაღწია კატოს წასრულმა ერთი ათასათ გაზვიადებულმა.

ამ ხმას იქნება ვერ მიეღწია კნენა რიფსიმემდის, თუ მაყარი და აფსონი ილიკოსა ტიტო კირიზელაშვილი არა ყოფილიყო სიიღამლაც ნათესავი, სოფრონის ქვრივი რძლის ზილიხანისა.

— იცი რა! — გაიხმო ცალკე ზილიხანმა ტიტო, როდესაც ილიკო მოვიდა ჯვარის დასაწერათა, — რაზედ აუბედურებთ მაგისთანა პატიოსან ყმაწვილსა! თქვენ იქნება არ გაგიგონიათ მაგ ქალის უნარები. თქვენმა მშემ, შინაური ბიჭი რა არის, შანაური ბიჭი არ გაუშვა. თავისი დიდილი ბიძაშვილი არ დაინდო. საცოდავი ბავშვი ძალათი შეაცდინა! ჯერ ვინ იცის რამდენი ნაბიჭვარი გაუგდია! მთელი სოფელი ცოდვით აგვამსო!.. ერთი მაგისი ნაბიჭვარი ლორებს გააგდებინეს სოფლის ბიჭებმა. ნეტავი, შენი სიცოცხლით, მოუნათლავებიშინც არ დაეხოცა და არ შეეკმია ლორებისა და ნადირისათვის!.. მთელი ქვეყანა და მაგაზედ ქათ-ქათი და თქვენ რა დაგემართათ — ქვეყანაში არ ურევიხართ?.. მერე ბნელაცა სკირს..

ვაიგო ეს ტიტომ, და ვითომც ქვეყანასა სცოდნია. ამ-

გვართ ჩვენი ახალი შინა-ქართველობის წარმამადგენელთ, სხვა სიკეთესთან, სკირთ ზნე ქალების მოყრყენაცა. ბოალი იმ ქალისა, რომელიც ჩავარდება ამათ პირში, ან გაუწყრება ღმერთი და ერთხელაც არის ამათ ან გააჯავრებს, ან დაუტკება, ან მოეწონებათ. გააჯავრებს—საქვეყნოთ მოჰყრყენიან, დაუტკება—დაიწყებენ ამათზედ კვენხასა, რომ ასე ვართ ამასთანა და ასეო, შინაგან ნიშნებსაც-კი აგიწერენ ამ ქალისას და აღვილებს, სადაც ვითომც ამათ იმათთან კავშირისთვის შეყრა ჰქონოდეთ; მოეწონებათ და კიდევ ცილები, კიდევ არშიყობა და თავის მოსაქრელი ლექსები და საქვეყნოთ იმათი ციდი სახელის მოფენა.

ამ თვისებამ არ მოათმენინა ტიტოსაც და იმან მოსდო ეს ხმა ქვეყანასა. ის ამისთანაებს არა ჰმაღავდა თვით ილიკოსთანაც და საზიზღარის სიტყვებით დასცინოდა იმის პირველს ღამეს და სასძლოს ცრუ ქალწულებასა. ილიკოც რომელმაც უფრო კარგათ იცოდა სიმართლე ამ საქმისა, არა თაკილობდა და თითქო საამურათაც ჰქონდა ამგვარი ლაზღანდარობა თავისავე ცოლზედ.

ამგვართ ამ ხმებმა მიიღწია კნენინა რიფსიმედიც, და ის აღელდა.

ვინ! ერთი აზნაურის ტყლაქი შეატყუეს ამის ერთათ ერთს შვილს, და ისიც ამისთანა სახელ გატეხილი!

— ვისი ტოლები არიან!—გაიძახოდა კნენინა რიფსიმე განრისხებული, —გლახა აზნაურებისგან მე ეს უნდა მამივიდეს?! მე, ვორონცოვის ბალებში გაზდილსა და განებიერებულსა?! მე, დიდი კნიაზის კულირიკაძის კნენინას!.. როგორ! იმათ ჩემ სახლშიაც უნდა გაიარონ!.. წაიყვანონ თავისი უნამუსო ქალი!.. გამაცალონ!.. დღესვე გავაგდებ!..

მაგრამ გაგდება კატოისი იმან ვერ გაჰბედა, თუმცა გაცხარებული შევარდა იმის ოთახში. ის უპირებდა ერთი ამბვის დაღწევას, მაგრამ ერთი კატოს დაწყნარებულის და შეწუხე-

ბულის სახის დანახვა და კნენა რიტსიმეს ენის ჩავარდნა ერთი იყო.

— შენმა სამშობლომ ჩემ სახლში არ გაიარონ! — ერთი ეს-ლა სთქვა კნენამ და გავიდა.

კატო აღარც-კი გამოეკითხა ამის მიზეზსა. ის დიდი ხანია გამოასალმა სამშობლოსაც და სხვა ყველას, რაც იმის გულისთვის იყო ძვირფასი და რაც მოაგონებდა იმას თავის ბედნიერებას.

კნენამ მისწერა საშინელი ლანძღვის წიგნი ეფემიას, რომელმაც თავის მხრივ არ დაზოგა კნენა, და ამის უკან მოეკვეთათ ეფემიას და იოთამს თავის ქალის ნახვა და კატოს თავის მშობლებისა.

იოთამმა ვერ აიტანა ეს დღეები და გადაჰყვა თან. ეფემია, ის მშვიდი და აუჩქარებელი ეფემია იქცა ღვარძლის გულდათ. როგორც ეძახდნენ ბოლოს იმასა. იმას აღარ მოსწონდა აღარც არავის ვაკეთებულ სიქმე, აღარც არავის მოქმედება; იმას აღარ იამებოდა აღარავის არც ნახვა, არც ამბავი. ყოველი იმისი სიტყვა, ვისაც-კი ამასთან სიქმე ჰქონდა, იყო მწარე და კიცხვითი; ყოველი იმის მოქმედება მიემსგავსებოდა უფრო ჯიბრს, ვიდრემ სიქმესა.

ამ ხანებში კატოს მიეცა ვაჟი, ნუგეშით გულისა კატოს გაუჩნდა ახლა ეს თავისი ღვიძლით ნაშობი შვილი, ყოველი თავის იმედი დაამყარა ამაზედ და შესწირა ამას სიცოცხლე. ცოცხალი და მალხაზი ბავშვი, თითქო ჰგონობსო თავის დედის გულის პასუხსა, შეჭხაროდა და შეჭფიფინებდა დედის თვალებში. კატოს დედობრივი გული უღელავდა სიამოვნებით და ნუგეშით ამ სანახაობაზედ.

კატომ ამ ახალს ცხოვრებაში, კოტა არ იყო ისევ მობრუნა გული და დაიწყო მოხედება. იმას მოუვიდა კოტ-კოტათი თავისი ფერი. ბავშვი რამდენიც იზრდებოდა და მო-

დიოდა გონს, იმდენი უფრო ცოცხლდებოდა, მალხაზდებოდა და ემკვლევებოდა დედას.

ამ ხანებში დაბრუნდა ქალაქიდან ილიკოცა; აპკრიფა ცოტა ფულები და გაპქრა ისევ, მინამ გამოეღოდა ფულები.

ამაში თანდა თან გამოყვეს მოვალეებმა თავი და დაეწყო ილიკოს მამულებსა და სარჩოს ყიდვა. დადგა საშინელი გაქირვების ცხოვრება. კნენა რიფსიმეს მამაყმა გულმა ველარ აიტანა ეს ამბები და უცებ მოკვდა ელდისაგან.

ილიკო ქეიფობდა. ~~დარჩა მარტო კატო.~~

~~დარჩა მარტო~~ და გამოჩნდა ქმრისგან შეძღვნილი საძაგელი სენი. კატო დიდს ხანს არ უტყდებოდა თავსა და ვერც მოეფიქრა, რო ეს იქნებოდა იმგვარი სნეულება. სნეულებამ დაუარა ტანში.

ბავშვმა დაიწყო უცებ ავადმყოფობა, დაჰყარა ტანზედ მუწუყებმა და რამდენსამე თვეში გალიტანა თან.

მხოლოდ მაშინ მიუხვდნენ, რომ ეს სნეულება იყო ცუდი და თავისი ერთათ-ერთი ნუგეში სიცოცხლეში, ერთათ-ერთი სულიერი, რომელმაც ამას დაუბრუნა სიცოცხლე, მოსწამლა და მოჰკლა კატომ თავისივე საკუთარის ძუძუთი.

კატოს დაუწყეს წამლობა, მაგრამ გვიან-და იყო. იმას ყელიდამ აუვიდა სნეულება ცხვირში და კატო, თავის სიცოცხლეს ბავშვთან, გამოესალმა თავის სილამაზესაც. სნეულებამ გამოსჰამა ცხვირის ნესტოები და ძვალი. მისდა საუბედუროთ ის მოარჩინეს ამ დამახინჯების უკან.

კატო დამახინჯებული წაიყვანა დედამ. ილიკომ დაყიდა უკანასკნელი ქონება და დაფქული სნეულებისგან, ეგდო ავლაბარში მაიორშასთან საწამლებლათა, რომელსაც ეს მადლიანი დედაკაცი უფრო სწამლობდა სამადლოთ, ვიდრემ ფულების სიხარბით, რადგან ილიკოს დაყიდული მამულის ფულები კიდევ შეეჭამა, მინამ მოვიდოდა ამასთან საწამლებლათ.

X.

რა იყო ამ ხანებში ვასილის თავს?

ვასილი, როდესაც დაბრუნდა სასწავლებელში, დაიწყო საშინელი ბეჯითობა და სწავლა. ის მოუთმენელად იმ დღეთა როდესაც შეეძლებოდა აქ მოყვანა თავის კატოსი.

მოვიდა დრო და უნდოდა კატოს, რომ ის მზათა ყოფილიყო. აქ უცებ მოუვიდა კატოს წიგნი, რომელშიაც სწერდა, რომ თუ დროით არ მამეშველე, ძალათი მათხოვემენო. ის მაშინვე გაემზადა წამოსასვლელათ. ვიდრემ აიღებდა ბილეთს, პოდოროენას, ვიდრემ უცებ მიუვიდა ამბავი მამისა, რომ კატო გათხოვდაო.

საშინელი ზარი იყო ვასილასთვის ეს ამბავი. მთელი ვერთი კვირე ის ვერ მოვიდა გონსა. ეს იყო იმისი პირველი სიყვარული, ამანვედ ამყარებდა თავის ცხარე იმედებს და მომავალს მოქმედებას და უცებ ასე უცნაურათ ჩაუწყვიტეს სადავები, მოსწყვიტეს გული საუკუნოთ თავის პირველ სიყვარულთან და ჩაუკვეთეს თავისი პირველი ყრმა იმედები.

მას აქეთ აპყარა ვასილიმა გული სწავლასა და უწყყო დევნა გულის გასართობ წიგნებსა. ის შეეჩვია სხვა და სხვა სამსლაათო მოსწავლე ახალგაზრობათა საზოგადოებას, რომელნიც სწავლის მაგიერათ, ჰყვიროდნენ მაღალს საგნებზედ მაღლის ხმითა და ყოველად გაუღებრათა; საქმის მაგიერათ, პოესამდნენ ენას ჰოსიჯა და აჩანაჯ დამტკიცებაზედ; რომლიდამაც, რაღა თქმა უნდა, სიმკვიდრე ამათს თავში არა რჩებოდა და პირველს შემთხვევაში ესენი იყვნენ ჰოჯა და აჩანა, რომელიც იყო დამოკიდებულნი იმაზედ, რომ რა კაცებმა დაასწრეს ამათ ან ჰო და ან აჩა, რომ ორივესი წინააღმდეგი ან დაემტკიცებინათ, ან ყოველად მოუსაზრებლათ კვერი დაეკრათ. ამ გამტაცემელმა სენმა, რომგელსაც მოაჭეს სარგებლობა მხოლოდ იმათთვის, ვინც ამ შარლატნებთან კიდევც ჰსაქმობს და სწავ-

ლობს, გაიყოლა ვასილიც. ის შეჩვია ცარიელს სიტყვებზედ სჯასა და ბაას, ბოლოს გაღეკა ეს იმგვარ ჩვეულებათა, რომ ამაში ჰხედავდა ყოველი საქმის ბოლოსა. სიტყვები გაჰხდნენ ამისი ღმერთი. აქედამ ძნელიც აღარ იყო სხვა საქმეების გაყოლაც. ის გაჰყვა ნაცნობობას. გაიცნო სახლობები. ამისი მარჯვე ლაპარაკი, რომელიმე ცოდნა, რომელიც ამას შეტი ჰქონდა სხვებზედ, რადგან ერთი-ორი წელიწადი მაინც ჰბეჯითობდა სწავლასა და წიგნებს, ამისი ნიჭიერება მოსწონდათ ყველგანა. ეს ჰხედავდა ამასა და ამან კიდევ უფრო გაიტაცა ეს საზოგადოებაში. ეს დაუახლოვდა რამდენსამე გასათხოვარ ქალებსა, დაუწყო იმათ ქადაგება ახალს გზაზედ დასაყენებლათ და არცა რჩებოდა ამისი მეცადინეობა უნაყოფოთ. მარჯვე ლაპარაკთან და რაოდენსამე ცოდნასთან, ამას შემწეობდა ამ ქალებთან თავის სახის ეშხიცა. ქალებიც ვასდევდნენ ამის ქადაგებას, მაგრამ ამისი უბედური სნეულება ამათაც ედებოდათ. იმათი პირველი საქმე ჰხდებოდა ახალგაზდა მოღური ლაპარაკი, მოღური წიგნებისა და მწერლების კითხვა და ამას იქით არ მიდიოდა იმათი მეცადინეობა, სწავლა და საქმე: ნიღაგ მასლაათი, ნიღაგ ბაასი და მუსაიფი ამითი სრულდებოდა ყველაფერი.

ამ სახლში სიარულისა და დაახლოვებაში, ვასილს აღებრა ხერ-მეორეთ სიყვარული ერთი გასათხოვარი ქალისა, რომელმაც პირველმა უჩვენა ამას თავისი გული და სიყვარული. ამისი სისხლი აღელდა კვალად ძლიერებითა. ქალი იყო ყმაწვილი, ლამაზი, ჰქონდა ცოტა შეძლებაც, იყო მარჯვე მოლაპარაკე. ამათ წინ აღარა უღდათ-რა. ქალი იყო მემკვიდრე თავის დახოცილის ვაჟარი დედ-მამისა. იმათ დაიწერეს ჯვარი:

ეს ამბავი არავინ იცოდა ჩვენში, რადგან ვაჯავრებულნი ვასილი აღარა სწერდა დედ-მამას წიგნსა.

ვასილმა ვერ გასძლო რუსეთში და გამოვიდა საქართველოში თავის ცოლითა. იმან ვერ გასძლო თავის მშობლების

უნახაობა და გზათ შემოუარა იმათა. ღამე იყო, რომ ვასილ მოვიდა.

კატო ჯავრისა, ტანჯვისა, სირცხვილისა და მწუხარებისაგან აღარ იცნობდა. ასე გასინჯეთ, რომ ტანშიაც-კი იკლო და დაგლია. იმისი მშვენიერი ცოცხალი სახის მაგივრათ, ის იყო ახლა მახინჯი და საძაგელის სანახაობისა.

ის იჯდა თივისთვის მარტოკა, იგონებდა თავის პაწაწინა ბავშვსა, რომელიც თავის უბედურებით მოსწამლა. ის იგონებდა თავის წარსულსა და ვინ იცის ამ ბედნიერ დროთაცა, როდესაც ვასილ უჯდა იმას ამ ოთახში, ასწავლიდა და აღუთქვამდა მამავალთ ბედნიერებათა. ამ დროს გაელო კარი და შემოვიდა ვასილ თავის ცოლითა, რომელსაც შემოუძღვა ეფემია.

ამ უცნაურს დანახვაზედ კატომ ერთი შეჰყვირა, და დარჩა სახტათა.

ვასილმა ვერ იცნო.

— თითქო მითხრეს—კატო აქ არისო?—ჰკითხა ვასილმა ეფემიას.

— ეგ არის ჩემი უბედური კატო!—უპასუხა იმანა, და მიუშვირა ხელი კატოზედ.

კატომ უცებ იტაცა საფეთქელზედ ხელები და გავარდა მეორე ოთახში.

ვასილმა ჩაიყო მუქებში თავი და ერეოდა გული სატირლათა, მემრე ის უცებ წამოხტა და მიუბრუნდა ცოლს.

Пойдемь душинка!—და გაიტაცა ცოლი, რომ ცრემლები არ შესჩნეოდა და გულის დუდილი ქვითინათ არ გადაჰქცეოდა. ის ოთახი, ყოველივე ის არემარე აგონებდა იმ ბედნიერთ დროთა, როდესაც პირველ იცნა ამან სიყვარული, აგონებდა ყველა თავის თავის მშვენიერს კატოსა, და მხოლოდ კატო აღარ აგონებდა თავის თავსა.

მეორე დღეს გავარდა ხმა—კატო შესცდაო.

რამდენსამე ხანს უკან კატო ჩამოიყვანა თავისმა საკუთარმა ბიძამ ზალომა ქალაქის საგიეეში.

რა ჰქნა ვასილმა იმ თავის ცხარე აზრებისა, რომელსაც ისე მიელტოდა და რომლისთვისაც ისე აღუძრა კატოს გული?

ვასილ დატრიალდა ქალაქში. იმის სახლის კარი ღია იყო თავის ახალგაზდა ამხანაგებისთვის. გარდა ამისა ვასილის სახლში იყო ნიადაგ ცხარე ბაასი და მუსაიფი სხვა და სხვა დაწინაურებულ აზრების მოძრაობაზედ, რომელიც თავდებოდა კარგის ვახშმით ან ქალოდითა.

**Это все слова!**—იძახოდნენ თვითონვე ეს ახალგაზდობანი,—**вамъ надо дѣло! Дѣло дайте, дѣло!**

და თვითონ ეს დელოს მთხოვნელები, როდესაც საქმე მიდგებოდა დელოსზედ, რჩებოდნენ ისევ ლაპარაკს, რადგან ლაპარაკი და ბაასი უფრო ადვილიც არის და სასიამოვნოცა. დელოს-კი უნდოდა გასჯა, გონებისა და სხეულის შეწუხება, ფიქრი, მეცადინეობა, ბეჯითობა და სხვა სამძიმო რამეები. ამისგამო ეს **Дѣло**-ს მძახებლები თითონვე ცეცხლივით ერიდებოდნენ საქმესა და, რა-კი თითონ არ აკეთებდნენ არაფერს, დასცინოდნენ სხვის საქმის დაწყობასაც და ჰკითხავდნენ იმ ახალგაგდობას, რომლებიც შეძლებისდა გვართ შესდგომოდნენ საქმესა. ჰკიცხავდნენ სხვებსა, და თან თითონვე გაიძახოდნენ. „**Дѣло дайте! Дѣло нужно!**“

ცოლი ამისი ეგრეთვე ლაპარაკობდა ცხარეთა და კარგებისას, მაგრამ საქმით იმას ყველას დიდკაცების ცნობა და მიყოლ-მოლა და მდიდრული ცხოვრება ერჩივნა. გამოსული ვაჭრის სახლიდამ ის დიდ ბედნიერებათა ჰრაცხავდა იმათთან დაახლოვებას და კავშირსა, რომლის გამოც უმართავდა ხშირათ წვეულებასა და შექცევებსა. მას უნდოდა დიდი ხარჯი. ეს ამ სიამოვნების და ბედნიერების მოსასპოვებლათ არ ერიდებოდა ხარჯსა. ამისგამო ორი წლის უკან იმათ შემოაკლდათ საფანელი და დაუწყეს ვალებს კრეთა. ვალებითაც შორს ვერ

წავიდნენ, იმას უნდოდა გადახდა. ამის გამო სახლში დატრიალების მაგივრათ ბანკებისა, სასწავლებლებისა, ამხანაგობებისა და სხვების დასაწყობლათ და გასამართავათ, რომელიც ისე აღულვდა და აღელვებდა ვასილის გულსა და ტვინს კატონთან გაცნობის დროს, იმან დაუწყო ძებნა სამსახურს და შეყო თავი ერთს რომელსამე სასამართლოში, სადაც მიიღო რიგანი ადგილი, და თან-და-თან ჰპოვა, რომ ჩინოვნიკობა არ არის ისე სათაკილო, როგორც წინათა ჰქონდა ჩაგონებული და, პირიქით, შეეჩვია იმ აზრსაცა, რომ ჩინოვნიკობის გარე სხვაგან საქმე არ გაროვდებაო.

მასლაათის მოყვარე ახალგაზღობა თან და-თან გაშორდა აშას, რადგან დაატყეს, რომ ის ისე გულთთ აღარ ეკიდებოდა ამ მასლაათებს, რადგან სხვა საქმეც გაუჩნდა ახლა, და თან-და-თან დაუწყეს დაცინვა და კიცხვა, რომ განჩინიკდა და წინათ-კი რაებს გაიძახოდაო, მაგრამ თითონაც სუნით ეძებდნენ სადმე თბილს ადგილას შეეყოთ თავიო.

მასუკან ვასილ მიეცა თავის საქმეებს და ცოლ-შვილს, იმათ მიხედვდნენ ახლა მარტო დიდკაცობანი, რომელიც ასე ძლიერ უყვარდა ამის ცოლს.

ვასილ, ეს ქართველი ვასილ, რომელიც თავის შეწირვას უპირებდა თავის სამშობლოს, ახლა სრულიად ქართველებსაც ძვირათა ჰხედებოდა; და ამ თავდადებულ ქართველს შვილებიც ისე ეზრდებოდნენ, რომ ქართული ინიცი აღარ იცოდნენ და საქართველოს ხალხი იყო იმათთვის ასეთივე უცხო, როგორც სპარსელები და იაპონელები. ცოლს ამისას არ მოსწონდა ქართველები.

ლაპარაკი-კი რომ შეგხვედროდა, ისევ ის ცხარე მოლა-

ჩაკე ვასილ, ისევ ის მამულისა და ქვეყნის მოყვარე და ცხა-  
; საქმის მძებნელი ვასილი იყო, ოღონდ ეს საქმე იმას ვერ  
ოვნა, რადგან წინათ, რასაცა ჰუიქრობდა იყო მხოლოდ  
ჯაუზაჰ, და ახლა ჯერ პრაქტიკას გზა არ გაეკვლია. პრაქ-  
თვა თავის თავათ არა ჩნდებოდა არც აქ, როგორც არა ჩნდე-  
სხვაგან, სადაც თავათ კაცი არ ეძებს პრაქტიკას.

1873 წ. ანგარიშის 7-ს.

---